

लूकासे भ्रिबा थार्बा पिन्बा समाचार चु किताबला बारेरी पाङ्तोःमा

भ्रिबा म्हि: येशूला मुल चेला पावलला ह्यो लूकासे भ्रिबा मुबा (२ तिमोथी ४:११)। थे अर्गु यहुलला म्हि हिनना ओच्छे थे डाक्टर मुबा (कलस्सी ४:१४)। थेसे मुल चेलागदेला गेला बारेरीनोन भ्रिबा मुला (मुल चेला १:१-२)।

भ्रिबा ग्ला: रोम शहररी भ्रिबा मुबा।

भ्रिबा साल: ओस्पन ईश्वी संवत् ६०-७० (विक्रम संवत् ११७-१२७) सालला गुडरी भ्रिबा मुबा।

खाल्दा भ्रिबा: येशूला बारेरी तबा तामगदे घोना लबाला लागिरी थियोफिलस भिबा म्हिदा भ्रिबा हिनना।

चु थार्बा पिन्बा समाचाररी येशूला बारेरी चुह्ण्ड लसी भ्रिबा मुला, इस्राएलीगदेला गुडरी फेप्खला भिसी कबुल लबा थार्बा पिन्बा ग्लेदेन जम्मान यहुलला म्हिगदेदा सोना लबा येशू ख्रीष्ट हिनना। थे दुख याङ्बा म्हिगदेदेन प्राडबो म्हिगदे ओच्छे जम्मान म्हिगदेदा थार्बा पिन्बा समाचार थेःना लगै भिसी परमेश्वरला आत्माग्याम जम्बुलिडरी पुडखबा हिनना। चु थार्बा पिन्बा समाचाररी जम्मान खाल्ला दुखरी परब तबा म्हिगदेदा वास्ता लसी भ्रिबा हिनना। चुरी ताङ्तोःबा तामगदे प्रस्टन प्राङ्मुला। पाङ्नोन तोःमा चुरी डाचछाला अध्यायगदेरी येशू जम्बुलिडरी फेप्खबा ताम ओच्छे लिच्छापट्टिला अध्यायगदेरी चा येशू स्वर्गरी फेप्बा तामला बारेरी भ्रिबा मुला।

येशू स्वर्गरी फेप्माहेन्से येशूदा विश्वास लबागदे ल्हानान बढब तबान निजी ओच्छे येशूला बारेरी ल्हानान ग्लारी थेःबान

निबा तामगदे लूकासे “मुल चेलागदेला गे” भिबा किताबरी भिबा मुला।

मुल तामगदे

शुरुला ताम १:१-४

बपतिसमा पिन्बा यूहन्नादेन येशू न्हबा ओच्छे येशू जजा मुबा
धुइला ताम १:५-२:५२

बपतिसमा पिन्बा यूहन्नासे लबा गे ३:१-२०

येशूसे बपतिसमा किन्बादेन शैतानसे येशूदा फसब लबारी
म्हाइबा ३:२१-४:१३

येशूसे गालील अञ्चलरी लबा गे ४:१४-९:५०

येशू गालील अञ्चलहेन्से यरूशलेम शहरधोना फेपबा ९:५१-
१९:२७

यरूशलेम शहररी येशूला गे थुम्बा धुइ १९:२८-२३:५६

येशू सिबाग्याम सोबादेन स्वर्गरी फेपबा २४:१-५३

लूकासे भिबा थार्बा पिन्बा समाचार

लूकासे येशूला बारेरी भिबा

¹ परमेश्वरसे डन्ना गुडरी लबा गेला बारेरी ल्हानान म्हिगदेसे भिबारी छ्याइबा मुला। ² डाच्छाहेन्सेन येशूसे लबा गेदेन लोपबा ताम म्हाइबा म्हिगदेसे डन्दा थैःना लजी। ³ थेतबासेलमा माननीय थियोफिलस, डाइएनोन डाच्छाहेन्सेन जम्मान ताम म्हाइसी घोबासे लमा हाडला लागिरी मेलोसेन भिमा ज्यबा तला भिसी म्हन्जी। ⁴ तिग्दा भिसम हाडदा पाड्बा तामगदेरी सत्य ताम घोगै भिसी डाइ चु हाडला लागिरी भिबा हिन्ना।

बपतिसमा पिन्बा यूहन्ना न्हला भिसी पाड्बा ताम

⁵ यहूदिया यहुल्साला हेरोद ग्लेला धुइरी अबिया भिबा समूहरी परमेश्वरला मन्दिररी पूजा लबा जकरिया भिबा म्हि मुबा।

थेला म्रिड एलीशिबाएनोन परमेश्वरला मन्दिररी पूजा लबा हारूनना वंशरी न्हबा मुबा।* 6 परमेश्वरसे कुल्बा जम्मान ताम ड्यानबासे लमा थे न्हीनोन परमेश्वरला डाच्छा ज्यबा म्हि मुबा। 7 तर एलीशिबाग्याम कोला आतबासे लमा थे न्हीला कोलागदे आरेबा मुबा। थे न्हीला दिडएनोन निसी जिन्बा मुबा। 8 तिरेकुनु जकरिया हाडला समूहला पालोरी परमेश्वरला मन्दिररी पूजा लबान मुबा। 9 परमेश्वरला मन्दिररी पूजा लबा समूहला ठिम अन्छार चिट्टा युमा, परमप्रभुला मन्दिर न्हडरी वाड्सी धूप म्राबा गे जकरियाला मिनरी थोन्जी। 10 परमेश्वरला मन्दिर न्हडरी धूप म्राबा धुइरी महिला हुल मडग्यार प्रार्थना लसी चिबा मुबा। 11 धूप म्राबान लबा धुइरी जकरियासे धूप म्राबा ग्लाला दाहिनेपट्टि स्वर्गदूत खसी राप्सी चिबा म्राड्जी। 12 स्वर्गदूतदा म्राड्सी जकरिया आतेब तसी लोड्जी। 13 तर स्वर्गदूतसे थेदा “थालोड्गो जकरिया, तिग्दा भिसम परमेश्वरसे एला प्रार्थना सान्बा मुला। दाहेन्से एला म्रिड एलीशिबासे झा गिक न्हला। एसे थेला मिन यूहनना थान्गो। 14 थे न्हबा धुइरी ए ल्हानान ताड्ला, ओच्छे स्यूहानदो ल्हानान म्हिगदेएनोन ताड्ला। 15 तिग्दा भिसम थे परमप्रभुला डाच्छापट्टि घेन म्हि दोला। ओच्छे थेसे अडगुरला निडगुदेन खजिबै अर्गु ड्य्होइबा सहे आथुड्। थे आमाला फोरी खमाहेन्सेन परमेश्वरला आत्मा थेदेन छ्याम तला।* 16 थेसे ल्हानान इस्राएलीगदेदा परमप्रभु परमेश्वरला ग्यामरी दोःसी भला। 17 आबागदेला सेम कोलागदेपट्टि तना लबारी ओच्छे परमेश्वरसे कुल्बा ताम आड्यानबागदेदा परमेश्वरसे कुल्बा ताम ड्यानबा म्हिगदे हड्बा सहोसी प्रभुला ग्याम च्यासी चिबा यहुल सहोबाला लागिरी थे प्रभुला डाच्छा एलियाला आत्मादेन शक्तिरी भ्रला।*

18 जमाहेन्से जकरियासे स्वर्गदूतदा “डाइ चु ताम खाहड्

* 1:5 १ इति २४:१०

* 1:15 गन्ती ६:३

* 1:17 मला ४:५-६

लसी विश्वास लसे? तिग्दा भिसम डा खेप्बा दोसी जिन्जी ओच्छे डाला म्रिडलाएनोन दिड निसी जिन्बा मुला” भिसी भिमा, 19 स्वर्गदूतसे जकरियादा “डा परमेश्वरला डाच्छा राप्सी चिबा गब्रिएल हिन्ना। डादा परमेश्वरसे एदेन छ्याम ताम लबारी ओच्छे चु ज्यबा समाचार पाड्बारी पुइखबा हिन्ना।* 20 एसे डाइ पाड्बा ताम विश्वास आलबासे लमा चु ताम पूरा आततेधोना एसे ताम पाड्आखम। तर चु ताम ततोःबा धुइरी तनोन तला” भिसी भिजी।

21 जकरिया परमेश्वरला मन्दिर न्हडरी घइना चिबासे लमा मडग्यार जकरियादा भ्रान्सी चिबा म्हिगदेदा सुर्दा तजी। 22 थे परमेश्वरला मन्दिर न्हडग्याम मडग्यार थोन्सी खमा थेसे तिगै ताम पाड्आखम्नी। थेतबासेलमा मडग्यार मुबा म्हिगदेसे थेसे तिगै म्राड्जीनम भिसी म्हन्जी। जकरियासे थे म्हिगदेदा या लिपबान ताम लबारी छ्याइजी। ओच्छे थे ताम पाड्आखम्बाला आखम्बान तजी।

23 परमेश्वरला मन्दिर न्हडरी पूजा लतोःबा ह्वाडला पालो जिन्माहेन्से जकरिया दिमरी निजी। 24 तिगै धिन लिच्छा थेला म्रिड एलीशिबा न्हसेला तजी। जमाहेन्से एलीशिबा ला डाधोना दिम ख्लासी खानडएनोन आनिनी। 25 ओच्छे थेसे “दाहेन्से खालैसे डादा हेला थालगै भिसी परमेश्वरसे डादा दया लसी चु लबा हिन्ना” भिसी भिजी।

येशू न्हला भिसी पाड्बा ताम

26-27 गालील अञ्चलला नासरत भिबा नाम्सारी मरियम भिबा कन्याकेटी गिक मुबा। थेदा दाऊद ग्लेला वंशला योसेफ भिबा म्हिसे ब्याह लबारी ह्नीबा मुबा। एलीशिबा न्हसेला तबा ला दु तमा परमेश्वरसे गब्रिएल स्वर्गदूतदा मरियम मुबा ग्लारी पुइखजी।*

* 1:19 दानि ८:१६; ९:२१ * 1:26-27 मत्ती १:१८

28 जमाहेन्से स्वर्गदूत थे कन्याकेटी मुबा ग्लारी निसी, “लासूसो माइ, एदा परमेश्वरसे ल्हानान दयामाया लबा मुला। थेतबासेलमा एदेन छ्याम परमप्रभु मुला” भिसी भिजी।

29 स्वर्गदूतला ताम थे:सी मरियम उदेक तजी। ओच्छे “आहिन, चु तिग भिबा?” भिसी सेमरी म्हन्जी। 30 तर स्वर्गदूतसे थेदा “थालोङ्गो मरियम, तिग्दा भिसम परमेश्वरसे एदा ल्हानान मोलम पिन्बा मुला। 31 दाहेन्से ए न्हसेला तला ओच्छे एसे झा गिक न्हला। एसे थेला मिन येशू थान्गो।* 32 थे घेन म्हि दोला ओच्छे थेदा जम्मान भन्दा घेन परमेश्वरला झा भिला। परमप्रभु परमेश्वरसे थेदा दाऊदला यहुल्सारी शासन लबारी ग्ले सहोला। 33 थेसे सदनना लागिरी याकूबला वंशथोरी शासन लला। ओच्छे थेला शासन खाइमै आजिन” भिसी भिजी।*

34 स्वर्गदूतला चुहड्बा ताम थे:सी मरियमसे “चु खाहड् लसी तला? तिग्दा भिसम डाइ ब्याह लबान आरे” भिसी भिजी।

35 स्वर्गदूतसे मरियमदा “एथोरी परमेश्वरला आत्मा फेपखला। ओच्छे एसे जम्मान भन्दा घेन परमेश्वरला आत्माला शक्तिसे कोला न्हला। थेतबासेलमा थे कोलादा परमेश्वरला झा भिला। 36 च्यागो, एला हाडला म्हि एलीशिबादाएनोन दिड निबासे लमा कोला आन्ह भिसी भिमुबा। तर दान्दे थे न्हसेला तबा ला दु तबा मुला। 37 थेतबासेलमा परमेश्वरसे लआखम्बा गे तिगै आरे” भिसी मरियमदा जोहाब पिन्जी।*

38 ओच्छे मरियमसे स्वर्गदूतदा “डा परमेश्वरदा तेन्बा म्हि हिन्ना, डादा हाडसे भिबा हड्णोन तगै” भिसी भिमाहेन्से स्वर्गदूत निजी।

मरियम एलीशिबादा हुप तबारी निबा

* 1:31 मत्ती १:२१ * 1:33 २ शमू ७:१२; १३:१६; यशै ९:७ * 1:37 उत्प १८:१४

39 तिगै धिन लिच्छा मरियम योना योना लसी यहूदिया अञ्चलला गडपट्टिला नाम्सा गिकरी निजी। 40 ओच्छे जकरियाला दिमरी वाड्सी एलीशिबादा “लास्सो फ्याफुल्ला” भिजी। 41 मरियमसे लास्सो फ्याफुल्ला भिबा एलीशिबासे थे:माहेन्से एलीशिबाला फोरी मुबा कोला भोल्जी। ओच्छे एलीशिबाथोरी परमेश्वरला आत्मा फेपूखजी। 42 जमाहेन्से एलीशिबासे घेन काइ लसी, “मिडमहेमेगदे न्हडरी ए परमेश्वरग्याम मोलम याड्बा म्हि हिन्ना। ओच्छे एला फोरी मुबा कोलादाएनोन ल्हानान मोलम पिन्बा मुला। 43 खाल्ला दयासे लमा डा हड्बाला दिमरी डाला प्रभुला आमा खजी? 44 च्यागो, एसे लास्सो फ्याफुल्ला भिबा डाइ थे:मैछ्याम डाला फोरी मुबा कोला ताड्सी भोल्जी। 45 परमप्रभुसे सुड्बा ताम पूरा तला भिसी विश्वास लबासे लमा एसे परमेश्वरग्याम मोलम याड्बा मुला।” भिसी भिजी।

मरियमसे परमेश्वरदा धन्यवाद पिन्बा

46 ओच्छे मरियमसे चुहड् भिसी व्हाइ गोबारी छ्याइजी,
 “डाला परमप्रभु परमेश्वरदा जयजयकार तगै।”
 47 डादा थार्बा पिन्बा परमेश्वरदेन छ्याम डा सेमहेन्सेन ताड्बा मुला।
 48 तिग्दा भिसम परमेश्वरदा तेन्बा डा हड्बा जजा म्हिदाएनोन वास्ता लबा मुला।
 दाहेन्से जम्मान म्हिगदेसे डादा परमेश्वरग्याम मोलम याड्बा म्हि भिसी भिला।*
 49 तिग्दा भिसम जम्मान भन्दा घेन परमप्रभु परमेश्वरसे डाला लागिरी घेन गे लसी पिन्बा मुला।

* 1:46 १ शमू २:१-१० * 1:48 १ शमू १:११

परमप्रभुन परमेश्वर[†] हिन्ना।

50 परमेश्वरदा मान लबा म्हिगदेदा परमेश्वरसे जुकजुकधोनान दया लला।

51 ओच्छे सेमरी डा हड्बा खालै आरे भिसी भ्रबा म्हिगदेदा परमेश्वरसे हाडला शक्तिसे ससा बडबड तना लबा मुला।

52 शासन लबा म्हिगदेदा परमेश्वरसे थेला ग्लाग्याम तेःबा मुला। ओच्छे प्राडबोगदेदा परमेश्वरसे घेन म्हि सहोबा मुला।*

53 ओच्छे फोखेनबागदेदा परमेश्वरसे सदन ज्यबा ज्यबा सहे पिन्सी भ्रेन्ना लबा मुला।

तर फयुक्पो म्हिगदेदा तिगै आपिन्ना या थान्थान पुडबा मुला।

54 परमेश्वरसे हाडसे लबा दया ढन्सी हाडदा तेन्बा इस्राएलीगदेदा हो लबा मुला।

55 ओच्छे यहाडला आखे म्हेमेदा सुड्बा हड् अब्राहामदेन थेला सन्तानगदेदा जुकजुकधोनाला लागिरी दया लबा मुला।”*

56 मरियम ला सोमधोना एलीशिबादेन छ्यामनोन चिसी हाडला दिमरी निजी।

बपत्तिस्मा पिन्बा यूहन्ना न्हबा

57 ओच्छे एलीशिबासे कोला न्हबा धुड तसी थेसे झा न्हजी।

58 जमाहेन्से परमप्रभु परमेश्वरसे एलीशिबादा दया लबा मुला भिबा थेःसी थेला हाडला म्हिदेन खिमजेमगदे ल्हानान ताड्जी।

59 कोला न्हसी भ्रेःरे तमाहेन्से थेनीगदे थे कोलाला खतना लबारी खजी। ओच्छे थेनीगदेसे थे कोलाला मिन थेला आबाला हड्बान जकरिया थान्बारी छ्याइजी,* 60 तर थेला आमासे “आहिन, थेला

† 1:49 चु पदरी “परमप्रभु परमेश्वर” भिसी पाड्बा ताम ग्रीक बाइबलरी “थेला छान चोखो मुला” भिसी पाड्बा मुला। चुला मुल अर्थ चा थे जम्मान भन्दा घेन हिन्ना ओच्छे थे हड्बा स्यहान्दो खालै आरे भिबा हिन्ना। थेतबासेलमा जम्मासेन थेदा तेन्तोःला।

* 1:52 अय्यूब ५:११; १२:१९

* 1:55 उत्प १७:७

* 1:59 लेवी १२:३

मिन यूहन्ना थान्तोःला” भिसी भिमा, ⁶¹ थेनीगदेसे “थेहड्बा मिन एला हाडला म्हि न्हडरी खालैला आरे” भिसी भिजी।

⁶² जमाहेन्से थेनीगदेसे थेला आबादा झाला मिन तिग थान्बा भिसी या लिप्सी ड्योइमा, ⁶³ जकरियासे पाटी गिक ह्रीसी थे पाटीरी थेला मिन यूहन्ना हिन्ना भिसी भिजी। चुहड्बा म्राड्सी थेनीगदे जम्मान उदेक तजी। ⁶⁴ थेनोन धुइरी जकरियासे ताम पाड्बारी छ्याइजी। ओच्छे थेसे परमेश्वरदा धन्यवाद पिन्जी। ⁶⁵ चुहड् तबा म्राड्सी थेला खिमजेमगदे जम्मान उदेक तसी लोड्बा खजी। ओच्छे यहूदियाला गडरीक्यारला नाम्सा नाडनोन चु ताम थेःजी। ⁶⁶ चु ताम थेःबा जति जम्मासेन “लिच्छा चु कोला खाहड्बा तला” भिसी हाड हाडला सेमरी म्हन्जी। तिग्दा भिसम थे कोलादेन छ्याम परमेश्वर मुबा।

जकरियासे गोबा व्हाइ

⁶⁷ यूहन्नाला आबा जकरियाथोरी परमेश्वरला आत्मा फेपखजी। ओच्छे परमेश्वरला आत्मासे कुल्बा हड्बोन थेसे पाड्बारी छ्याइजी।

⁶⁸ “इसाएलीगदेला परमप्रभु परमेश्वरला जयजयकार तगै तिग्दा भिसम परमेश्वर फेपखसी हाडला म्हिगदेदा हो लसी पापग्याम फेबा मुला!

⁶⁹ परमेश्वरसे थेदा तेन्बा दाऊदला वंशरी
य्हाडदा थार्बा पिन्बा शक्तिशाली म्हि गिक पुड्खबा मुला।

⁷⁰⁻⁷¹ य्हाडला शत्रुगदेदेन य्हाडदा हेला लबागदेग्याम
थार्बा पिन्ना भिबा ताम

दडबोरीन परमेश्वरसे हाडला अगमवक्तागदेग्याम सुड्सी जिन्बा मुबा।

⁷² ओच्छे परमेश्वरसे य्हाडला आखे म्हेमेदेन छ्याम लबा हाडला कबुल ढन्सी

य्हाडदा दया लबा मुला।

73 थे कबुल परमेश्वरसे य्हाडला म्हेमे अब्राहामदेन छ्याम लबा मुबा।

74-75 थेतबासेलमा शत्रुगदेग्याम थार्बा याड्बाला लागिरी आलोड्ना य्हाड सोतेधोना परमेश्वरला डाच्छापट्टि ज्यबा म्हि दोसी य्हाडसे ज्यबा गे लसी परमेश्वरदा तेन्म्याड्गै।

76 डाला झा,

दाहेन्से एदा जम्मासेन जम्मान भन्दा घेन परमेश्वरला अगमवक्ता भिसी भिला।
तिग्दा भिसम ए प्रभुला डाच्छा डाच्छा निसी थेला ग्याम सहोला।*

77 ओच्छे पापला दोष मेटब तमाहेन्से थार्बा याड्बाला भिसी एसे परमेश्वरला म्हिगदेदा लोप्ला। 78 तिग्दा भिसम य्हाडला परमेश्वर दया लबा परमेश्वर हिन्ना।

थेतबासेलमा परमेश्वरसे य्हाड मुबा ग्लारी स्वर्गग्याम य्हाल पुइखला।

79 परमेश्वरसे धोपधोपरी भ्रबादेन सिला भिसी लोड्बा म्हिगदेदा य्हाल पिन्ना।

ओच्छे थेनोन य्हालसे य्हाडदा शान्तिला ग्यामरी भ्रपुड्ला।”*

80 यूहनना परमेश्वरला आत्माग्याम ज्ञान बुद्धि याड्बान घेन तबान निजी। ओच्छे इस्राएलीगदेला गुडरी परमेश्वरला य्हुलसाला समाचार थेःना लबा धुइ आततेधोना यूहनना तोडतोडबा ग्लारी चिजी।

* 1:76 मला ३:१ * 1:79 यशै ९:२

2

येशू न्हबा

मत्ती १:१८-२५

1 थे धुइरी रोमी ग्याल्बो कैसर अगस्टससे जम्मान य्हुल्साला म्हे झ्याबाला लागिरी जम्मालान मिन भ्रिउ भिसी कुल्जी।
2 सिरिया भिबा ग्लाला हाकिम कुरेनियस मुबा धुइरी चुहड् लसी म्हेगदे झ्याबा डाच्छा रेम तबा मुबा। 3 जमाहेन्से जम्मान म्हेगदे मिन भ्रिबारी हाड हाडला आखे म्हेमेला नाम्सारी निजी।

4 थे धुइरी योसेफ गालील अञ्चलला नासरत भिबा ग्लारी चिबा मुबा। थेएनोन हाडला मिन भ्रिबारी य्हूदिया अञ्चलला बेथलेहेम भिबा दाऊदला शहररी निजी। तिग्दा भिसम थे दाऊद ग्लेला वंशला मुबा। 5 ओच्छे योसेफसे हाडसे ब्याह लबारी छ्याइबा मरियमदाएनोन छ्यामनोन भोर्सी बेथलेहेमरी मिन भ्रिबारी निजी। थे धुइरी मरियम न्हसेला मुबा। 6 थेनीगदे बेथलेहेमरी मुमान मरियमसे कोला न्हबा धुइ तजी। 7 जमाहेन्से मरियमसे बेथलेहेमरीन हाडला थेबा झा न्हजी। थे झादा ल्हेथानरी रिल लसी म्हे मुइदा खोले पिन्बा डूँडरी नाइजी। तिग्दा भिसम थेनीगदेसे खजिबै दिमरी चिबा ग्ला आयाङ्नी।

गोठालोगदेसे लैनु येशूदा स्याप्बा

8 थे ग्लाला डामला पाडग्यालरी गोठालोगदे म्हुनड ग्युगदे खुड्सी चिबा मुबा। 9 थेनोन धुइरी थेनीगदेसे स्वर्गदूत गिक म्राङ्जी। ओच्छे थेनीगदेला क्युर्नोन परमेश्वरला स्हेरसे य्हाल य्हाल तजी। चुहड् तबा म्राङ्सी थेनीगदे लोङ्जी। 10 तर स्वर्गदूतसे थेनीगदेदा “थालोङ्गो! तिग्दा भिसम डाइ एनीगदेला लागिरी थार्बा पिन्बा समाचार भसी खबा मुला। चु समाचार जम्मान म्हेगदेला लागिरी हिन्ना। 11 तिनी दाऊदला शहररी एनीगदेदा पापग्याम थार्बा

पिन्बा म्हि गिक न्हबा मुला। थेनोन थार्बा पिन्बा स्त्रीष्ट प्रभु हिन्ना। 12 ओच्छे एनीगदेला लागिरी चिनु चा चु तला, एनीगदेसे कोला गिकदा ल्हेथानसे रिल लसी म्हे मुइदा खोले पिन्बा डूँडरी नाइसी थान्बा स्याप्ला।”

13 थेनोन धुइरी स्यूहान्दो स्वर्गदूतला हुल म्राड्जी। ओच्छे थे स्वर्गदूतगदेसे परमेश्वरदा धन्यवादला व्हाइ गोबारी छ्याइजी, 14 “स्वर्गरी धनछ्याबा परमेश्वरला जयजयकार, जम्बुलिडरी जुन म्हिदा परमेश्वरसे धम्बा मुला थेनीगदेदा शान्ति तगै!”

15 स्वर्गदूतगदे स्वर्गरी निमाहेन्से गोठालोगदेसे हाड हाड न्हडरी “लु, भ्रउ, य्हाडदा परमेश्वरसे सुड्बा चु ल्हेडमो च्याबारी बेथलेहेमरी निड” भिसी भिजी।

16 जमाहेन्से थेनीगदे योना योना लसी बेथलेहेमरी निजी। थेरी थेनीगदेसे मरियमदेन योसेफ ओच्छे लैनु कोलादा चा म्हे मुइदा खोले पिन्बा डूँडरी नाइसी थान्बा म्राड्जी। 17 जमाहेन्से थे कोलाला बारेरी थेनीगदेदा स्वर्गदूतसे पाड्बा ताम थेनीगदेसे जम्मान म्हिगदेदा थेःना लजी। 18 ओच्छे गोठालोगदेसे पाड्बा ताम थेःबा म्हिगदे जम्मान उदेक तजी। 19 तर मरियमसे चा चु जम्मान ताम म्हन्सी सेमरीन थान्जी। 20 ओच्छे स्वर्गदूतसे भिबा हड्दोनो म्राड्बासे लमा गोठालोगदेसे परमेश्वरदा घेन मानदेन जयजयकार लसी धन्यवादला व्हाइ गोबान निजी।

येशूदा परमेश्वरला मन्दिररी भोर्सी अर्पण लबा

21 थे कोला न्हसी भ्रेःरे तमा खतना लबा धुइरी थेला मिन येशू थान्जी। थेला मिन आमाला फोरी खबा भन्दा डाच्छान स्वर्गदूतसे पाड्बा मुबा।* 22 ओच्छे मोशाला ठिम अन्छार थेनीगदे चोख्याब लबा धुइ तमाहेन्से येशूदा थेला आबादेन आमासे परमप्रभुला

* 2:21 लेवी १२:३; लूका १:३१

डाच्छा अर्पण लबाला लागिरी यरूशलेमरी परमेश्वरला मन्दिररी भजी।* 23 परमप्रभुसे मोशादा पिन्बा ठिमरी भिबा अन्छार जम्मान भन्दा डाच्छा न्हबा झा परमप्रभुला लागिरी फेसी थान्तोःबा मुबा।* 24 ओच्छे परमेश्वरसे मोशादा पिन्बा ठिमरी मुबा अन्छार जोर गिक ढुकुर तसै जोर गिक परेवा तसै परमप्रभुदा फुल्तोःबासे लमा थेनीगदे बलि फुल्बारी खजी।

25 थे धुइरी यरूशलेमरी शिमियोन भिबा म्हि गिक मुबा। थे परमेश्वरसे म्हनबा अन्छार भ्रबादेन परमेश्वरदा तेन्बा म्हि मुबा। थेदा परमेश्वरसे इस्राएलीगदेदा थार्बा पिन्बा म्हि पुइखला भिसी सुड्बा ताम पूरा लला भिसी भ्रान्सी चिबा मुबा। 26 ओच्छे “थार्बा पिन्बा ख्रीष्टदा आम्राड्तेधोना ए आसि” भिसी परमेश्वरला आत्मासे डाच्छान थेदा पाड्बा मुबा। 27 परमेश्वरला आत्मासे कुल्बा हड् शिमियोन परमेश्वरला मन्दिररी निजी। थे धुइरी येशूला आबादेन आमासे परमेश्वरसे मोशादा पिन्बा ठिम अन्छार तिग लतोःबा मुबा, थे लबारी येशूदा परमेश्वरला मन्दिररी भसी खजी। 28 जमाहेन्से शिमियोनसे लैनु येशूदा कुरी किन्सी परमेश्वरदा धन्यवाद पिन्सी चुहड् भिजी,

29 “परमप्रभु हाडसे सुड्बा ताम पूरा तबा मुला। दाहेन्से हाडदा तेन्बा म्हि डा सिसै ढुकुक मुला।

30 तिग्दा भिसम हाडसे कबुल लबा हड् नोन थार्बा पिन्बा ख्रीष्टदा डाइ म्राड्सी जिन्बा मुला।

31 चु कोलादा हाडसे जम्मान म्हिगदेला लागिरी पुइखबा हिन्ना।

32 अर्गु यहुलला म्हिगदेदा ख्रीष्टसेन हाडला ग्याम उन्ना, ओच्छे चुसे लमा इस्राएलीगदेसे मान याड्ला।”*

* 2:22 लेवी १२:६-८
५२:१०

* 2:23 प्रस्था १३:२, १२

* 2:32 यशै ४२:६; ४९:६;

33 ओच्छे शिमियोनसे लैनु येशूला बारेरी पाङ्बा ताम थेःसी येशूला आबादेन आमा उदेक तजी। 34 जमाहेन्से शिमियोनसे मरियमदा मोलम पिन्बान भिजी, “च्यागो, चु लैनु इस्राएलीगदेदा थार्बा पिन्बादेन नाश लबाला लागिरी परमेश्वरसे पिन्बा चिनु हिन्ना। थेदा ल्हानान म्हिगदेसे बिरोध लला। 35 थेतबासेलमा ल्हानान महिला सेमरी म्हन्बा तामगदे परमेश्वरसे उन्ना। ओच्छे एला सेमरी ल्हानान दुख तला।”

36-37 थेरी आशेर वंशला फनुएलला झामे हन्ना भिबा बोगल बलिसे बलि दिड तबा म्रिडम्हेमे गिक मुबा। थे अगमवक्तास्या मुबा, ब्याह तसी निस दिड तमा थेला हेम्बो सिजी। ओच्छे थे फोइथान चिसी धिन म्हूननोन परमेश्वरला मन्दिररी प्रार्थना लबान परमेश्वरदा तेन्मुबा। 38 थेनोन धुइरी हन्ना खसी परमेश्वरदा धन्यवाद पिन्जी। ओच्छे थेसे परमेश्वरसे यरूशलेमदा पापग्याम फेबा धुइदा भ्रान्सी चिबा म्हिगदेदा थे कोलाला बारेरी पाङ्सी पिन्जी। 39 जमाहेन्से थेनीगदेसे परमेश्वरसे मोशादा पिन्बा ठिम अन्छार लतोःबा जम्मान गे जिन्ना लसी गालील अञ्चलला हाडलान नासरत शहररी निजी।* 40 लैनु येशू घेन घेन तबान खमाहेन्से थेला बुद्धिऱेनोन खजी। तिग्दा भिसम परमेश्वरला मोलम थेदेन छ्याम मुबा।

येशूसे यहूदी धर्मगुरुगदेदेन छ्याम ताम लबा

41-42 मिश्र यहुल्साग्याम फेसी खबा धिनदा ढन्सी धङ्बा चाडरी चाडला ठिम अन्छार येशूला आबा आमा दिडएदडसे यरूशलेमरी निबा लमुबा। थेतबासेलमा येशू च्युक न्ही दिड तमाऱेनोन येशूला आबादेन आमासे येशूदा छ्यामनोन भोर्सी यरूशलेमरी निजी।* 43 चाड धङ्सी जिन्माहेन्से थेनीगदे दिमरी निजी। तर येशू चा

* 2:39 मती २:२३ * 2:41-42 प्रस्था १२:१-२७; वयव १६:१-८

यरूशलेमरीन धन्छ्याजी। चु ताम थेला आबादेन आमासे था आयाङ्नी। 44 येशूला आबादेन आमासे येशू म्हिला हुलरी मुला तला भिसी म्हनसी तिरैला ग्याम भ्रसी निजी। ओच्छे थेनीगदेसे येशूदा ह्याडला म्हिदेन डोसेबा म्हिगदे मुबा ग्लारी निसी म्हाइजी, 45 तर आस्यापबासे लमा थेनीगदे थेदा म्हाइबान यरूशलेमरी दोःसी खजी। 46 थेनीगदेसे सोमरेरी येशूदा परमेश्वरला मन्दिररी स्यापजी। थेरी थे यहूदी धर्मगुरुगदेदेन छ्याम धन्छ्यासी थेनीगदेसे पाड्बा ताम ड्यान्सी, ड्योइबा छाबा लसी धन्छ्याबा मुबा। 47 थेरी येशूला ताम ड्यान्सी चिबागदे येशूसे ताम घोसी जोहाब पिन्बा म्हाडसी उदेक तबा मुबा। 48 येशूला आबादेन आमासे थेदा म्हाडसी उदेक म्हनसी थेला आमासे “च्यागो झा, एला आबादेन डा एदा म्हाइमा म्हाइमा हैरान तजी, एसे चुहड् तिग लबा?” भिमा, 49 येशूसे थेनीगदेदा “ह्याडनीसे डादा तिग्दा म्हाइबा? डा डाला आबाला दिमरी चितोःबा भिसी ह्याडनीदा था आरे?” भिसी सुड्जी। 50 तर थेला आबादेन आमासे चु ताम आघोनी।

51 जमाहेन्से येशू ह्याडला आबा आमादेन छ्यामनोन नासरतरी फेपजी। ओच्छे ह्याडला आबा आमासे पाड्बा ताम ड्यान्सी धन्छ्याजी। तर थेला आमासे चु जम्मान ताम ह्याडला सेमरीन थान्जी। 52 ओच्छे येशू परमेश्वरदेन म्हिगदेला दयामायारी घेन घेन तमाहेन्से बुद्धिनोन बढब तबान निजी।*

3

बपत्तिसमा पिन्बा यूहन्ना

मत्ती ३:१-१२; मर्कूस १:१-८; यूहन्ना १:१९-२८

1 रोमी ग्याल्बो कैसर तिबेरियाससे शासन लबा च्युक डा दिड तमा पन्तियस पिलातस भिबा म्हि यहूदिया अञ्चलला हाकिम

* 2:52 १ शमू २:२६; हितो ३:४

मुबा। जमा धुइरी हेरोद गालील अञ्चलला ग्ले मुबा, ओच्छे थेला आले फिलिप इतुरियादेन त्राखोनितिस भिबा ग्लाला ग्ले मुबा, थेहड् लसीन लुसानियास अबिलेने अञ्चलला ग्ले मुबा।² ओच्छे हननासदेन कैयाफा परमेश्वरला मन्दिररी पूजा लबा मुल म्हि मुबा। थेनोन धुइरी परमेश्वरसे जकरियाला झा तोडतोडबा ग्लारी चिबा यूहन्ना मुबा ग्लारी हाडला बचन पुडखजी।³ यूहन्नासे म्हिगदेदा हाड हाडला पाप ख्लासी परमेश्वरपट्टि दोःगो, ओच्छे बपत्तिस्मा किन्गो। जमाहेन्से परमेश्वरसे एनीगदेला पापला दोष मेटब लला भिबान थार्बा पिन्बा समाचार थेःना लबान यर्दन स्योडला क्यारमारला जिल्लारीक्यार खजी।⁴ चु ताम यशैया भिबा अगमवक्तासे चुहड् लसी भिबा मुबा,
 “तोडतोडबा ग्लारीक्यार म्हि गिक क्रिड्बान चुहड् भिसी भ्रला,
 “परमप्रभुला ग्याम तयार लउ,
 ओच्छे परमप्रभु भ्रबाला लागिरी थेला ग्याम सोजो सहोउ,
⁵ मुबा जे गडदेन होपगदे सम्म सहोला,
 ओच्छे काडलाड कुडलीडबा ग्यामगदे सोजो तला
 ओच्छे पगल पोगल मुबा ग्लाएनोन सम्म तला।
⁶ जमाहेन्से जम्मान म्हिगदेसे परमेश्वरसे पिन्बा थार्बा
 म्नाड्ला।”*

⁷ थेतबासेलमा यूहन्नासे बपत्तिस्मा किन्बारी खबा म्हिगदेदा चुहड् भिसी पाड्जी, “पुख्रीला कोलागदे, एनीगदेदा परमेश्वरला बोमोग्याम स्योरम्याड्ला भिसी खाल्से भिजी?”⁸ चुदे एनीगदे हाड हाडला पाप ख्लासी परमेश्वरपट्टि दोःबान हिन्सम परमेश्वरदा सेम निबा गे लउ, ओच्छे एनीगदे हाड हाड न्हडरी डनी अब्राहामला कोलागदे भिसी पाड्बारी थाम्हाइगो। तिग्दा भिसम परमेश्वरसे अब्राहामला लागिरी चु युडबागदेग्यामसेनोन

* 3:6 यशै ४०:३-५ * 3:7 मत्ती १२:३४; २३:३३

कोलागदे सहोबारी खम्ला। 9 च्यागो, दोड थाबारी तरी थीसी जिन्बा मुला। थेतबासेलमा ज्यबा रो आरोबा जम्मान दोड टाहेन्सेन थासी मेरी फर्ला।”*

10 जमाहेन्से म्हिगदेसे यूहन्नादा “थेहड् भिसम दाहेन्से डन्से तिग लउ?” भिसी ड्योइमा, 11 यूहन्नासे थेनीगदेदा “जुन म्हिदेन छ्याम सहुर्दम न्ही मुला थेसे आरेबा म्हिदा पिन्गै, ओच्छे जुन म्हिदेन छ्याम चबा सहे मुला थेसे आरेबागदेदा भो लसी पिन्गै” भिसी जोहाब पिन्जी।

12 ओच्छे तिरो दुइबा म्हिगदेएनोन यूहन्ना मुबा ग्लारी बपतिसमा किन्बारी खसी, “गुरु, डन्से चा तिग लउ?” भिसी ड्योइजी।*

13 यूहन्नासे थेनीगदेदा “एनीगदेसे तिरो दुइमा सरकारसे तोगब लबा भन्दा लहाना थाकिन्गो” भिसी भिजी।

14 ओच्छे सिपाहीगदेएनोन खसी, “डन्से चा तिग लउ?” भिसी ड्योइजी। यूहन्नासे थेनीगदेदा “खालैदा अत्याचार लसी आहिन्बा तामदा हिन्ना भिसी टाडगा थाकिन्गो, ह्याडला खतोःबा जे टाडगा किन्सी सन्तोक लसी चिउ” भिसी भिजी।

15 जमा धुइरी म्हिगदेसे थार्बा पिन्बा ख्रीष्ट फेप्खला भिसी आश लसी चिबा मुबा। थेतबासेलमा थेनीगदेसे यूहन्नादा म्राड्सी चुनोन ख्रीष्ट हिन्ना वा भिसी सेमरी म्हन्सी चिबा मुबा। 16 तर यूहन्नासे थेनीगदेदा “डाइ एनीगदेदा क्युइसे बपतिसमा पिन्ना। तर डा भन्दा शक्तिशाली फेप्खबान मुला डा थेला लखमला तुना बलबाधोनाला आरे। थेसे एनीगदेदा परमेश्वरला आत्मादेन मेसे बपतिसमा पिन्ना। 17 ग्वा य्हाप्बा नाख्ले थेलान छ्यारी मुला। थेसे खलारी ग्वा ज्यना लसी य्हाप्सी ग्वा जति भकारीरी युला। ओच्छे पोलोवा जति खाइमै आसिबा मेरी खाड्ला” भिसी

* 3:9 मत्ती ७:१९ * 3:12 लूका ७:२९

भिजी। 18 चुहड् लसी यूहन्नासे अर्गु ल्हानान अर्ती पिन्सी, लोप्सी म्हिगदेदा परमेश्वरला यहुल्साला समाचार थेःना लजी। 19 तर हेरोद ग्लेसे हाडला आले चाड हेरोदियास भिबादा थान्बासे लमा थेला जम्मान पाप गे म्राड्सी यूहन्नासे थेदा बड्बा मुबा। 20 थेतबासेलमा थेसे यूहन्नादा झ्याल्खानरी झाड्सी पापथोरी झन पाप गे लजी।*

येशूसे बप्तिस्मा किन्बा

मत्ती ३:१३-१७; मर्कुस १:९-११; यूहन्ना १:३२-३४

21 म्हिगदेसे बप्तिस्मा किन्बान लबा धुइरी येशूसेनोन बप्तिस्मा किन्जी। थेसे प्रार्थना लबान लबा धुइरी स्वर्ग ठोड्बा म्राड्जी। 22 ओच्छे परमेश्वरला आत्मा थेथोरी दुकुर हड् लसी फापखजी। ओच्छे स्वर्गग्याम “ए डाइ सेमहेनसे माया लबा डाला झा हिनना, ए म्राड्सी डा ल्हानान ताड्बा मुला” भिबा काइ खजी।*

येशूला आखे म्हेमे

मत्ती १:१-१७

23 येशूसे हाडला गे लबारी छ्याइबा धुइरी येशू बोगल गिकसे च्युइ दिड तबा मुबा।

जममान म्हिगदेसे येशू योसेफलान झा भिसी म्हन्बा मुबा।

योसेफ एलीला झा मुबा।

24 एली मत्तातला झा,

मत्तात लेवीला झा,

लेवी मल्कीला झा,

मल्की यान्नाला झा,

यान्ना योसेफला झा,

25 योसेफ मत्ताथियासला झा,

मत्ताथियस आमोसला झा,

* 3:20 मत्ती १४:३-४; मर्कु ६:१७-१८
लूका ९:३५

* 3:22 उत्प २२:२; भजन २:७; यशै ४२:१;

आमोस नहूमला झा,
 नहूम इसलीला झा,
 इसली नग्गैला झा,
 26 नग्गै माथला झा,
 माथ मत्ताथियासला झा,
 मत्ताथियस सेमैनला झा,
 सेमैन योसेखला झा,
 योसेख योदाला झा,
 27 योदा योआननला झा,
 योआनन रेसाला झा,
 रेसा यरुबाबेलला झा,
 यरुबाबेल शालतिएलला झा,
 शालतिएल नेरीला झा,
 28 नेरी मल्कीला झा,
 मल्की अद्दीला झा,
 अद्दी कोसामला झा,
 कोसाम एलमादमला झा,
 एलमादम एर्ला झा,
 29 एर् यहोशूला झा,
 यहोशू एलीएजरला झा,
 एलीएजर योरीमला झा,
 योरीम मत्तातला झा,
 मत्तात लेवीला झा,
 30 लेवी शिमियोनला झा,
 शिमियोन यहूदाला झा,
 यहूदा योसेफला झा,
 योसेफ योनानला झा,
 योनान एल्याकीमला झा,
 31 एल्याकीम मलेआला झा,

मलेआ मिन्नाला झा,
 मिन्ना मत्ताथाला झा,
 मत्ताथा नातानला झा,
 नातान दाऊद ग्लेला सन्तान,
 32 दाऊद यिशैला झा,
 यिशै ओबेदला झा,
 ओबेद बोअजला झा,
 बोअज सल्मोनला झा,
 सल्मोन नहशोनला झा,
 33 नहशोन अम्मीनादाबला झा,
 अम्मीनादाब आरामला झा,
 आराम हेस्रोनला झा,
 हेस्रोन फारेसला झा,
 फारेस यहूदाला झा,
 34 यहूदा याकूबला झा,
 याकूब इसहाकला झा,
 इसहाक अब्राहामला झा,
 अब्राहाम तेरहला झा,
 तेरह नाहोरला झा,
 35 नाहोर सरूगला झा,
 सरूग रऊला झा,
 रऊ पेलेगला झा,
 पेलेग एबेरला झा,
 एबेर शेलहला झा,
 36 शेलह केनानला झा,
 केनान अर्पक्षदला झा,
 अर्पक्षद शेमला झा,
 शेम नोआला झा,
 नोआ लेमेखला झा,
 37 लेमेख मतूशेलहला झा,

मतूशेलह हनोकला झा,
 हनोक येरेदला झा,
 येरेद महलालेलला झा,
 महलालेल केनानला झा,
 38 केनान एनोशला झा,
 एनोश शेतला झा,
 शेत आदमला झा,
 आदम परमेश्वरला झा मुबा।

4

शैतानसे येशूदा सेम फसब लबारी म्हाइबा

मत्ती ४:१-११; मर्कूस १:१२-१३

1 परमेश्वरला आत्मा येशूथोरी फेप्खमाहेन्से येशू यर्दन स्योडग्याम दोःजी। ओच्छे परमेश्वरला आत्मासे थेदा तोडतोडबा ग्लारी भोर्जी। 2 थेरी शैतानसे येशूदा बोगल न्ही धिनधोना फसब लबारी म्हाइजी। ओच्छे बोगल न्ही धिनधोना येशूसे तिगै आसोल्नी। थेतबासेलमा येशूदा ल्हानान फोखेन्जी। 3 थेनोन धुइरी शैतानसे येशूदा “हाड परमेश्वरला झा हिनबान हिनसम चु युडबादा गेड सहोउ” भिसी भिजी। 4 ओच्छे येशूसे शैतानदा “गेडसे जे म्हि आसो भिसी बचनरी भिबा मुला” भिसी सुड्जी।*

5-6 जमाहेन्से शैतानसे येशूदा नोबा गडरी भोर्सी जम्बुलिडला जम्मान यहूलसागदे उन्बान, “डाइ हाडदा चु जम्मान यहूलसाला ग्लेदेन चु जम्मान धन सम्पत्तिला मालिक सहोला, तिगदा भिसम चु जम्मान डादा पिन्बा मुला। ओच्छे डाला सेमसे म्हन्बादा डाइ पिन्ना। 7 थेतबासेलमा हाडसे डादा फ्या लजी भिसम चु जम्मान हाडला तला” भिसी भिमा, 8 येशूसे थेदा “बचनरी चुहड् भिसी भिबा

* 4:4 वयव ८:३

मुला, 'एसे हाडला परमप्रभु परमेश्वरदा फ्या लउ, ओच्छे थेदा जे तेन्गो' " भिसी सुड्जी।*

9 दोःसी शैतानसे येशूदा यरूशलेमरी भोर्सी परमेश्वरला मन्दिरला थोबोरी रापपुड्जी। ओच्छे थेसे येशूदा चुहड् भिसी भिजी, "हाड पक्कान परमेश्वरला झा हिन्सम चु ग्याम मार छ्योड्गो, 10 तिग्दा भिसम बचनरी चुहड् भिसी भिबा मुला, 'परमेश्वरसे हाडदा जोगब लबाला लागिरी हाडला स्वर्गदूतगदेदा कुल्ला।*

11 ओच्छे एला काड युडबारी थाठोक्गै भिसी थेनीगदेसे एदा या यारीन ताला' भिसी भिबा मुला।"*

12 तर येशूसे थेदा "बचनरी चुहड्बाएनोन भिबा मुला, 'एसे हाडला परमप्रभु परमेश्वरला सेम च्याबा गे तिगै थालउ' " भिसी सुड्जी।* 13 जमाहेन्से शैतानसे येशूदा तिगै लसी फसब लबारी आखम्बासे लमा दोःसी मौका आयाड्तेधोना थेसे येशूदा ख्लासी निजी।

येशूसे म्हिगदेदा लोप्बारी छ्याड्बा

मत्ती ४:१२-१७; मर्कूस १:१४-१५

14 जमाहेन्से परमेश्वरला आत्माला शक्तिरी येशू गालील अञ्चलरी दोःसी फेप्खजी। ओच्छे थेला बारेरी क्यारमारला जम्मान ग्लारी थेःजी। 15 येशू यहूदीगदे हुप तबा दिम दिमरी फेप्सी म्हिगदेदा लोप्बारी छ्याड्जी। जमाहेन्से जम्मान म्हिगदेसे थेला जयजयकार लजी।

नासरतरी येशूला ताम पत्याब आतबा

मत्ती १३:५३-५८; मर्कूस ६:१-६

* 4:8 व्यव ६:१३
व्यव ६:१६

* 4:10 भजन ९१:११

* 4:11 भजन ९१:१२

* 4:12

16 जमाहेन्से येशू हाड छर्बा नासरत नाम्सारी फेपूखजी। ओच्छे थे सदन हड लसी बलपूबा न्हबा धिनकुनु यहूदीगदे हुप तबा दिमरी फेपूसी परमेश्वरला बचनग्याम पढब लबारी छ्याइजी।

17 ओच्छे थेदा यशैया अगमवक्तासे भिबा किताब पढब लबाला लागिरी पिन्जी। जमाहेन्से थे ठोड्सी चुहड् भिसी भिबा ग्ला तेःसी पढब लजी।

18 “परमप्रभु परमेश्वरला आत्मा डादेन छ्याम मुला।

तिग्दा भिसम प्राडबोगदेदा परमेश्वरला यहुल्साला समाचार थेःना लबारी

ओच्छे झ्याल्खानरी मुबागदेदा परमेश्वरला यहुल्साला समाचार थेःना लसी झ्याल्खानग्याम तेःबारी,

मी आम्राड्बागदेदा मी म्राड्ना लबारी

ओच्छे दुखरी मुबागदेदा दुखग्याम फेबारी,*

19 थेहड् लसीन हाडला म्हिगदेदा परमेश्वरसे थार्बा पिन्बा धुइ खसी जिन्बा मुला भिसी

थेःना लबारी परमेश्वरसे डादा धम्सी पुइखबा हिन्ना।”

20 जमाहेन्से येशूसे किताब बन्द लसी थेरी मुबा म्हिदा पिन्सी धन्छ्याजी। यहूदीगदे हुप तबा दिमरी मुबा जम्मान म्हिगदेसे येशूदा च्यासी चिबा मुबा। 21 ओच्छे येशूसे थेनीगदेदा “परमेश्वरला बचनरी भिबा चु ताम तिनी एनीगदेसे झ्यानना झ्याननान पूरा तबा मुला” भिसी सुड्जी। 22 येशूसे सुड्बा दयामायाला ताम थेःसी थेनीगदे उदेक म्हन्सी जम्मासेन थेला तामदा ज्यबा भिजी। ओच्छे “चु योसेफला झा आहिन?” भिसी थेनीगदेसे भिजी।

23 येशूसे थेनीगदेदा “एनीगदेसे डादा पक्कान चु उखान भिला ‘डाक्टर, हाडसे हाडदान खम्ना लउ। एसे कफर्नहुमरी उदेकला गे लजी भिसी डन्से थेःमुबा थे गे एसे हाडला नाम्सारीनोन लउ’ भिसी

* 4:18 यशै ६१:१-२

पाङ्ला” भिसी सुङ्जी। ²⁴ दोःसी येशूसे थेनीगदेदा चुहङ् भिसी सुङ्जी, “च्यागो, खजिबै अगमवक्तादा हाडलान नामसारी मान आल।* ²⁵ तर ड्यान्गो, चु सत्य हिनना। तिग्दा भिसम एलियाला धुइरी इस्राएलरी हेम्बो सिबा म्रिडम्हेमेगदे ल्हानान मुबा। थे धुइरी सोम दिडसे ला दुधोना नाम आखबासे लमा यहुल्सा नाडनोन अनिकाल तबा मुबा।* ²⁶ तर परमेश्वरसे एलियादा स्यहान्दो खालै मुबा ग्लारी आपुइना सीदोनला सारपत भिबा नामसारी मुबा हेम्बो सिबा म्रिडम्हेमे मुबा ग्लारी जे पुङ्जी।* ²⁷ थेहङ् लसीन एलीशा अगमवक्ताला धुइरीएनोन इस्राएलरी कोरे खबा म्हिगदे ल्हानान मुबा। तर थेनीगदे न्हडरी सिरिया यहुल्साला नामान भिबा कोरेला जे कोरे म्हाजी। तर स्यहान्दो म्हिगदे खालैलान आमहानी।”*

²⁸ चु ताम थेःसी यहूदीगदे हुप तबा दिमरी मुबा जम्मान म्हिगदेदा बोमो खजी। ²⁹ जमाहेन्से थेरी मुबा म्हिगदेसे येशूदा शहरग्याम मङ्ग्यार तेःजी। थे शहर गडरी मुबा, थेतबासेलमा थेनीगदेसे येशूदा गडला जोरी भोर्सी हिल्ना लबारी छ्याइजी। ³⁰ तर येशू थे म्हिगदेला गुङ्ग्याम थोन्सी फेपजी।

येशूसे म्हड ताप्बा

मर्कस १:२१-२८

³¹ जमाहेन्से येशू गालीलला कफर्नहुम भिबा शहररी फेपजी। ओच्छे बलप्बा न्हबा धिनकुनु म्हिगदेदा परमेश्वरला बचनग्याम लोप्वारी छ्याइजी। ³² येशूसे लोप्वबा म्राङ्सी थेनीगदे उदेक तजी। तिग्दा भिसम येशूसे अधिकार लसी म्हिगदेदा लोप्वबा मुबा।* ³³ यहूदीगदे हुप तबा दिम न्हडरी म्हडसे स्याप्वबा म्हि गिक मुबा। थे म्हडसे स्याप्वबा म्हिसे क्रिड्वान, ³⁴ “नासरतला येशू, हाडसे डन्दा तिग लबारी छ्याइबा? तिग हाड डन्दा साइबारी फेप्वबा

* 4:24 यूह ४:४४ * 4:25 १ राजा १७:१ * 4:26 १ राजा १७:८-१६ * 4:27
२ राजा ५:१-१४ * 4:32 मत्ती ७:२८-२९

हिन्ना? हाड परमेश्वरसे पुइखबा परमेश्वरला म्हि भिसी डादा था मुला” भिसी भिजी।

35 चुहड् भिबा थेःसी येशूसे थे म्हडदा बड्बान, “कुटिसी चिउ! थे म्हिग्याम थोन्सी निउ!” सुड्मैछ्याम थे म्हिदा जम्मान महिला ओन्छाडरी लछार पछार लसी थोन्सी निजी, तर थे म्हिदा तिगै आतनी। 36 चु म्राड्सी जम्मान म्हिगदे उदेक म्हन्सी, “चु महिला बोली बचनरी खाहड्बा अधिकार चीम, थेला अधिकारदेन शक्तिसे कुल्मैछ्याम म्हडगदे थोन्सी यार्बा चीम!” भिसी भिजी। 37 ओचछे येशूसे लबा गे कफर्नहुम शहरला क्यारमारला जम्मान ग्लारी थेःजी।

येशूसे ल्हानान म्हिगदेदा खम्ना लबा
मत्ती ८:१४-१७; मर्कूस १:२९-३४

38 येशू यहूदीगदे हुप तबा दिमग्याम थोन्सी सिमोनना दिमरी फेप्जी। थेरी सिमोनना स्युमी छवा खसी आखम्बा मुबा। ओचछे दिमरी मुबागदेसे “थेदा खम्ना लसी पिन्गो” भिसी बिन्ती लजी। 39 जमाहेन्से येशू सिमोनना स्युमीला डामरी फेप्सी छवादा म्हासी निउ भिसी सुड्मा थेला छवा म्हाजी। ओचछे सिमोनना स्युमी तुरुन्तन रेःसी थेनीगदेदा क्योड्बारी छ्याइजी।

40 ओचछे धिनी घल्माहेन्से म्हिगदेसे ल्हानान थरीला रोगसे स्यापबा म्हिगदेदा येशू मुबा ग्लारी भजी। जमाहेन्से येशूसे थेनीगदेशोरी हाडला या थान्सी थेनीगदे जम्मादान खम्ना लजी। 41 जमाहेन्से ल्हानान म्हिगदेला ल्हुइग्याम म्हडगदे चुहड् भिबान क्रिड्सी थोन्जी, “हाड परमेश्वरला झा हिन्ना।” तर येशूसे थे म्हडगदेदा बड्बान दोःसी तिगै ताम पाड्आपुड्नी। तिग्दा भिसम येशू थार्बा पिन्बा ख्रीष्ट हिन्ना भिसी थे म्हडगदेसे डोसेबा मुबा।

येशूसे परमेश्वरला यहूल्साला समाचार थे:ना लबा

मर्कूस १:३५-३९

42 स्यूहो तमाहेन्से येशू सुनसान ग्लारी फेपजी। जमाहेन्से महिला हुलसे म्हाइबान येशू मुबा ग्लारी धोखजी। ओच्छे थेनीगदेसे येशूदा “डन्दा ख्लासी थाफेपगो” भिसी रोकब लबारी म्हाइजी। 43 तर येशूसे थेनीगदेदा “डाइ अर्गु ग्लागदेरीएनोन परमेश्वरला यहूल्साला समाचार थे:ना लतो:बा मुला। तिग्दा भिसम परमेश्वरसे डादा चुलान लागिरी पुइखबा हिन्ना” भिसी सुड्जी। 44 जमाहेन्से येशू यहूदियाला यहूदीगदे हुप तबा दिमगदेरी फेप्सी थाबा पिन्बा समाचार थे:ना लजी।

5

येशूसे डाच्छा धम्बा चेलागदे

मत्ती ४:१८-२२; मर्कूस १:१६-२०; यूहनना १:४०-४२

1 परमेश्वरला बचन ड्यान्बाला लागिरी ल्हानान म्हिगदे येशूला क्युर्सीन तोर हुइ मार हुइ लबान मुबा। थेतबासेलमा येशू गनेसरेत भिबा घ्योइला कुनीरी राप्सी धन्छ्याबा मुबा। 2 ओच्छे येशूसे घ्योइला कुनीरी दोंगा न्ही म्राड्जी। थे धुइरी माझीगदे दोंगा ख्लासी हाड हाडला घ्याड खुबान मुबा। 3 थेरी मुबा दोंगा गिक चा सिमोनना मुबा। येशू सिमोनना दोंगारी क्रे:सी, “दोंगा जजाकी क्याथाड भोर्गो” भिसी सिमोनदा सुड्जी। थे दोंगारी धन्छ्यासी म्हिगदेदा लोप्बारी छ्याइजी।*

4 लोप्सी जिन्माहेन्से येशूसे सिमोनदा “दोंगा नुपबा ग्लारीक्यार भोर्गो, ओच्छे तार्डा चुड्बारी घ्याड रोपगो” भिसी सुड्जी। 5 चु थे:सी सिमोनसे येशूदा “गुरु, डन्से म्हुन गिक घ्याड क्लाड्सेनोन तार्डा गिकनोन आस्यापनी। तर हाडसे कुल्बासे लमा डाइ घ्याड

* 5:3 मत्ती १३:१-२; मर्कू ३:९-१०; ४:१

रोप्ला” भिसी भिजी।* 6 ओच्छे थेनीगदेसे घ्याड रोपमाहेन्से तार्डा ल्हानान स्यापबासे लमा घ्याडनोन ढेबारी छ्याइजी।* 7 थेतबासेलमा थेनीगदेसे अर्गु दोंगारी मुबा ह्वाडला ह्योगदेदा गुहार हीजी। जमाहेन्से थेनीगदे खसी तार्डा तेःबारी छ्याइजी। तार्डा तेःमा तेःमा दोंगा न्हीरीन तार्डा ल्हानान तबासे लमा दोंगा न्हीनोन डुबब तबारी छ्याइजी।

8 चु म्राइसी सिमोन पत्रुससे येशूला स्यहापरी फ्या लसी, “प्रभु, डा पापी म्हि हिन्ना। थेतबासेलमा ह्वाड डा मुबाग्याम फेपगो” भिसी भिजी। 9 तिग्दा भिसम ल्हानान तार्डा स्यापबासे लमा सिमोनदेन थेला ह्योगदे उदेक तजी। 10 ओच्छे सिमोनदेन छ्याम ढिकसी गे लबा जब्दियाला झागदे याकूबदेन यूहन्नादाएनोन ल्हानान उदेक तजी। जमाहेन्से येशूसे सिमोनदा “थालोङ्गो, दाहेन्से ए तार्डा चुड्बा म्हि आहिन, तर एसे म्हिगदेदा परमेश्वर मुबा ग्लारी भला” भिसी सुइजी। 11 जमाहेन्से थेनीगदेसे दोंगा घ्योइला कुनीरी भसी ह्वाडेन छ्याम मुबा जम्मान सहेगदे ख्लासी येशूदेन छ्याम भ्रजी।

येशूसे कोरे खबा म्हिदा खम्ना लबा

मत्ती ८:१-४; मर्कूस १:४०-४५

12 तिरेकुनु येशू शहर गिकरी मुबा। ओच्छे थेनोन शहररी मुबा कोरे खबा म्हि गिकसे येशूदा म्राइजी। जमाहेन्से थे येशूला डामरी खसी फ्या लबान, “प्रभु, ह्वाडला सेम मुसम ह्वाडसे डादा खम्ना लखम्ला” भिसी भिमा, 13 येशूसे थेदा ह्वाडला छ्यासे थुर्सी, “ए खमगै भिबा डाला सेम मुला, ए खमगो” भिसी सुइमैछ्याम थेला कोरे म्हाजी। 14 जमाहेन्से येशूसे थेदा “च्यागो, एसे चु ताम खालैदा थापाङ्गो! बरु ए निसी परमेश्वरला मन्दिररी पूजा लबा म्हिदा उन्गो। ओच्छे एला कोरे म्हाजी भिसी म्हिगदेसे था याड्बाला

* 5:5 यूह २१:३ * 5:6 यूह २१:६

लागिरी परमेश्वरसे मोशादा पिन्बा ठिमसे कुल्बा अन्छार बलि फुल्गो” भिसी कुल्जी।*

15 जमाकुनुहेनसे झन जम्मान ग्लारी येशूसे लबा गेला बारेरी थे:जी। थेतबासेलमा म्हिगदे येशूला ताम ड्यानबारीदेन हाडला रोग म्हागै भिसी येशू मुबा ग्लारी खजी। 16 तर येशू चा सुनसान ग्लारी फेप्सी प्रार्थना लबा मुबा।

येशूसे कुज्या म्हिदा खम्ना लबा

मत्ती ९:१-८; मर्कूस २:१-१२

17 तिरेकुनु येशूसे म्हिगदेदा लोपबान लबा धुइरी गालील अञ्चलदेन यहूदिया अञ्चलला नाम्सा नाम्साग्यामसे ओच्छे यरूशलेमग्याम खबा फरिसीगदेदेन यहूदी धर्मगुरुगदेदेनोन थेरी मुबा। येशूदेन छ्याम आखम्बा म्हिगदेदा खम्ना लबा परमप्रभुला शक्ति मुबा। 18 थेनोन धुइरी म्हिगदेसे कुज्या म्हि गिकदा खाटरीन पुइसी भजी। ओच्छे थेनीगदेसे थे कुज्या म्हिदा दिम न्हडरी येशूला डाच्छापट्टि भोर्बारी म्हाइजी। 19 तर महिला हुलसे लमा थेनीगदेसे थे कुज्या म्हिदा येशूला डाच्छापट्टि भोर्बाला लागिरी ग्याम आयाइनी। थेतबासेलमा थेनीगदेसे थे कुज्या म्हिदा मडग्यारग्यामसे छानारी भोर्जी। ओच्छे छाना होक्सी थेदा तीबा नान्बादेन छ्यामनोन येशूला डाच्छापट्टि धोना लजी। 20 थे म्हिगदेला विश्वास म्हाइसी येशूसे थे कुज्या म्हिदा “डाइ एला पापला दोष मेटब लबा मुला” भिसी सुइजी। 21 येशूसे चुहइ सुइबा म्हाइसी यहूदी धर्मगुरुगदेदेन फरिसीगदेसे “हाडसे हाडदान परमेश्वर सहोसी ताम लबा चु म्हि खाल हिन्ना? म्हिगदेला पापला दोष मी परमेश्वरसे जे मेटब लखम्मुला” भिसी हाड हाड न्हडरी पाइबारी छ्याइजी।

* 5:14 लेवी १४:१-३२

22 येशूसे थेनीगदेला सेमला ताम था याङ्सी चुहङ् भिसी सुङ्जी, “एनीगदेला सेमरी तिग्दा चुहङ्बा म्हन्बा? 23 चु कुज्या म्हिदा ‘एला पाप माफ तबा मुला’ भिबादेन ‘रेःसी भ्रउ’ भिबारी खजिबा चा सजिलो मुला? 24 तर च्यागो, परमेश्वरसे पुइखबा म्हिदा चु जम्बुलिडरी म्हिगदेला पापला दोष मेटब लबा अधिकार मुला भिबा तामला प्रमाण डाइ एनीगदेदा उन्ना।” जमाहेन्से येशूसे थे कुज्या म्हिदा “ए रेःगो, ओच्छे एला तीबा नान्बा पुइसी दिमरी निउ।” 25 येशूसे थेहङ् सुङ्मैछ्याम थे कुज्या म्हि डोड रेःसी हाडला तीबा नान्बा पुइसी परमेश्वरला जयजयकार लबान दिमरी निजी। 26 जमाहेन्से थेरी मुबा जम्मान म्हिगदे लोङ्सी उदेक म्हन्जी। ओच्छे परमेश्वरला जयजयकार लबान, “तिनी य्हाडसे ल्हानान उदेकला गे म्हाङ्जी” भिसी भिजी।

येशूसे लेवीदा ड्योइबा

मत्ती ९:९-१३; मर्कूस २:१३-१७

27 थेग्याम फेप्वान लबा धुडरी येशूसे लेवी भिबा तिरो दुइबा म्हिदा तिरो दुइबा ग्लारी चिबान लबा म्हाङ्जी। ओच्छे येशूसे थेदा “डादेन छ्याम भ्रउ” भिसी सुङ्जी। 28 जमाहेन्से लेवीसे जम्मान स्हे ख्लासी रेःजी ओच्छे येशूदेन छ्याम भ्रजी।

29 ओच्छे लेवीसे येशूदा हाडला दिमरी भोज सोल्बारी ड्योइजी। थेरी येशूदेन छ्याम भोज चबारी चिबा म्हिगदे न्हडरी तिरो दुइबा म्हिगदेदेन ल्हानान स्य्हान्दो म्हिगदेएनोन मुबा। 30 जमाहेन्से फरिसीगदेदेन थेनीगदेला धर्मगुरुगदेसे येशूला चेलागदेदा बिरोध लबान, “तिग्दा एनीगदे तिरो दुइबा म्हिगदे ओच्छे स्य्हान्दो पापीगदेदेन छ्याम चिसी चबा थुङ्बा लबा?” भिसी ड्योइमा,* 31 येशूसे थेनीगदेदा “खम्बा म्हिदा डाक्टर आतोः, तर आखम्बा म्हिदा जे डाक्टर तोःला! 32 थेतबासेलमा परमेश्वरला डाच्छा

* 5:30 लूका १५:१-२

ज्यबा मुबा म्हिगदेदा आहिन, तर डनी पापी हिन्ना भिसी भ्रबा म्हिगदेसे ह्वाडला पाप ख्लासी परमेश्वरपट्टि दोःगै भिसी ड्योइबारी डा खबा हिन्ना” भिसी सुड्जी।

येशूसे फोइथान चिसी प्रार्थना लबाला लागिरी लोपूबा

मत्ती ९:१४-१७; मर्कूस २:१८-२२

33 जमाहेन्से थेनीगदेसे येशूदा “यूहन्नाला चेलागदे सदन फोइथान चिसी प्रार्थना लमुला। ओच्छे फरिसीगदेला चेलागदेसेनोन थेहड्णोन लमुला। तर ह्वाडला चेलागदेसे चा तिग्दा फोइथान चिसी प्रार्थना आलबा?” भिसी ड्योइमा, 34 येशूसे थेनीगदेदा “म्हाछार जन्तीगदेदेन छ्याम मुतेधोना थेनीगदेदा खाहड् लसी फोइथान चिउ भिखम्ला? 35 तर म्हाछार थेनीगदेग्याम फेसी भोर्बा धुइरी जे थेनीगदे फोइथान चिला” भिसी सुड्जी।

36 ओच्छे येशूसे थेनीगदेदा उखान गिकएनोन सुड्बान, “खालै म्हिसे बोक्टो क्वानरी छार क्वानगेन्से आख्या। थेहड् लसी ख्याजी भिसम छार क्वानएनोन न्होड्ला ओच्छे छार क्वानगेन बोक्टो क्वानदेन छ्याम ढिकएनोन आढिक। 37 ओच्छे खालै म्हिसे ढिला बोक्टो ताडरी अडगुरला कलिलो निडगु आयु, युजी भिसम कलिलो निडगुसे ढिला बोक्टो ताड भोसी ढेला। जमाहेन्से निडगु डेला ओच्छे ढिला ताडएनोन गे आखेल्बा तला। 38 थेतबासेलमा कलिलो निडगु छार ढिला ताडरी युसी थान्तोःबा मुला। 39 खालैसे चिपूबा निडगु थुड्सी कलिलो निडगु थुड्बा सेम आल, तिग्दा भिसम थेसे चिपूबा निडगुन ज्यबा भिला।”

6

येशू बूलपूबा न्हबा धिननाएनोन प्रभु हिन्ना

मत्ती १२:१-८; मर्कूस २:२३-२८

1 बल्पबा न्हबा धिनकुनु येशू बुग्याम फेप्वान मुबा। थे धुइरी थेला चेलागदेसे ग्वाला नम थुसी यारी न्हइसी चबारी छ्याइजी।*
 2 तर फरिसीगदे न्हडरी कोइ कोइसे “थेनीगदेदा बल्पबा न्हबा धिनकुनु लबारी आतबा गे एनीगदेसे तिग्दा लबा?” भिसी भिमा,
 3 येशूसे थेनीगदेदा चुहड् भिसी सुड्जी, “एनीगदेसे परमेश्वरला बचन पढब लबा आरे? दाऊदसे थेदेन छ्याम मुबागदे फोखेनबा धुइरी थेसे तिग लजी?”* 4 थेसे परमेश्वरला मन्दिररी पूजा लबा म्हिगदे बाहेक स्यहान्दोसे चबारी आतबा गेड परमेश्वरला दिमरी वाड्सी तेःसी चजी। ओच्छे थेसे हाडदेन छ्याम मुबागदेदा एनोन पिन्मा खालैसेन तिगै भिजी?”*

5 जमाहेन्से येशूसे थेनीगदेदा “परमेश्वरसे पुइखबा म्हि बल्पबा न्हबा धिनना प्रभु हिन्ना” भिसी सुड्जी।

येशूसे या खर्बा म्हिला या खम्ना लबा

मत्ती १२:९-१४; मर्कूस ३:१-६

6 बल्पबा न्हबा अर्गु धिनकुनु येशूसे यहूदीगदे हुप तबा दिम न्हडरी परमेश्वरला यहुल्साला बारेरी लोप्वारी छ्याइजी। थेरी दाहिने या खर्बा म्हि गिक मुबा। 7 बल्पबा न्हबा धिनकुनु येशूसे थे म्हिला खर्बा या खम्ना लला वा भिसी यहूदी धर्मगुरुगदेदेन फरिसीगदेसे दोष लबाला लागिरी चिवा लसी चिबा मुबा। 8 तर येशूसे थेनीगदेला सेमला ताम था याड्सी थे या खर्बा मुबा म्हिदा “ए रेःसी चुरी रापगो” भिसी सुड्जी। ओच्छे थे म्हि रापजी। 9 जमाहेन्से येशूसे थेनीगदेदा “थेहड् भिसम चु तामला जोहाब पिन्गो, बल्पबा न्हबा धिनकुनु ज्यबा लबादेन नइबा लबा, अथवा म्हि सोना लबादेन सिना लबा खजिबा चा ज्यबा हिन्ना” भिसी सुड्जी। 10 ओच्छे येशूसे हाडला क्युर्सीन मुबा म्हिगदेदा स्हीसी

* 6:1 वयव २३:२५ * 6:3 १ शमू २१:१-६ * 6:4 लेवी २४:९

थे या खर्बा मुबा म्हिदा “एला या तन्गब लउ!” भिसी सुड्जी। ओच्छे थेसे या तन्गब लमैछ्याम थेला या खम्जी। ¹¹ चु म्राड्सी फरिसीगदेदा बोमो रेःसी दाहेन्से येशूदा तिग लबा भिसी हाड हाड न्हडरी सल्लाह लजी।

येशूसे च्युक न्ही चेलागदेदा धम्बा

मत्ती १०:१-४; मर्कूस ३:१३-१९

¹² तिरेकुनु येशू गडरी फेप्सी म्हून गिकनोन परमेश्वरदेन छ्याम प्रार्थना लजी। ¹³ ओच्छे स्य्हो तमाहेन्से येशूसे हाडला चेलागदेदा ड्योइसी थेनीगदे न्हडरी च्युक न्ही चेलादा धम्जी। ओच्छे थेनीगदेदा मुल चेला भिसी मिन थान्जी। ¹⁴ सिमोनदा येशूसे पत्रुस भिसी सुड्जी, थेला आले अन्द्रियास ओच्छे याकूब, यूहन्ना, फिलिप, बारथोलोमाइ, ¹⁵ मत्ती, थोमा, अल्फयसला झा याकूब ओच्छे सिमोन। चु सिमोनदा हाडला यहुलसादा माया लबा म्हि भिसी भिमुबा। ¹⁶ ओच्छे याकूबला झा यहूदा, ओच्छे यहूदा इस्करियोत चुनोन यहूदा इस्करियोतसे लिच्छा येशूदा चुड्सी म्हिगदेला यारी जिम्मा पिन्जी।

येशूसे ल्हानान म्हिगदेदा खम्ना लबा

मत्ती ४:२३-२५; मर्कूस ३:७-१२

¹⁷ येशू हाडसे धम्बा चेलागदेदेन छ्याम गडग्याम मार फाप्सी सम्म ग्लारी फेप्खसी राप्सी धन्छ्याजी। जमाहेन्से येशूदेन छ्याम भ्रबा म्हिला हुल ओच्छे यहूदिया अञ्चलला जम्मान ग्लादेन यरूशलेम, ओच्छे टुरोसदेन सीदोन भिबा ग्लाग्याम म्हिला हुल ¹⁸ येशूसे लोप्बा ताम ड्यान्बारी ओच्छे हाड हाडला रोगगदे म्हाना लबारी खजी। थेरी म्हडसे स्याप्सी आखम्बा म्हिगदेएनोन खम्जी। ¹⁹ थेतबासेलमा जम्मान म्हिगदेसे येशूदा थुर्बारी म्हाइमुबा। तिग्दा भिसम येशूदेन छ्याम म्हिगदेदा खम्ना

लबा शक्ति मुबा। थे शक्तिग्याम रोगसे स्यापबा जम्मान म्हिगदे खम्जी।

दुखदेन सुख

मत्ती ५:१-१२

20 जमाहेन्से येशूसे ह्वाडला चेलागदेदा स्हीबान चुहङ् भिसी सुङ्जी,

“दुख याङ्बा म्हिगदे, एनीगदेसे परमेश्वरग्याम मोलम याङ्ला।

तिग्दा भिसम परमेश्वरला यहुल्सा एनीगदेलान हिनना।

21 फोखेन्बा म्हिगदे, एनीगदेसे परमेश्वरग्याम मोलम याङ्ला।

तिग्दा भिसम एनीगदेदा परमेश्वरसे भ्रेन्ना लला।

ओच्छे क्राबा म्हिगदे, एनीगदेसे परमेश्वरग्याम मोलम याङ्ला।

तिग्दा भिसम परमेश्वरसे एनीगदे ताङ्सी डे:म्याङ्ला।

22 “परमेश्वरसे पुइखबा म्हिदा विश्वास लबासे लमा म्हिगदेसे एनीगदेदा हेला लसी नाम्साग्यामसे ते:ला ओच्छे जम्मासेन एनीगदेदा खिसी लमाएनोन एनीगदेसे परमेश्वरग्याम मोलम याङ्ला।* ”

23 “थे धुइरी एनीगदे फुरफुर ताङ्गो। तिग्दा भिसम स्वर्गरी एनीगदेसे घेन इनाम याङ्ला। एनीगदेदा दुख पिन्बागदेला आखे म्हेमेगदेसेनोन अगमवक्तागदेदा चुहङ्नोन लमुबा।* ”

24 फ्युकपोगदे, एनीगदेसे परमेश्वरग्याम सजाय याङ्ला।

तिग्दा भिसम एनीगदेसे मोजमजा लसी जिन्बा मुला।

25 भ्रेन्बागदे, एनीगदे फोइथाननोन चितो:ला।

तिग्दा भिसम एनीगदेसे परमेश्वरग्याम सजाय याङ्ला।

ओच्छे ताङ्बागदे दुख नासी क्रासी चितो:ला।

तिग्दा भिसम एनीगदेसे परमेश्वरग्याम सजाय याङ्ला।

† 6:20 “दुख याङ्बा म्हिगदे” भिबा तामदा ग्रीक बाइबलरी प्राडबोगदे भिसी भिबा मुला। * 6:22 १ पत्र ४:१४ * 6:23 २ इति ३६:१६; मुल ७:५२

26 म्हिगदेग्याम मान याड्बागदे, एनीगदेसे परमेश्वरग्याम सजाय याड्ला।

तिग्दा भिसम एनीगदेला आखे म्हमेगदेसेनोन फट्टा अगमवक्तागदेदा चुहड्णोन लमुबा।

येशूसे शत्रुदाएनोन माया लतोःला भिसी लोप्बा

मत्ती ५:३८-४८; ७:१२

27 “तर डाइ लोप्बा ताम ड्यानूबागदेदा डाइ भिला, एनीगदेसे हाडला शत्रुगदेदा माया लउ, ओच्छे हाडदा हेला लबागदेदा ज्यबा व्यवहार लउ। 28 एनीगदेदा केःबागदेदा परमेश्वरसे मोलम पिन्गै भिसी प्रार्थना लउ। ओच्छे खालैसे एनीगदेदा आज्यबा लजी भिसम थेनीगदेदा ज्यबा तगै भिसी परमेश्वरदेन छ्याम प्रार्थना लउ। 29 खालैसे एदा ग्रम्बा गिकरी तोजी भसम अर्गुपट्टिला ग्रम्बाएनोन तासी पिन्गो। ओच्छे एला स्कोट भोर्बारी छ्याइबादा सहुर्दमदाएनोन पिन्गो। 30 एदेन छ्याम ह्नीबागदेदा पिन्गो, ओच्छे एसे थेदेन छ्याम दोःसी थाहीगो। 31 एनीगदेदा स्य्हानदो म्हिगदेसे जस्तो व्यवहार लगै भिसी म्हन्बा मुला, एनीगदेसेनोन स्य्हानदोगदेदा थेहड्णोन लउ।*

32 “चुदे एनीगदेदा माया लबादा जे एनीगदेसे माया लजी भिसम एनीगदेदा तिग ज्यबा तला? तिग्दा भिसम पापीगदेसेनोन हाडदा माया लबागदेदा माया लमुला। 33 ओच्छे एनीगदेसे हाडदा ज्यबा लबादा जे ज्यबा लजी भिसम एनीगदेदा तिग ज्यबा तला? तिग्दा भिसम पापीगदेसेनोन थेहड्णोन लमुला। 34 चुदे एनीगदेसे दोःसी याड्बा सेम लसी खालैदा छे पिन्जी भिसम एनीगदेदा तिग ज्यबा तला? तिग्दा भिसम पापीगदेसे जे जति छे पिन्बा मुला ओतेन किन्बा आश लसी पापीगदेदान छे पिन्बा मुला। 35 तर हाडला शत्रुगदेदा माया लउ, जम्मादान ज्यबा लउ, दोःसी किन्बा सेम

* 6:31 मत्ती ७:१२

लसी छे थापिन्गो ओच्छे एनीगदेला मान घेन तला। एनीगदे स्वर्गरी धन्छ्याबा जम्मान भन्दा घेन परमेश्वरला सन्तान तला। तिग्दा भिसम परमेश्वरसे बैगुनीदेन हाडला जे ग्याम च्याबा म्हिगदेदाएनोन दया लमुला।³⁶ थेतबासेलमा एनीगदेला परमेश्वर आबासे दया लबा हड् एनीगदेसेनोन दया लउ।

स्यूहान्दोदा दोष थालउ

मत्ती ७:१-५

³⁷ “स्यूहान्दोदा दोष लसी थाभ्रउ ओच्छे परमेश्वरसेनोन एनीगदेदा दोष आल। म्हिगदेला निसाफ लसी थाभ्रउ ओच्छे परमेश्वरसेनोन एनीगदेला निसाफ आल। म्हिगदेदा माफ पिन्गो ओच्छे परमेश्वरसेनोन एनीगदेदा माफ पिन्ना।³⁸ म्हिगदेदा पिन्गो ओच्छे परमेश्वरसेनोन एनीगदेदा पिन्ना। परमेश्वरसे मी छुइसी छुइसी पिन्ना ओच्छे जुन दपूबा सहेसे एनीगदेसे स्यूहान्दोगदेदा पिन्ना, थेनोन दपूबा सहेसे एनीगदेसे याड्ला।”

³⁹ येशूसे थेनीगदेदा उखानग्याम चुहड् भिसी सुड्जी, “तिग मी आम्राड्बा म्हिसे मी आम्राड्बा म्हिदान डोर्याब लखम्ला? चुदे थेसे डोर्याब लजी भिसम थे न्हीनोन व्हाडरी ताडला।”⁴⁰ ओच्छे खजिबै चेला हाडला गुरु भन्दा घेन आत, तर थेसे लोप्सी जिन्माहेन्से गुरु हड्बान तला।*

⁴¹ “स्यूहान्दोला गोरी से: भ्रबा म्राड्बासे हाडला गोरी मुइ भ्रबा तिग्दा आम्राड्बा? ⁴² हाडला गोरी भ्रबा मुइ आम्राड्बासे खाहड् लसी आलेदा ‘खाइ, एला गोला से: ते:सी पिन्ना भिसी भिखम्ला।’† कप्टी, डाच्छा हाडला गोला मुइ ते:गो, ओच्छे जे एसे आलेला गोरी भ्रबा से: ते:बारी खम्ला।

* 6:39 मत्ती १५:१४ * 6:40 मत्ती १०:२४-२५; यूह १३:१६; १५:२० † 6:42 “हाडला गोरी मुइ भ्रबा भिबादेन आलेला गोरी मुबा से:” भिबा तामदा ग्रीक बाइबलरी “हाडला मीरी मुबा मूढादा वास्ता आलना हाडला आलेला मीरी मुबा धुलु ते:सी पिन्ना” भिसी भ्रिबा मुला।

ज्यबा दोडला रोदेन आज्यबा दोडला रो

मत्ती ७:१६-२०; १२:३३-३५

43 “ज्यबा दोडरी आज्यबा रो आरो ओच्छे आज्यबा दोडरी ज्यबा रो आरो। 44 जममान दोड थेरी रोबा रो अन्छार डोसेला। पुजुला दोडग्याम अज्जीर आथु ओच्छे पोलाडला दोडग्यामएनोन अडगुर आथु।* 45 तिग्दा भिसम ज्यबा सेम मुबा महिला सेम न्हडग्याम ज्यबान ताम थोन्मुला ओच्छे नइबा सेम मुबा महिला सेम न्हडग्याम नइबान ताम थोन्मुला। थेतबासेलमा महिला सेम न्हडरी जे मुला थेनोन थेला सुडग्याम पाड्ला।* ”

बुद्धि मुबा म्हिदेन मूर्ख म्हिसे सहोबा दिम

मत्ती ७:२४-२७

46 “डाइ कुल्बा ताम आड्यानसम तिग्दा डादा ‘प्रभु, प्रभु’ जे भिबा? 47 डा मुबा ग्लारी खबा म्हिसे डाइ पाड्बा ताम ड्यानना ओच्छे डाइ कुल्बा अन्छार गे लला। थे खाहड्बा म्हि हिनना भिबा ताम डाइ एनीगदेदा पाड्ला। थे म्हिसे 48 हाडला दिम सहोबा धुडरी जग नुपना ख्वसी सहोजी। ओच्छे नाम, भाल खमा थे दिमरी टजी। तसैनोन थे दिम आफुपनी, तिग्दा भिसम थे दिमला जग नुपना ख्वसी सहोबा मुबा। 49 तर जुन म्हिसे डाइ पाड्बा ताम थे:सी थे अन्छार गे आल थे म्हि चा जग नुपना आख्वना दिम सहोबा म्हि हड्बा हिनना। थेतबासेलमा नाम, भाल बाढी खबा धुडरी थे दिमरी टसी थे दिम फुप्सी ल्हानान नोक्सान तजी।”

7

येशूसे कप्तानला नोकरदा खम्ना लबा

मत्ती ८:५-१३

* 6:44 मत्ती १२:३३ * 6:45 मत्ती १२:३४

1 चुहड् सुड्सी जिन्माहेन्से येशू कफर्नहुम भिबा ग्लारी फेपूजी।
 2 थेरी रोमी कप्तान गिकला नोकर आखमना सिबारीन छ्याइबा मुबा। थेसे थे नोकरदा ल्हानान माया लमुबा। 3 थेतबासेलमा थेसे हाडला नोकरदा खमना लगै भिसी येशूदा फेप्खउ भिसी ड्योडबाला लागिरी यहूदी गन्बागदेदा पुइजी। तिग्दा भिसम थेसे येशूला बारेरी थे:बा मुबा। 4 जमाहेन्से थेनीगदे येशू मुबा ग्लारी खसी बिनती लबान, “थे हाडला दया याड्तो:बा खाल्ला म्हि हिन्ना। 5 तिग्दा भिसम थेसे यहाड यहूदी यहूलदा माया लमुला, ओच्छे थेसेन यहूदीगदे हुप तबा दिम सहोसी पिन्बा हिन्ना” भिसी भिजी।

6 जमाहेन्से येशू थेनीगदेदेन छ्याम फेपूजी। येशू कप्तानला दिम डामरी धोमा, कप्तानसे हाडला ह्योगदेदा चुहड् भिउ भिसी येशू मुबा ग्लारी पुइजी, “प्रभु हाडसे दुख थालउ। तिग्दा भिसम हाड डाला दिमरी फेप्खबाधोनाला डा आरे। 7 डाएनोन हाड मुबा ग्लारी खबाधोनाला आमहन्नी। थेतबासेलमा हाडसे डाला नोकर खमगै भिसी सुड् जे सुड्सैनोन थे खम्ला। 8 तिग्दा भिसम डाएनोन डाला हाकिमला तहरी चिबा म्हि हिन्ना। डाला तहरीनोन सिपाहीगदे मुला। डाइ कोइदा निउ भिमा निमुला, कोइदा खउ भिमा खमुला। ओच्छे डाला नोकरदा डाइ चुहड् लउ भिमा थेसे थेहड्-नोन लमुला” भिसी भिजी।

9 थेला चुहड्बा ताम थे:सी येशू उदेक तजी, ओच्छे महिला हुलपट्टि दो:सी, “एनीगदेसे डाला ताम ड्यानगो, इस्राएल यहूलसाला म्हिगदे न्हडरीनोन डाइ चुहड्बा घेन विश्वास मुबा म्हि आस्यपनी” भिसी सुड्जी। 10 जमाहेन्से कप्तानसे येशू मुबा ग्लारी पुइबा म्हिगदे दो:सी दिमरी निमा, थे नोकर खमसी जिन्बा म्राड्जी।

येशूसे हेम्बो सिबा म्रिडम्हेमेला झादा सिबाग्याम सोना लबा

11 न्हडगरदड येशू नाइन भिबा शहररी फेपूमा हाडला चेलागदेदेन महिला हुलएनोन येशूदेन छ्याम निजी। 12 ओच्छे येशू

शहररी धोबारीन छ्याइमा सिबा म्हि भवान मुबा। थे सिबा म्हि हेम्बो सिबा म्रिडम्हेमेला गिक जेन झा मुबा। ओच्छे शहरला म्हिगदेएनोन थेदेन छ्याम मुबा। ¹³ थे म्रिडम्हेमेदा म्राड्सी प्रभुदा सेमहेन्सेन दया रे:जी। ओच्छे थेदा “ए थाक्रागो” भिसी सुड्जी। ¹⁴ जमाहेन्से येशू सिबाला डामरी फेप्सी सिबादा थुर्जी। चुहड् लसी थुमैछ्याम सिबा पुइबा म्हिगदे थेन तजी। जमाहेन्से येशूसे सिबा म्हिदा “कोला, रे:गो” भिसी सुड्जी। ¹⁵ जमाहेन्से सिबा म्हि रे:सी ताम पाड्बारी छ्याइजी। ओच्छे येशूसे थेदा थेला आमादा जिम्मा पिन्जी।

¹⁶ चु म्राड्सी जम्मान म्हिगदे लोड्सी परमेश्वरदा जयजयकार लबान चुहड् भिजी, “य्हाडला गुडरी घेन अगमवक्ता गिक फेप्खबा मुला। ओच्छे परमेश्वरसे हाडला म्हिदा दया लबा मुला।” ¹⁷ जमाहेन्से येशूसे लबा गेला बारेरी यहूदियाला जम्मान ग्लारीदेन डाम डामला जम्मान जिल्लारी थे:जी।

बपत्तिस्मा पिन्बा यूहन्नासे हाडला चेला न्हीदा येशू मुबा
ग्लारी पुइबा

मत्ती ११:२-१९

¹⁸ यूहन्नाला चेलागदेसे येशूसे लबा जम्मान गे हाडला गुरु यूहन्नादा पाड्जी। जमाहेन्से यूहन्नासे हाडला चेला न्हीदा ड्योइसी, ¹⁹ “डन्से फेप्खला भिसी आश लसी चिबा थार्बा पिन्बा ग्ले हाडनोन हिन्ना कि स्य्हान्दो खालैदा भ्रान्तो:बा हिन्ना?” भिसी येशू मुबा ग्लारी ड्योइबारी पुइजी। ²⁰ जमाहेन्से थेनीगदे येशू मुबा ग्लारी निसी, “डन्से फेप्खला भिसी आश लसी चिबा थार्बा पिन्बा ग्ले हाडनोन हिन्ना कि स्य्हान्दो खालैदा भ्रान्तो:बा हिन्ना?” भिसी ड्योइबारी बपत्तिस्मा पिन्बा यूहन्नासे डन्दा हाड मुबा ग्लारी पुइखबा हिन्ना भिसी भिजी।

21 थे धुइरी येशूसे रोगसे स्यापबा ल्हानान म्हिगदेदेन म्हडसे स्यापबा म्हिगदेदा खम्ना लबान मुबा। ओच्छे मी आम्राड्बा ल्हानान म्हिगदेला मी म्राड्ना लजी। 22 जमाहेन्से यूहन्नाला चेलागदेदा येशूसे चुहड् भिसी सुड्जी, “एनीगदेसे जुन जुन ताम म्राड्बादेन थेःबा मुला, थेनोन ताम यूहन्ना मुबा ग्लारी निसी पाड्गो। मी आम्राड्बागदेला मी म्राड्ना लबा मुला, कुज्यादेन कोरे खबा म्हिगदेदा खम्ना लबा मुला, नाब्यड् आथेःबागदेदा थेःना लबा मुला, सिबागदेदा सोना लबा मुला, ओच्छे प्राड्बोगदेदा परमेश्वरला यहुल्साला समाचार थेःना लबान मुला।* 23 जुन म्हिसे शङ्का आलना विश्वास लला थे म्हिसे परमेश्वरग्याम मोलम याड्ला।”

24 यूहन्नाला चेलागदे दोःसी निमाहेन्से येशूसे यूहन्नाला बारेरी महिला हुलदा चुहड् भिसी सुड्बारी छ्याइजी, “एनीगदे तोडतोडबा ग्लारी तिग च्याबारी निबा मुबा? तिग लाबासे य्होड्बा मा दोड च्याबारी निबा हिन्ना? 25 ओच्छे एनीगदे तिग च्याबारी थोन्बा मुबा? ज्यबा ज्यबा क्वान क्वान्बा म्हिदा च्याबारी? च्यागो, थेहड्बा ज्यबा ज्यबा क्वान क्वान्बादेन मोजमजा लबा म्हि मी ग्लेखाडरी जे चिबा मुला। 26 एनीगदे तिग च्याबारी निमुबा? तिग अगमवक्तादा च्याबारी निबा आहिन? हिन्ना, डाइ पाड्ला एनीगदेसे स्यहान्दो अगमवक्तागदे भन्दा घेन म्हि गिकदा म्राड्बा मुला। 27 थे अगमवक्ता थेनोन हिन्ना, थेला बारेरी परमेश्वरला बचनरी चुहड्बा भिबा मुला,

‘च्यागो, डाइ डाला समाचार भोर्बा म्हिदा एला डाच्छा डाच्छा पुइखला।

थेसे एला लागिरी ग्याम सहोला’।*

* 7:22 यशै ३५:५-६; ६१:१ * 7:27 मला ३:१

28 “थेतबासेलमा च्यागो, दान्देधोना न्हबा कोलागदे न्हडरी यूहन्ना भन्दा घेन म्हि खालै आरे। तसैनोन परमेश्वरला यहुल्सारी जुन म्हि जजा मुला थे म्हि यूहन्ना भन्दा घेन म्हि तला।”

29 ओच्छे तिरो दुइबा म्हिगदेदेन स्य्हान्दो म्हिगदेसे यूहन्नाला ताम थे:सी, “परमेश्वरसे कुल्बा ताम ठीक हिनना” भिसी थेग्याम बपत्तिस्मा किन्बा मुबा।* 30 तर फरिसीगदेदेन यहूदी धर्मगुरुगदेसे चा परमेश्वरसे कुल्बा ताम गे आखेल्बा ताम हिनना भिसी यूहन्नाग्याम बपत्तिस्मा आकिन्बा मुबा। 31 येशूसे थेनीगदेदा चुहड् भिसी सुड्जी, “थेहड्बा म्हिगदेदा डाइ तिगदेन छ्याम दाँजब लसे? थेनीगदे खाहड्बा मुला भिसम, 32 बजाररी चिबा कोलागदे हड्बा मुला। थेनीगदे हाड हाड न्हडरी चुहड् भिसी कल लमुला, ‘डन्से एनीगदेला लागिरी बाँसुरी हाप्सी पिन्जी, तर एनीगदे आस्य्हनी।

ओच्छे डन्से दुखला व्हाइ गोजी, तर एनीगदे आक्रानी?”

33 तिगै चबा थुड्बादेन अडगुरला निडगुएनोन आथुड्बा बपत्तिस्मा पिन्बा यूहन्ना खमा एनीगदेसे ‘थेदा म्हडसे स्यापबा म्हि’ भिसी भिबा मुबा। 34 परमेश्वरसे पुइखबा म्हि चा चबा थुड्बा लसी भ्रजी। थेतबासेलमा म्हिगदेसे डादा ‘च्यागो, ल्हानान चबा स्हेदेन ल्हानान निडगु कासी ड्य्होइसी भ्रबा, तिरो दुइबादेन पापीगदेला ह्यो’ भिसी भिमुला! 35 तर परमेश्वरग्याम बुद्धि याड्बागदेसे जे परमेश्वरला बुद्धि ठीक हिनना भिसी था याड्बा मुला।”

येशू फरिसीला दिमरी फेपबा

36 फरिसीगदे न्हडला गिकसे येशूदा सोल छ्योइबारी ड्योइजी। ओच्छे थेला दिमरी फेप्सी येशू सोल छ्योइबारी धन्छ्याजी। 37 थे शहररी मुबा पापी म्रिडम्हेमे गिकसे फरिसीला दिमरी येशू सोल छ्योइबारी फेप्वजी भिबा थे:सी सिड्गमरमरला बोटलरी

* 7:29 मत्ती २१:३२; लूका ३:१२

अत्तर भसी येशू मुबा ग्लारी खजी।* 38 थे येशूला ग्यापग्याम खसी येशूला डामरी राप्सी क्राजी, ओच्छे थेला मीख्लीसे येशूला स्य्हाप भम्जी। जमाहेन्से थेसे हाडला क्रासे येशूला स्य्हाप फ्यासी च्योक लसी† येशूला स्य्हापरी अत्तर फोर्बारी छ्याइजी। 39 चुहड् लबा म्राड्सी येशूदा इयोइबा फरिसीसे “चु म्हि अगमवक्ता हिन्सम थेदा थुर्बा म्रिडम्हेमे खाहड्बा म्रिडम्हेमे भिसी डोसेसेला मुबा। तिग्दा भिसम चु पापीस्या हिन्ना” भिसी हाडला सेम न्हडरी म्हन्जी।

40 थेसे सेमरी चुहड्बा ताम म्हन्बा था याड्सी येशूसे फरिसीदा “सिमोन डाइ एदा ताम गिक पाड्तोःबा मुला” भिसी सुड्मा, थेसे “सुड्गो गुरु” भिसी भिजी। 41 “च्यागो, म्हि न्हीसे साहू गिकदेन छ्याम छे किन्बा मुबा गिकसे ग्यार्जा डा ओच्छे स्य्हान्दोसे बोगल न्हीसे च्युइ टाडगा किन्बा मुबा। 42 थे न्हीसेन छे फाआखम्बासे लमा साहूसे थे न्हीदान माफ पिन्जी। थेतबासेलमा, लु, पाड्गो थे न्ही न्हडरी खजिबासे चा साहूदा ल्हाना माया लला” भिसी इयोइमा, 43 “ल्हाना माफ याड्बासे” भिसी सिमोनसे भिमा, “एसे ठीक भिजी” भिसी येशूसे थेदा सुड्जी।

44 ओच्छे थे म्रिडम्हेमेपट्टि दोःसी येशूसे सिमोनदा चुहड् सुड्जी, “चुदा च्यागो, डा एला दिमरी खमा एसे डादा काड खुबारी क्युइएनोन आपिन्नी तर चुसे मी डाला काड मीख्लीसे खुसी हाडला क्रासे फ्यासी पिन्जी। 45 एसे डादा च्योक लसी फ्याआफुलनी, तर चुसे मी खमाहेन्सेन डाला काडरी च्योक लबाला लबान मुला। 46 ओच्छे एसे डाला थोबोरी छ्युगु फोर्सी आपिन्नी। तर चुसे मी डाला काडरी अत्तर फोर्सी पिन्जी। 47 थेतबासेलमा एसे डाला ताम इयान्गो, चुसे ल्हानान पाप लसैनोन

* 7:37 मत्ती २६:७; मर्कू १४:३; यूह १२:३ † 7:38 स्य्हाप च्योक लबा चा यहूदीला ठिम अन्छार य्हाडसे फ्या लबा हड्बान हिन्ना।

माफ याइसी जिन्बा मुला। तिग्दा भिसम चु म्रिडम्हेमेसे ल्हानान मान लबा मुला। तर जुन म्हिदा जजाकी जे माफ लला, थेसे जजाकी जे मान लला।”

48 ओच्छे येशूसे थे म्रिडम्हेमेदा “एला पाप माफ तबा मुला” भिसी सुइजी।

49 थेरी चबारी चिबा म्हिगदेसे चु ताम थे:सी, “पाप माफ लबा चु म्हि खाल हिन्ना?” भिसी ह्राड ह्राड न्हडरी भिबारी छ्याइजी।
50 ओच्छे येशूसे थे म्रिडम्हेमेदा “एला विश्वाससे लमा एसे थार्बा याइबा मुला, ए ढुकक तसी निउ” भिसी सुइजी।

8

येशूसे परमेश्वरला यहुल्साला समाचार थे:ना लबा

1 जमाहेन्से येशू शहर शहरदेन नाम्सा नाम्सा तसी परमेश्वरला यहुल्साला समाचार थे:ना लबान फेपजी। थेला च्युक न्ही चेलागदेएनोन थेदेन छ्यामनोन मुबा। 2 ओच्छे येशूसे म्हडसे स्यापबादेन रोगग्याम खम्ना लबा कोइ कोइ म्रिडम्हेमेगदेएनोन येशूदेन छ्याम मुबा, थेनीगदे न्हडरी मरियम मग्दलिनी भिबा म्रिडम्हेमेला ल्हुइग्याम येशूसे गोर निस म्हड तापबा मुबा। 3 ओच्छे सुसन्नादेन हेरोद ग्लेला दिमरी गे लबा म्हिगदे न्हडला खुजास भिबा मुल म्हिला म्रिड योअन्नाएनोन येशूदेन छ्याम मुबा। ओच्छे थेनीगदेदेन स्य्हान्दो म्रिडम्हेमेगदेसे ह्राडलान टाडगासे येशूदा हो लमुबा।*

ब्लु ढ्वबाला उखान

मत्ती १३:१-९; मर्कूस ४:१-९

4 जमाहेन्से नाम्सा नाम्साग्याम म्हिला हुल खसी येशू मुबा ग्लारी पोप तजी। ओच्छे येशूसे थेनीगदेदा उखान गिक चुहइ भिसी

* 8:3 मत्ती २७:५५-५६; मर्कू १५:४०-४१; लूका २३:४९

सुड्जी, ⁵ “च्यागो, ब्लु ढ्वबा म्हि गिक ब्लु ढ्वबारी भ्रजी। थे म्हिसे ब्लु ढ्वमा कोइ ब्लु ग्यामरी परब तजी। थे ब्लु म्हिसे नाड्जी ओच्छे चरागदे खसी चजी। ⁶ कोइ ब्लु चा युडबाला घहड मुबा सरी परब तजी, ओच्छे फुइमैछ्याम सिजी। तिग्दा भिसम थे स खर्बा मुबा। ⁷ कोइ ब्लु चा पुजु झाडरी परब तजी। ओच्छे थे ब्लु पुजुदेन छ्याम छ्यामनोन ल्हेसी निसैनोन पुजु दोडला हापसे लमा थे दोडरी तिगै आरोनी। ⁸ तर कोइ ब्लु चा ज्यबा सरी परब तजी, ओच्छे थे दोडरी दोब्बर, तेब्बर, चौबरधोना रोजी।” चुदे सुड्माहेन्से येशूसे थेरी मुबा म्हिगदेदा “जुन म्हिदा ड्यानबा सेम मुला, थेसे ड्यानसी घोउ।”

ब्लु ढ्वबा उखानना अर्थ

मत्ती १३:१०-२३; मर्कूस ४:१०-२०

⁹ जमाहेन्से चेलागदेसे येशूदा चु उखानना अर्थ तिग भिसी ड्योइजी। ¹⁰ येशूसे थेनीगदेदा चुहड् भिसी सुड्जी, “डाइ एनीगदेदा म्हिसे था आयाड्बा परमेश्वरला य्हुल्साला ताम घोखम्बा ज्ञान बुद्धि पिन्बा मुला। तर स्य्हान्दोगदेदा चा उखानग्याम पाड्बा मुला। थेतबासेलमा ‘थेनीगदेसे च्याबाम च्याला तर आम्राड्, ड्यानबाम ड्यानबा मुला तर आघो।’* ”

¹¹ “च्यागो, चु उखानना अर्थ चुनोन हिन्ना, चु ब्लु भिबा चा परमेश्वरला बचन हिन्ना। ¹² ग्यामला कुनीरीक्यार परब तबा ब्लुला अर्थ चा जुन म्हिसे परमेश्वरला बचन ड्यानबाम ड्यानना तर सेमरी थान्बारी चा आखम्मुला। तिग्दा भिसम थेनीगदेसे विश्वास लसी थार्बा थायाड्गै भिसी शैतान खसी थेनीगदेला सेमग्याम परमेश्वरला बचन ब्यन्सी भोर्मुला। ¹³ थेहड् लसीन युडबाला घहडरी परब तबा ब्लुला अर्थ चा थेनीगदेसे

* 8:10 यशै ६:९-१०

परमेश्वरला बचन ज्यबा म्हन्सी विश्वास मी लला। तर थेनीगदेला विश्वासला टा अरेबासे लमा तिगै धिन लिच्छा थेनीगदेदा तबा दुखसे लमा थेनीगदेसे विश्वास लबा खलाला।
 14 ओच्छे पुजु झाड न्हडरी परब तबा बलुला अर्थ चा थेनीगदेसे जम्बुलिडरी म्राड्बा धन सम्पत्तिदेन मोजमजा, ओच्छे थेनीगदेदा तबा धनदा सुर्दासे लमा विश्वासरी कोड्सी चिआखम्बासे लमा थेनीगदेला विश्वासग्याम तिगै आरो। 15 तर ज्यबा सरी परब तबा बलुला अर्थ चा जुन म्हिसे परमेश्वरला बचन ड्यान्सी हाडला ज्यबा सेमहेनसेन विश्वास लला। ओच्छे थेला विश्वासग्याम गोलसे गोलसे ज्यबा रोगदे रोबान निला।

नाडसलला अर्थ
 मर्कूस ४:२१-२५

16 “खालैसे नाडसल म्रासी फामसे घप्सी आथान, ओच्छे खाट धिरीएनोन छुम्सी आथान। तर दिम न्हडरी खबा म्हिगदेदा य्हाल तगै भिसी नोबा ग्लारी थानना।* 17 लहुसैनोन आम्राड्बा सहे तिगै आरे। ओच्छे छुम्सी थान्सैनोन आघोबा सहे तिगै आरे।* 18 जुन म्हिसे डाइ लोप्बा तामदा सेम लसी ड्यान्ना, थेदा डाइ अझ घोना लला। तर डाइ लोप्बा ताम आड्यान्बादा चा थेसे जुन घोबा मुला थे तामएनोन म्हाना लला।”*

येशूला आमामेन आलेगदे

मत्ती १२:४६-५०; मर्कूस ३:३१-३५

19 थे धुडरी येशूला आमामेन आलेगदे येशूदा स्यापबारी येशू मुबा ग्लारी खजी। तर येशूला क्युर्सीन महिला हुल मुबासे लमा थेनीगदेसे येशूदा स्यापबारी आखम्नी। 20 जमाहेनसे थेरी मुबा खालै म्हिसे “हाडदा स्यापबारी हाडला आमामेन आलेगदे मडग्यार

* 8:16 मत्ती ५:१५; लूका ११:३३
 लूका १९:२९

* 8:17 मत्ती १०:२६

* 8:18 मत्ती २५:२९;

भ्रान्सी चिबा मुला” भिमा, ²¹ “च्यागो, जुन म्हिसे परमेश्वरला बचन इयान्सी परमेश्वरसे कुल्बा ताम इयान्ना थेनोन डाला आमादेन आलेगदे हिन्ना” भिसी येशूसे थेनीगदे जम्मादान सुड्जी।

येशूसे लाबालुडसर म्हाना लबा

मत्ती ८:२३-२७; मर्कूस ४:३५-४१

²² तिरेकुनु येशू हाडला चेलागदेदेन छ्याम दोंगारी क्रे:माहेन्से “लु, य्हाड समुन्द्रला क्याम्सडपट्टि निइ” भिसी चेलागदेदा सुड्जी। जमाहेन्से येशू हाडला चेलागदेदेन छ्याम क्याम्सड फेप्जी। ²³ थेनीगदे फेपबान लबा धुइरी येशू दोंगारीन छुप निजी। जमाहेन्से समुन्द्ररी घेन लाबालुडसर खजी, लाबालुडसरसे लसी समुन्द्ररी छाल रे:जी, छालसे लमा दोंगा डुबब तबारी छ्याइजी, जमाहेन्से थेनीगदेदा आपत विपत तजी। ²⁴ जमाहेन्से चेलागदे येशूला डामरी खसी येशूदा छिड्बान, “गुरु, य्हाड सिबारी छ्याइजी” भिसी भिजी। चेलागदेला चुहड्बा ताम थे:सी येशू सहेड्सी लाबालुडसरदा बड्जी। बड्मैछ्याम लाबालुडसर म्हासी शान्त तजी। ²⁵ येशूसे थेनीगदेदा “खाइ, एनीगदेला विश्वास” भिसी सुड्मा, थेनीगदे लोड्सी उदेक म्हन्बान हाड हाड न्हडरी “चु खाल? लाबालुडसरसेनोन थेसे कुल्बा ताम इयान्बा चीम” भिसी ताम लजी।

येशूसे म्हिला ल्हुइग्याम म्हड ताप्बा

मत्ती ८:२८-३४; मर्कूस ५:१-२०

²⁶ येशू हाडला चेलागदेदेन छ्याम गालील अञ्चलला क्याम्सडपट्टि गेरासेनस भिबा ग्लारी धोखजी। ²⁷ येशू दोंगाग्याम फपमैछ्याम थे शहररी मुबा म्हडसे स्यापबा म्हि गिक येशूदा स्यापबारी खजी। थे क्वान आक्वान्नान भ्रबा ल्हानान तसी जिनबा मुबा। ओच्छे थे दिमरी आचिना धुर्सारीक्यार चिबा मुबा।

28 थेसे येशूदा म्राड्मैछ्याम क्रिड्बान येशूला डाच्छापट्टि ख्लुप तसी, “जम्मान भन्दा घेन परमेश्वरला झा येशू हाडसे डादा तिग लबा सेम मुला? डादा दुख थापिन्गो” भिसी बिनती लजी। 29 तिगदा भिसम येशूसे थे म्हडदा थे महिला ल्हुड्ग्याम थोन्सी निउ भिसी कुल्बा मुबा। थेदा थे म्हडसे ल्हानान रेम चुड्बा मुबा। थे म्हिदा या काडरी च्याल्दासे खीसी खुड्सी चिसैनोन म्हडला शक्तिसे लमा थेसे च्याल्दा फ्राटफ्रेट टाड्सी थे ह्विरीक्यार यार्मुबा।

30 येशूसे थेदा “एला मिन तिग?” भिसी ड्योइमा, “डा हुल हिनना” भिसी भिजी। तिगदा भिसम थे महिला ल्हुड्ग्याम ल्हानान म्हड मुबा। 31 ओच्छे म्हडगदेसे “डन्दा ल्हानान नुपबा व्हाडरीं थापुड्गो” भिसी येशूदेन छ्याम बिनती लजी।

32 थे ग्लाला डामला गडरी ह्वला बथान छबान मुबा। थेतबासेलमा थे म्हडगदेसे डन्दा थे ह्वागदे न्हडरी वाड्पुड्गो भिसी बिनती लमा थेनीगदेदा येशूसे “निउ” भिसी सुड्जी। 33 जमाहेन्से थे म्हडगदे थे महिला ल्हुड्ग्याम थोन्सी ह्वागदे न्हडरी वाड्माहेन्से थेरी मुबा जम्मान ह्वागदे गड्ग्याम समुन्द्री छ्योड्सी सिजी।

34 चुहड् तबा म्राड्सी ह्वा छबा म्हिगदे यार्जी। ओच्छे नाम्सा नाम्सादेन शहर शहररी निसी थेनीगदेसे म्राड्बा जम्मान ताम थेःना लजी। 35 थेनीगदेसे पाड्बा ताम थेःसी ल्हानान म्हिगदे च्याबारी येशू मुबा ग्लारी खमा, थेनीगदेसे डाच्छा म्हडसे स्याप्सी म्योसी भ्रबा म्हि खमसी क्वान क्वान्सी येशूला डामरी चिबा म्राड्जी। चु म्राड्सी थेनीगदे लोड्जी। 36 थे म्हडसे स्याप्बा म्हि खाहड् लसी खमजी भिसी म्राड्बा म्हिगदेसे थेरी च्याबारी खबा म्हिगदेदा पाड्जी। 37 जमाहेन्से गैरासेनस भिबा नाम्साला क्यारमारला

† 8:31 चु पदरी “ल्हानान नुपबा व्हाड” भिबा चा म्हड म्हुड चिबा ग्ला हिनना। चु ताम (रोमी १०:७; उन्बा ९:१, २, ११; ११:७; १७:८; २०:१, ३) पदरी एनोन मुला।

म्हिंगदेसे येशूदा “डनी मुबा ग्लाग्याम फेपूगो” भिसी बिन्ती लजी। तिग्दा भिसम थेनीगदे ल्हानान लोड्सी उदेक तबा मुबा। थेतबासेलमा येशू थे ग्लाग्याम दोंगारी क्रेःसी फेपूबारी छ्याइमा, 38 येशूसे म्हड ताप्सी खम्ना लबा म्हिसे “डाएनोन हाडदेन छ्याम निबा” भिसी येशूदेन छ्याम बिन्ती लमा येशूसे थेदा, 39 “ए हाडला दिमरी निउ ओच्छे परमेश्वरसे एला लागिरी खाहड्बा गे लबा मुला, थे ताम जम्मादान थेःना लउ” भिसी सुड्जी। जमाहेन्से थे म्हि निसी येशूसे हाडला लागिरी लबा गेला बारेरी शहरला जम्मान ग्लारी थेःना लबान भ्रजी।

याइरसला झामेदेन का निबा बेथासे स्यापूबा म्रिडम्हेमे खम्बा मत्ती ९:१८-२६; मर्कूस ५:२१-४३

40 जमाहेन्से येशू दोःसी फेपूखमाहेन्से महिला हुलसे येशूदा फ्याफुल्जी। तिग्दा भिसम थेनीगदे येशू फेपूखला भिसी भ्रान्सी चिमुबा। 41 थेनोन धुइरी याइरस भिबा यहूदीगदे हुप तबा दिमला नेता येशू मुबा ग्लारी खसी येशूला स्यूहापरी फ्या लबान, “डाला दिमरी फेपूखउ” भिसी बिन्ती लजी। 42 तिग्दा भिसम थेला गिक जेन मुबा च्युक न्ही दिडला झामे सिबारीन छ्याइबा मुबा। जमाहेन्से येशू फेपूबान लबा धुइरी म्हिंगदेसे तोर हुइ मार हुइ लबारी छ्याइजी। 43 थेरी का निबा बेथासे स्यापूसी च्युक न्ही दिड तबा म्रिडम्हेमे गिक मुबा। थेसे हाडला जम्मान सम्पत्ति खर्च लसी मन लसैनोन थेदा खालैसे खम्ना लआखम्बा मुबा। 44 थेतबासेलमा थे येशूला ग्यापग्याम खसी येशूला क्वानना जोरी थुर्जी। थेसे येशूला क्वान थुमैछ्याम थेला का निबा बेथा म्हाजी।

45 जमाहेन्से येशूसे “डादा खाल्से थुर्जी” भिसी सुड्मा, जम्मासेन “डाइ थुर्बा आहिन” भिसी भिजी। तर पत्रुससे चा “गुरु, हाडडा म्हिंगदेसे तोर हुइ मार हुइ लबान मुला” भिसी भिजी। 46 तर येशूसे

“आहिन, डादा खालैसे थुर्बा मुला, तिग्दा भिसम डाग्याम डाला शक्ति थोन्सी निबा डाइ था याङ्जी” भिसी सुङ्जी। 47 जमाहेन्से थे म्रिडम्हेमेसे हाड लासी चिबारी आतनम भिसी फितफित धर्बान येशूला डाच्छापट्टि खसी फ्या लबान येशूदा तिग्दा थुर्जी ओच्छे थुर्मैछ्याम हाड खाहड लसी खमजी भिबा ताम जम्मान म्हिगदेला डाच्छापट्टि पाङ्जी। 48 ओच्छे येशूसे थे म्रिडम्हेमेदा “झामे, एला विश्वाससे लमा ए खम्बा मुला, ए ढुक्क तसी निउ” भिसी सुङ्जी।

49 येशूसे ताम लबान लबा धुइरी याइरसला दिमग्याम म्हि गिक खसी याइरसदा “हाडला झामे सिसी जिन्जी। दाहेन्से गुरुदा दुख थापिन्गो” भिसी भिजी। 50 तर येशूसे याइरसदा “थालोङ्गो, एसे विश्वास जे लउ, ओच्छे एला झामे सोला” भिसी सुङ्जी।

51 याइरसला दिमरी धोमाहेन्से येशूसे पत्रुस, याकूब, यूहन्नादेन थे माइला आबादेन आमादा बाहेक स्यूहान्दो खालैदान दिम न्हडरी खआपुङ्नी। 52 याइरसला दिमरी पोप तबा म्हिगदे थे माइ सिजी भिसी क्राबा क्रिङ्बा लसी चिबा मुबा। येशूसे थेनीगदेदा “थाक्रागो, थे सिबा आरे, म्हेर्सी चिबा मुला” भिसी सुङ्जी। 53 येशूला ताम थे:सी थेनीगदेसे डे:बान येशूदा खिसी लजी। तिग्दा भिसम थे माइ सिसी जिन्बा मुला भिसी थेनीगदेदा था मुबा।

54 तर येशूसे थे माइला यारी चुङ्सी, “माइ, ए रे:गो” भिसी सुङ्मैछ्याम, 55 थे माइला आत्मा दो:सी खजी ओच्छे थे डोड रे:जी। जमाहेन्से येशूसे “चु माइदा चबा सहे पिन्गो” भिसी सुङ्जी। 56 चु म्राङ्सी थे माइला आबादेन आमा उदेक तजी। तर येशूसे थेनीगदेदा “चु ताम खालैदा थापाङ्गो” भिसी कुल्जी।

9

येशूसे हाडला च्युक न्ही चेलागदेदा पुइबा
मत्ती १०:५-१५; मर्कूस ६:७-१३

1 जमाहेन्से येशूसे हाडला च्युक न्ही चेलागदेदा ड्योइसी थेनीगदेदा म्हडगदे तापूबादेन रोगगदे म्हाना लबा शक्तिदेन अधिकार पिन्सी, 2 परमेश्वरला य्हुल्साला समाचार थे:ना लबारी ओच्छे आखम्बा म्हिगदेदा खम्ना लबारी पुड्जी। 3 ओच्छे येशूसे थेनीगदेदा चुहड् भिसी सुड्जी, “एनीगदेसे ग्यामला लागिरी कडी, झोला, चबा सहे, टाडगा ओच्छे पोबा क्वान तिगै थाभोर्गो। 4 जुन दिमला म्हिगदेसे एनीगदेदा मान लला, थे नाम्साग्याम थोनसी आनितेधोना एनीगदे थे दिमरीन चिउ। 5 तर जुन ग्लाला म्हिगदेसे एनीगदेदा मान आल, एनीगदे थे शहरग्याम थोन्बा धुइरी दाहेन्से डन्से लतो:बा गे लसी जिन्जी। एनीगदेसे तिग लतो:बा लउ भिसी काडला धुलु खर्सी पिन्गो।”*

6 जमाहेन्से चेलागदे नाम्सा नाम्सारी निसी परमेश्वरला य्हुल्साला समाचार थे:ना लबान आखम्बा म्हिगदेदा खम्ना लजी।

येशूला बारेरी थे:सी हेरोद ग्ले अलमल तबा

मत्ती १४:१-१२; मर्कूस ६:१४-२९

7 चु जम्मान गेला बारेरी थे:सी गालील अञ्चलरी शासन लबा हेरोद अलमल तजी। तिग्दा भिसम कोइ कोइ म्हिसे येशूदा “बपत्तिस्मा पिन्बा यूहन्ना सिबाग्याम सोसी खजीम” भिसी भिबा मुबा। 8 कोइ कोइसे चा “एलिया दो:सी खजीम” भिसी भिबा मुबा। ओच्छे स्यूहान्दो कोइ कोइसे चा “ओन्माला अगमवक्तागदे न्हडरी गिक सिबाग्याम सोसी खजीम” भिसी भिबा मुबा।* 9 थेतबासेलमा हेरोद ग्लेसे “चुहड्बा उदेकला गे लबा म्हि खाल हिन्ना? तिग्दा भिसम यूहन्नाला थोबो मी डाइनोन आपुड्बा हिन्ना” भिसी भिजी। ओच्छे थेसे तिरेम येशूदा स्यापूबा सेम लजी।

* 9:5 लूका १०:४-११; मुल १३:५१

* 9:8 मत्ती १६:१४; मर्कू ८:२८; लूका ९:१९

येशूसे हजार डा म्हिगदेदा चबा सहे पिन्बा

मत्ती १४:१३-२१; मर्कूस ६:३०-४४; यूहन्ना ६:१-४

10 येशूसे परमेश्वरला यहुल्साला समाचार थे:ना लबारी पुइबा मुल चेलागदे दो:सी खसी थेनीगदेसे लबा जम्मान गे येशूदा पाङ्जी। जमाहेन्से येशूसे थेनीगदेदा जे भोर्सी बेथसेदा भिबा शहररी फेप्जी। 11 तर चु ताम था याङ्सी महिला हुल येशू मुबा ग्लारी निजी। जमाहेन्से येशूसे थेनीगदेदा खपुङ्जी। ओच्छे म्हिगदेदा परमेश्वरला यहुल्साला समाचार थे:ना लबान आखम्बा म्हिगदेदा खम्ना लजी।

12 धिनी घल्बारी छ्याइमाहेन्से च्युक नही चेलागदे येशू मुबा ग्लारी खसी येशूदा “म्हिगदेदा चुग्याम निपुङ्गो। तिग्दा भिसम चु ग्लारी तिगै आरे। थेतबासेलमा थेनीगदे क्यारमारला नाम्सारी निसी चबा थुङ्बादेन चिबा ग्ला ठिकना लगै” भिसी भिजी।

13 तर येशूसे थेनीगदेदा “एनीगदेसेन चुगदेदा चबा सहे पिन्गो” भिसी सुङ्मा, थेनीगदेसे “डन्देन छ्याम गोर डा गेडदेन तार्डा नही जे मुला। आतसम डनी निसी चु जम्मान म्हिगदेला लागिरी चबा सहे ग्लुसी भतो:ला” भिसी भिजी।

14 थेरी हजार डा ते चा हेम्फेबे जे मुबा। ओच्छे येशूसे हाडला चेलागदेदा “म्हिगदेदा बोगल नहीसे च्युइला लाम लसी चिपुङ्गो” भिसी सुङ्जी।

15 ओच्छे चेलागदेसे येशूसे सुङ्बा हङ्गोन लसी चिपुङ्जी। 16 जमाहेन्से येशूसे गोर डा गेडदेन तार्डा नही छ्यारी थोसी स्वर्गपट्टि सहीसी परमेश्वरदा धन्यवाद पिन्जी। ओच्छे येशूसे गेडदेन तार्डा क्युइसी म्हिगदेदा भो लसी पिन्गो भिसी चेलागदेदा कुलजी। 17 जमाहेन्से जम्मान म्हिगदेसे मेन्ना चसीनोन लेङ्बा भ्राइभुइ चेलागदेसे दुइमा च्युक नही सोली तजी।

येशू परमेश्वरला म्हि ख्रीष्ट हिन्ना

मत्ती १६:१३-१९; मर्कूस ८:२७-२९

18 तिरेकुनु येशू गिक जेन प्रार्थना लसी धन्छ्याबा मुबा। थे धुइरी थेला चेलागदेएनोन छ्यामनोन मुबा। ओच्छे येशूसे थेनीगदेदा “म्हिगदेसे डादा खाल भिबा चीम?” भिसी ड्योइमा, 19 थेनीगदेसे “हाडदा खालैसे बपत्तिस्मा पिन्बा यूहन्ना भिबा मुला, खालैसे एलिया, ओच्छे स्य्हान्दोगदेसे चा ओन्माला अगमवक्तागदे न्हडला गिक सिबाग्याम सोसी खजीम भिबा मुला” भिसी जोहाब पिन्जी।* 20 जमाहेन्से येशूसे दोःसी चेलागदेदा “तर एनीगदेसे चा डा खाल भिसी म्हन्मुला?” भिसी ड्योइमा, पत्रुससे “हाड परमेश्वरसे पुइखबा थाबा पिन्बा ख्रीष्ट हिन्ना” भिसी जोहाब पिन्जी।*

21 जमाहेन्से येशूसे, “च्यागो, एनीगदेसे चु ताम खालैदा थापाङ्गो” भिसी कुल्जी। 22 ओच्छे येशूसे थेनीगदेदा “परमेश्वरसे पुइखबा म्हिसे ल्हानान दुख नातोःला। ओच्छे यहूदी गन्बागदे, परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसे बिरोध लसी साइला। तसेनोन थेदा सिबाग्याम सोमरेमाकुनु सोना लला” भिसी सुङ्जी।

चेलागदेसे नातोःबा दुख

मत्ती १६:२४-२८; मर्कूस ८:३४-९:१

23 जमाहेन्से येशूसे थेरी मुबा जम्मान म्हिगदेदा चुहड् भिसी सुङ्जी, “खालै म्हि डाला चेला दोबा सेम मुसम थेसे हाडला ज्याननोन माया मारब लसी हाडला क्रुस हाडसेन धिन धिननोन पुइसी डादेन छ्याम भ्रगै।* 24 तिगदा भिसम जुन म्हिसे हाडला ज्यान जोगब लबारी म्हाइला, थे म्हिसे चा जुकजुकधोनाला जुनी

* 9:19 मत्ती १४:१-२; मर्कू ६:१४-१५; लूका ९:७-८ * 9:20 यूह ६:६८-६९ * 9:23 मत्ती १०:३८; लूका १४:२७

आयाड्। तर डाला लागिरी हाडला ज्ञाननोन पिन्खम्बा म्हिसे चा जुकजुक धोनाला जुनी याड्ला।* 25 चुदे खालै म्हिसे जम्बुलिडनोन यारी किन्सी थेला ज्ञाननोन निजी भिसम तिग ज्यबा तला? 26 ओच्छे खालै म्हि डादेन डाला तामरी पे:जी भिसम परमेश्वरला स्वर्गदूतगदेदेन छ्याम परमेश्वरसे पुइखबा म्हि डाला आबा परमेश्वरला य्हालदेन शक्तिरी खमा थेदा हाडला भिबारी पे:ला। 27 तर एनीगदेसे डाला ताम ड्यान्गो, चुरी मुबा म्हिगदे न्हडला कोइ कोइ म्हि चा परमेश्वरला य्हुल्सा आम्राड्तेधोना आसि।”

येशूला स्य्हाल पोबा

मत्ती १७:१-८; मर्कूस ९:२-८

28 येशूसे चु ताम सुड्सी भे:रे तमा पत्रुस, यूहन्नादेन याकूबदा प्रार्थना लबारी गडरी भोर्सी फेपजी। 29 थेरी येशू प्रार्थना लबान लबा धुइरी येशूला स्य्हाल पोजी। ओच्छे येशूला क्वान धिनीला स्हेर हड्बान य्हाल य्हाल तजी 30 ओच्छे म्हि न्ही येशूदेन छ्याम ताम लबा म्राड्जी। थे म्हि न्ही मोशादेन एलिया मुबा। 31 थेनीगदेला स्य्हाल य्हाल य्हाल तबा मुबा। ओच्छे येशू यरूशलेमरी सितो:ला भिबा तामला बारेरी येशूदेन छ्याम ताम लबान मुबा।

32 थे धुइरी चा पत्रुस ओच्छे थेदेन छ्याम मुबागदे म्हेर्बा मुबा। थेनीगदे फातछोर्मा येशू स्वर्गला य्हालरी ओच्छे स्य्हान्दो म्हि न्हीएनोन येशूदेन छ्याम राप्सी चिबा म्राड्जी। 33 ओच्छे थे म्हि न्ही येशू मुबाग्याम दो:सी निबारी छ्याइमा पत्रुससे “गुरु, य्हाड चुरी मुबा ज्यबा तजीम। दाहेन्से डन्से चुरी छाप्रो सोम सहोइ, गिक हाडला लागिरी, गिक मोशाला लागिरी ओच्छे गिक एलियाला लागिरी” भिसी भिजी। तर पत्रुसदा तिग ताम पाड्तो:बा थे था आरेमुबा। 34 पत्रुससे चुहड् पाड्ना पाड्ना खसु खसी थेनीगदेदा घपजी। चु म्राड्सी चेलागदे लोड्जी। 35 ओच्छे खसु न्हडग्याम

* 9:24 मत्ती १०:३९; लूका १७:३३; यूह १२:२५

चुहड्बा काइ थे:जी, “चु डाइ धम्बा डाला झा हिनना, चुसे भिबा ताम एनीगदेसे डयान्गो।”^{* 36} चु काइ थे:सी जिन्माहेन्से चेलागदेसे थेरी येशूदा जे म्राड्जी। जमाहेन्से थेनीगदे कुटिसी चिजी। ओच्छे थेनीगदेसे म्राड्बा चु ताम थे धुइरी खालैदा आपाड्नी।

येशूसे म्हडसे स्याप्बा म्हिदा खम्ना लबा

मत्ती १७:१४-१८; मर्कूस ९:१४-२७

³⁷ न्हडगरदड येशू हाडला चेलागदेदेन छ्याम गडग्याम मार फेप्खबा धुइरी महिला हुल गिक येशूदा स्याप्बारी खजी।
³⁸ ओच्छे थे महिला हुल न्हडग्याम म्हि गिकसे क्रिड्बान भिजी, “गुरु, डाला झादा च्यासी पिन्गो, तिग्दा भिसम चु डाला गिक जेन झा हिनना! ³⁹ थेदा म्हडसे घरिघरि चुड्मुला, ओच्छे थे क्रिड्सी सिबा तेबान तमुला। जमाहेन्से थेला सुडग्याम बोप्स्या ते:बा मुला, ओच्छे थे म्हडसे लछार पछार आलतेधोना थेदा आख्लामुला। ⁴⁰ डाइ थे म्हड ताप्सी पिन्गो भिसी हाडला चेलागदेदा भिजी, तर थेनीगदेसे म्हड ताप्आखम्नी।” ⁴¹ जमाहेन्से येशूसे थेनीगदेदा “विश्वास आलबादेन नइबा सेम थोबा म्हिगदे, खाइमाधोना डा एनीगदेदेन छ्याम तला? खाइमाधोना डाइ एनीगदेदा नासे?” भिसी सुड्जी। ओच्छे येशूसे थे म्हिदा “एला झादा चुरी भउ” भिसी सुड्जी। ⁴² ओच्छे थेसे हाडला झादा भना भनान थेला झादा थे म्हडसे चुड्सी भ्याड्जी। तर येशूसे थे म्हडदा बड्सी थे कोलादा खम्ना लसी थेला आबादा पिन्जी।
⁴³ परमेश्वरला शक्ति म्राड्सी थेरी मुबा म्हिगदे उदेक तजी।

दो:सी येशूसे हाड खाहड् लसी सिला भिसी सुड्बा

मत्ती १७:२२-२३; मर्कूस ९:३०-३२

* 9:35 २ पत्रु १:१७-१८; यशै ४२:१; मत्ती ३:१७; १२:१८; मर्कू १:११; लूका ३:२२

ओच्छे थेरी मुबा म्हिगदे येशूला गे म्राड्सी उदेक तसी चिबा धुइरी येशूसे हाडला चेलागदेदा, ⁴⁴ “च्यागो, परमेश्वरसे पुइखबा म्हिदा चुड्सी म्हिगदेला यारी जिम्मा पिन्ना। एनीगदेसे चु ताम खाइमै थाम्ले:गो” भिसी सुड्जी। ⁴⁵ तर चेलागदेसे चु ताम आघोनी। तिग्दा भिसम थेनीगदेसे चु ताम घोखम्बा ज्ञान आयाड्बासे लमा येशूसे तिग सुड्जी भिसी म्हन्बारीनोन आखम्नी। ओच्छे थेनीगदे लोड्बासे लमा चु तामला अर्थ तिग भिसी येशूदा ड्योइबारी आखम्नी।

जम्मान भन्दा घेन खाल?

मत्ती १८:१-५; मर्कूस ९:३३-४०

⁴⁶ थे धुइरी चेलागदे ह्वाड ह्वाड न्हडरी खाल घेन भिसी ताम लबान मुबा।* ⁴⁷ येशूसे थेनीगदेला सेमला ताम था याड्सी कोला गिकदा ह्वाडला डामरी भसी थेनीगदेदा चुहड् भिसी सुड्जी, ⁴⁸ “च्यागो, जुन म्हिसे चुहड्बा कोलादा डाला मिनरी वास्ता लला, थेसे डादाएनोन वास्ता लला, डादा वास्ता लबासे डादा पुइखबा डाला आबादाएनोन वास्ता लला। ओच्छे एनीगदे न्हडरी जुन म्हि जम्मान भन्दा जजा मुला, थेनोन घेन तला।”*

⁴⁹ जमाहेन्से यूहन्नासे, “गुरु, डन्से ह्वाडला मिनरी म्हि गिकसे म्हड तापूबा म्राड्जी। तर डन्से थेदा थेहड् लआपुड्नी, तिग्दा भिसम थे डनी हड् ह्वाडदेन छ्याम आभ्रमुला।” ⁵⁰ तर येशूसे थेनीगदेदा “एनीगदेसे थेहड् थालउ, तिग्दा भिसम जुन म्हिसे एनीगदेला बिरोध आल थे म्हि एनीगदेपट्टिला हिन्ना” भिसी सुड्जी।

सामरीगदेसे येशूदा चिआपुड्बा

* 9:46 लूका २२:२४ * 9:48 मत्ती १०:४०; लूका १०:१६; यूह १३:२०

51 जमाहेन्से येशूसे हाड स्वर्गरी फेपबा धुइ तबासे लमा यरूशलेमरी निनोन तोःला भिसी पक्का लजी। 52 ओच्छे येशूसे कोइ कोइ समाचार भोर्बा म्हिगदेदा डाच्छान जम्मान ताम तयार लबाला लागिरी सामरियाला नाम्सा गिकरी पुइजी। 53 येशू यरूशलेमरी फेपबारी छ्याइबा ताम था याइसी सामरिया नाम्साला म्हिगदेसे येशूदा चिआपुइनी। 54 चु म्नाइसी येशूला चेला याकूबदेन यूहन्नासे, “प्रभु, डन्से स्वर्गग्याम मे ताइना लसी थेनीगदेदा नाश लगै भिसी भिउ भिबा हाडला सेम मुला?” भिसी भिमा,* 55 येशू चेलागदेपट्टि दोःसी थेनीगदेदा बड्जी।† 56 जमाहेन्से येशू हाडला चेलागदेदा भोर्सी अर्गु नाम्सापट्टि फेपजी।

विश्वासीगदेदेन छ्याम ततोःबा गुण

मत्ती ८:१९-२२

57 ओच्छे येशू हाडला चेलागदेदेन छ्याम यरूशलेमपट्टि फेपबान लबा धुइरी म्हि गिक खसी येशूदा “हाड खानडदमान फेपसे डाएनोन हाडदेन छ्याम निला” भिसी भिजी।

58 जमाहेन्से येशूसे थेदा “च्यागो, ल्हुन्दीगदे चिबारी ऊ मुला, ओच्छे चरागदे चिबारीनोन जड मुला, तर परमेश्वरसे पुइखबा म्हिदा बल्पबा न्हबारीनोन ग्ला आरे” भिसी सुइजी।

59 ओच्छे स्य्हान्दो म्हि गिकदा येशूसे “डादेन छ्याम भ्रउ” भिसी सुइजी। तर थेसे “प्रभु, डाच्छा डाला सिबा आबादा ल्हुसी हाडदेन छ्याम भ्रला” भिसी भिजी। 60 येशूसे थेदा “सिबागदेदा सिबागदे हड्बासेन ल्हुगै तर ए चा निसी परमेश्वरला य्हुल्साला समाचार थेःना लउ” भिसी सुइजी।

* 9:54 २ राजा १:९-१६ † 9:55 कोइ कोइ ग्रीक बाइबलरी चु ताम कापबा मुला: ओच्छे येशूसे थेनीगदेदा “एनीगदेला सेम खाहड्बा ततोःमुला भिसी एनीगदेसे अझ घोबा आरेम। डा परमेश्वरसे पुइखबा म्हि मी म्हिगदेदा साइबारी खबा आहिन, तर थेनीगदेदा थार्बा पिन्बारी खबा हिनना” भिसी सुइजी।

61 दोःसी स्य्हान्दो म्हि गिक येशू मुबा ग्लारी खसी, “डाएनोन हाडदेन छ्याम भ्रला, तर डाच्छा डा दिमरी निसी जम्मादान डा येशूदेन छ्याम निजी भिसी पाङ्सी खला” भिसी भिजी।* 62 थेदा येशूसे, “मोडबा धुइरी ग्याप दोःसी च्याबा म्हि चा परमेश्वरला य्हुल्सारी गे आखेल” भिसी सुङ्जी।

10

येशूसे बोगल सोमसे च्युक न्ही चेलागदेदा परमेश्वरला य्हुल्साला समाचार थेःना लबारी पुइबा

1 जमाहेन्से येशूसे स्य्हान्दो बोगल सोमसे च्युइ चेलागदेदा धम्जी। ओच्छे हाड फेप्वारी छ्याइबा नाम्सादेन शहररी हाड फेप्वबा भन्दा डाच्छा थेनीगदेदा गोर न्ही न्ही लसी पुइजी। 2 पुइबा धुइरी येशूसे थेनीगदेदा चुहङ् भिसी सुङ्जी, “च्यागो, बाली मी ल्हानान मिन्बा मुला, तर बाली दुइबा म्हिगदे ल्हाना आरे। थेतबासेलमा बाली दुइबा म्हिगदे पुइखउ भिसी बालीला दोप्ता प्रभुदेन छ्याम प्रार्थना लउ।* 3 दाहेन्से एनीगदे निउ। डाइ एनीगदेदा फार्बागदेला गुडरी ग्युला कोलादा पुइबा हङ् लसी पुइला।* 4 ओच्छे एनीगदेसे टाङ्गा, झोला, लखम तिगै थापुइगो। ओच्छे ग्यामरी खालैदेन छ्याम ल्हाना ताम थालउ।

5 “ओच्छे एनीगदे जुन दिमरी वाङ्ला डाच्छा ‘थे दिमला म्हिदा शान्ति तगै’ भिसी मोलम पिन्गो। 6 थे दिमरी एनीगदेदेन छ्याम ढिक्बा म्हि मुसम थेनीगदेसे शान्ति याङ्ला। तर एनीगदेदेन छ्याम ढिक्बा म्हि आरेसम एनीगदेसे पिन्बा मोलम एनीगदेदान दोःसी खला। 7 ओच्छे थेनीगदेसे एनीगदेदा जस्तो चबा स्हे पिन्सै चबा थुङ्बा लसी थेनोन दिमरी चिउ। तिग्दा भिसम गे लबा म्हिसे

* 9:61 १ राजा १९:२० * 10:2 मत्ती ९:३७-३८ * 10:3 मत्ती १०:१६

ज्याला याड्तो:मुला। ओच्छे एनीगदे दिम दिमरी वाड्सी ज्यबा ज्यबा चबा सहे म्हाइसी थाभ्रउ।*

8 “थेहड् लसी एनीगदे शहरगदेरी निबा धुइरी थे शहरला म्हिगदेसे मान लसी चबा थुड्बारी पिन्बा सहे चउ। 9 ओच्छे थेरी आखम्बा म्हिगदेदा खम्ना लउ, ‘ओच्छे परमेश्वरला य्हुल्सा खसी जिन्बा मुला’ भिसी थेनीगदेदा पाड्गो। 10 तर खजिबै शहररी एनीगदे निमा थे शहरला म्हिगदेसे एनीगदेदा मान आलनी भिसम थे शहरला ग्यामरी थोन्सी, 11 ‘डन्से डन्ना काडरी भेर्बा एनीगदेला नाम्साला धुलु सुतै एनीगदेलान नाम्सारी खर्बा मुला। तिग्दा भिसम डन्से पाड्बा ताम एनीगदेसे आड्यान्नी। तर च्यागो, परमेश्वरला य्हुल्सा खसी जिन्बा मुला भिबा एनीगदेसे था याड्गो’ भिसी थेनीगदेदा पाड्गो। 12 एनीगदेसे डाला ताम ड्यान्गो, परमेश्वरसे निसाफ लबा धिनकुनु थे शहरला म्हिगदेला गति भन्दा मी सदोम† शहरला म्हिगदेला गति नाखम्बा तला।

येशूसे विश्वास आलबा शहरला म्हिगदेदा बड्बा

मत्ती ११:२०-२७; १३:१६-१७

13 “खोराजीनदेन बेथसेदाला म्हिगदे, एनीगदेसे परमेश्वरग्याम सजाय याड्ला। तिग्दा भिसम एनीगदेला नाम्सारी लबा हड्बा उदेकला गेगदे टुरोसदेन सीदोन शहररी लबा हिन्सम ओन्मान थेनीगदेसे बोरा क्वान्सी मेफ्रा फोर्सी ह्वाड ह्वाडला पाप ख्लासी परमेश्वरपट्टि दो:सेला मुबा 14 तर परमेश्वरसे निसाफ लबा धुइरी एनीगदेला गति भन्दा टुरोसदेन सीदोनला म्हिगदेला गति नाखम्बा

* 10:7 १ कोर ९:१४; १ तिमो ५:१८ † 10:12 उत्पत्ति १९:२३-२९ “सदोम” भिबा चा शहर हिन्ना। थेदा परमेश्वरसे नाश लजी। तिग्दा भिसम थे शहररी ल्हानान नइबा गेगदे लमुबा। चु ताम, मत्ती ११:२३-२४; लूका १०:१२, १७:२९; रोमी ९:२९; २ पत्रुस २:६; यहू १:७; उन्बा ११:८ पदरीएनोन मुला।

तला। 15 कफर्नहुमला म्हिगदे, तिग एनीगदे स्वर्गरीन धोला भिसी म्हनमुला? आधो! एनीगदेदा मी नर्गरी भयाड्ला।”

16 येशूसे हाडला चेलागदेदा “एनीगदेला ताम ड्यानबासे डाला तामदाएनोन ड्यानना, एनीगदेला ताम आड्यानबासे डाला तामएनोन आड्यान। ओच्छे डाला ताम आड्यानबासे डादा पुइखबाला तामएनोन आड्यान” भिसी सुड्जी।

येशूसे पुइबा बोगल सोमसे च्युक न्ही चेलागदे दोःसी खबा

17 येशूसे पुइबा बोगल सोमसे च्युइ न्ही चेलागदे ताड्बान येशू मुबा ग्लारी खसी, “प्रभु डन्से हाडला मिनरी म्हडगदेदा कुल्मा थेनीगदेसे ड्यानजी” भिसी भिजी। 18 ओच्छे येशूसे थेनीगदेदा “डाइ शैतानदा स्वर्गग्याम तिप्लीड हड् लसी ताइबा म्राड्जी। 19 ओच्छे डाइ एनीगदेदा पुख्रीदेन बिच्छीदा नाड्सी भ्रबादेन एनीगदेदा हाडला शत्रुगदेला जम्मान शक्तिदा ढाबा अधिकार पिन्बा मुला। थेतबासेलमा एनीगदेदा तिगै सहेसेएनोन न्होड्ना लआखम। 20 तसेनोन म्हडगदेदा हाडला धिरी थान्म्याड्जी भिसी एनीगदे थाताड्गो। तर हाडला मिन स्वर्गरी भ्रिबा मुला भिसी एनीगदे ताड्गो” भिसी सुड्जी।

येशूसे पिन्बा धन्यवाद

मत्ती ११:२५-२७; १३:१६-१७

21 थेनोन धुइरी येशूथोरी परमेश्वरला आत्मा फेपखजी। ओच्छे येशू ताड्सी, “मुदेन जम्बुलिडला प्रभु आबा, हाडदा धन्यवाद मुला, तिगदा भिसम हाडसे ज्ञान बुद्धि मुबा म्हिगदेदेन सेबा घोबा म्हिगदेग्याम छुम्सी थान्बा ताम तिगै आसेबा म्हिगदेदा उन्सी पिन्जी। हिन्ना आबा, चुहड् लमान हाड ताड्जी।

22 “डाला आबासे डादा जम्मान सहे जिम्मा पिन्बा मुला। ओच्छे डा खाल भिसी डाला आबादा बाहेक स्य्हान्दो खालैदा

था आरे। थेहड् लसीन आबा खाल भिसी झादेन झासे आबादा डोसेना लबा म्हिगदेसे बाहेक स्य्हान्दो खालैदान आबा खाल हिन्ना भिसी था आरे।”

²³ जमाहेन्से येशू हाडला चेलागदेपट्टि दोःसी थेनीगदेदा जे चुहड् भिसी सुड्जी, “एनीगदेसे म्राड्बा मुला, चु ताम म्राड्बागदे चा परमेश्वरग्याम मोलम याड्बा म्हिगदे हिन्ना। ²⁴ तिगदा भिसम ल्हानान अगमवक्तागदेदेन ग्लेगदेसे एनीगदेसे म्राड्बा चु तामगदे च्याबारी महाड्मुबा। तर थेनीगदेसे आम्राड्नी, ओचछे एनीगदेसे थेःबा ताम थेनीगदेसे थेःबारी महाड्जी, तर थेःबारी आम्याड्नी।”

ज्यबा खिमजेम

मत्ती २२:३४-४०; मर्कुस १२:२८-३४

²⁵ तिरेकुनु यहूदी धर्मगुरु गिक येशू मुबा ग्लारी खसी येशूला सेम च्याबारी थेसे “गुरु जुकजुकधोना आसिबा जुनी याड्बारी डाइ तिग लतोःला?” भिसी ड्योड्मा, ²⁶ येशूसे थेदा “परमेश्वरसे मोशादा पिनबा ठिमरी तिग भिबा मुला? एसे पढब लबा आरे?” भिसी सुड्जी। ²⁷ जमाहेन्से थेसे येशूदा “हाडला सेमहेन्सेन, हाडला प्राणसे, हाडला बुद्धिसे ओचछे हाडला शक्तिसे एसे परमप्रभु हाडला परमेश्वरदा माया लउ। ओचछे एसे हाडला खिमजेमदा हाडदा हड्दोन माया लउ” भिसी भिबा मुला। ²⁸ भिसी भिमा, येशूसे थेदा “एसे ठीक भिजी दाहेन्से एसे थेहड्दोन लउ। जमाहेन्से ए जुकजुकधोना सोला” भिसी सुड्जी। ²⁹ तर थे म्हिसे हाडसे हाडदान डा ठीक मुला भिसी उनबाला लागिरी “थेहड् भिसम डाला खिमजेम खाल हिन्ना?” भिसी येशूदा ड्योड्जी।

³⁰ जमाहेन्से येशूसे थेदा चुहड् भिसी सुड्जी, “च्यागो, म्हि गिक यरूशलेमग्याम यरीहो भिबा ग्लापट्टि निबान लमा थेदा यहोगदेसे स्याप्सी लिगन्डीन लसी सिबाधोनान तोजी। ³¹ ओचछे छिन्ड लिच्छा परमेश्वरला मन्दिररी पूजा लबा म्हि थेग्यामसेन

खजी। तर थेसे थे यहोगदेसे तोसी सिबा तेबान तबा म्हिदा
 म्राड्सीनोन आम्राड्बा सहोसी निजी। ³² थेहड् लसीन स्य्हान्दो
 लेवी गिकएनोन थेग्यामसेन खजी थेसेनोन थे सिबा तेबान तबा
 म्हिदा म्राड्सीनोन आम्राड्बा सहोसी निजी। ³³ तर स्य्हान्दो
 सामरी यहुलला[†] म्हि गिकएनोन थेग्यामसेन खजी। थे सिबा तेबान
 तबा म्हिदा म्राड्सी थेदा ल्हानान दया रे:जी। ³⁴ जमाहेन्से थे सिबा
 तेबान तबा म्हि मुबा ग्लारी निसी थेसे थे महिला पोरगदेरी छ्युगुदेन
 अडगुरला निडगु फोर्सी क्वानगेनसे खीजी। ओच्छे थेसे थे म्हिदा
 हाडलान गधाथोरी थान्सी म्हिगदे बास चिबा पाटी गिकरी भोर्सी
 म्हुन गिक हाडसेन थे महिला सयार लजी। ³⁵ न्हडगरदड निबा
 धुइरी थेसे थे पाटीला धनीदा म्हुइला डबल न्ही पिन्सी थेसे 'ज्यना
 लसी चुला सयार लउ, अझ खर्च ल्हानान निसम डा दो:सी खमा
 हाडदा पिन्ना' भिसी भिजी।”

³⁶ येशूसे थेदा “एला बिचाररी चु म्हि सोम न्हडरी खजिबा चा
 थे यहोसे स्याप्बा महिला खिमजेम तजी?” भिसी ड्योइमा, ³⁷ थेसे
 येशूदा “थे यहोगदेसे तोबा म्हिदा दया लबा म्हि” भिसी भिजी।

ओच्छे येशूसे थेदा “दाहेन्से निसी एसेनोन थेहड्नुन लउ”
 भिसी सुड्जी।

येशू मार्थादेन मरियमला दिमरी फेप्बा

³⁸ ओच्छे येशू हाडला चेलागदेदेन छ्याम फेप्बान लमा नाम्सा
 गिकरी धोजी, थे नाम्सारी मुबा मार्था भिबा म्रिडम्हेमेसे येशूदा
 हाडला दिमरी ड्योइजी। ³⁹ थे म्रिडम्हेमेला मरियम भिबा आडा
 गिक मुबा, थे चा येशूला डामरी चिसी येशूला ताम ड्यानमुबा।
⁴⁰ मार्था चा येशूदा क्योड्बाला लागिरी चबा सहे सहेबा गेरी
 कोल्सी चिबा मुबा। ओच्छे थे येशूला डामरी खसी, “प्रभु, चबा सहे

† 10:33 “सामरी यहुल” चा यहूदीगदेला लागिरी जजा यहूलला म्हि हिनना।

स्होबारी आडासे डादा ह्यो आलबा हाडसे म्राड्बा आरे? हाडसे डादा ह्यो लबारी निउ भिसी थेदा सुड्सी पिन्गो” भिसी भिजी।
 41 तर येशूसे थेदा “मार्था, ए ल्हानान तामरी धन्दा सुर्दा जे लमुला।
 42 तर तोःबा सहे गिक जेन मुला, थेनोन सहे मरियमसे धम्बा मुला।
 थेतबासेलमा थेग्याम चु आब्यन” भिसी सुड्जी।

11

येशूसे प्रार्थना लबारी लोप्बा

मत्ती ६:९-१३; ७:७-११

1 तिरिकुनु येशूसे ग्ला गिकरी प्रार्थना लबान मुबा। येशूसे प्रार्थना लसी जिन्माहेन्से थेला चेला गिकसे “प्रभु, यूहन्नासे हाडला चेलागदेदा प्रार्थना लबारी लोप्सी पिन्बा हड् लसी डन्दाएनोन प्रार्थना लबारी लोप्सी पिन्गो” भिसी भिमा, 2 येशूसे थेनीगदेदा “एनीगदेसे चुहड् लसी प्रार्थना लउ” भिसी सुड्जी,

“परमेश्वर आबा,

हाडदां जम्मासेन मान लगै,

ओच्छे जम्मानथोरी हाडला शासन खगै।

3 डन्से धिन धिननोन चतोःबा सहे डन्दा धिन धिननोन पिन्गो।

4 डन्ना पाप माफ लसी पिन्गो।

तिग्दा भिसम डन्सेनोन डन्दा बिरोध लसी पाप लबागदेदा माफ लबा मुला।

ओच्छे डन्दा पापरी फसब तबा ग्यामरी भ्रआपुड्गो।”

5 जमाहेन्से येशूसे हाडला चेलागदेदा दोःसी चुहड् भिसी सुड्जी, “एनीगदे न्हडरी खालैला ह्यो गिक मुला भिसी म्हन्गो। थे म्हुन गुडरी थे ह्यो मुबा ग्लारी निसी ‘डादा गोर सोम गेड भउले ज्योज्यो, 6 डाला दिमरी थारेडग्याम डोन्बो गिक खबा मुला।

† 11:2 चु पदरी ग्रीक बाइबलरी “हाडला छानदा मान लगै” भिसी भिबा मुला। तर मुल अर्थ चा परमेश्वरदा मान तगै भिबा हिन्ना।

दान्दे डादेन छ्याम चबा सहे तिगै आरे' भिसी भिमा, ⁷ थेला ह्योसे दिम न्हडग्यामसेन 'डा प्राप हुड्सी कोलागदेदेन छ्याम म्हेसी जिनजी। थेतबासेलमा डादा दुख थापिन्गो। दान्दे डा रे:सी एदा तिगै पिन्आखम' भिसी भिजी। ⁸ तर डाइ एनीगदेदा पाड्ला, थे ह्योसे थेदा ह्यो म्हन्सी तिगै आपिन्सैनोन थेसे हीबाला हीबान लमाहेन्से थे रे:सी थेदा तो:तेधोना पिन्ना।

⁹ “थेतबासेलमा एनीगदेसे डाला ताम ड्यानगो, हीसम पिन्ना, म्हाइसम स्याप्ला ओच्छे प्रापरी ढ्वक ढ्वक लसम एनीगदेला लागिरी प्राप ठोड्सी पिन्ना। ¹⁰ तिग्दा भिसम जुन म्हिसे हीला थेदा पिन्ना, ओच्छे जुन म्हिसे म्हाइला थेसे स्याप्ला ओच्छे जुन म्हिसे प्रापरी ढ्वाक ढ्वाक लला थेदा प्राप ठोड्सी पिन्ना।

¹¹ “ओच्छे एनीगदे न्हडरी खाल्ला आबासे चा हाडला कोलासे गेड हीमा युडबा, तार्डा हीमा पुखी, ¹² ओच्छे नागाफुम हीमा बिच्छी पिन्ना? आपिन। ¹³ एनीगदे पापी तसीनोन हाडला कोलागदेदा ज्यबा सहे पिन्बारी सेमुला भिसम एनीगदेला स्वर्गरी मुबा परमेश्वर आबासे थेदेन छ्याम हीबागदेदा गाते ल्हाना लसी हाडला आत्मा पिन्ना।”

येशूदेन म्हडला ग्ले बालजिबुल

मत्ती १२:२२-२९, ४३-४५; मर्कुस ३:२०-२७

¹⁴ येशूसे म्हडसे स्याप्सी ताइ दोबा महिला ल्हडग्याम थे ताइ दोना लबा म्हड तापजी। जमाहेन्से थे म्हिसे ताम पाड्बारी छ्याइबा म्हाड्सी थेरी मुबा म्हिगदे उदेक तजी। ¹⁵ तर थेनीगदे न्हडरी कोइ कोइसे “चु म्हिसे मी म्हडगदेला ग्ले बालजिबुलला शक्तिग्याम जे म्हडगदे तापबा हिनना” भिसी भिजी। ¹⁶ ओच्छे स्यहान्दो कोइ कोइसे चा येशूला सेम च्याबाला लागिरी “डन्दा स्वर्गला चिनु गिक उन्सी पिन्गो” भिसी भिजी।

17 तर येशूसे थेनीगदेला सेमला ताम था याड्सी थेनीगदेदा “च्यागो, जुन यहुल्साला म्हिगदे हाड हाड न्हडरी तोबा छेबा लला, थे यहुल्सा नाश तला, ओच्छे जुन दिमला म्हिगदे हाड हाड न्हडरीन तोबा छेबा लला, थे दिमएनोन फुप्ला।” 18 थेतबासेलमा शैतानएनोन हाड हाड न्हडरी आढिक्नी भिसम खाहड लसी थेला यहुल्सा टुला? तिग्दा भिसम एनीगदेसे डादा बालजिबुलला शक्तिग्याम म्हड तापबा मुला भिसी भिबा मुला। 19 डाइ बालजिबुलला शक्तिग्याम म्हड तापमुला भिसम एनीगदेला चेलागदेसे चा खाल्ला शक्तिग्याम म्हड तापबा हिन्ना? थेतबासेलमा एनीगदेला गल्ती थेनीगदेसेन उन्ना। 20 तर डाइ परमेश्वरला शक्तिग्याम म्हड तापबा मुला भिसम एनीगदेला गुडरी परमेश्वरला यहुल्सा खसी जिन्बा मुला।

21 ओच्छे भड्बा म्हिसे हतियार थोसी हाडला दिम खुड्जी भिसम थेला मालसामान खालैसे भोरआखम। 22 तर थे भन्दान भड्बा म्हि खजी भिसम थेदा ढासी थेसे भर लबा जम्मान हतियारगदे ब्यन्ना, ओच्छे थेला जम्मान मालसामान ब्यन्सी जम्मादान भो लसी पिन्ना। 23 जुन म्हि डादेन छ्याम आढिक, थे म्हि डाला बिरोधी तला। ओच्छे जुन म्हिसे डादेन छ्याम गे आल थे म्हिसे डाला बिरोधी गे लला।

डाच्छा थोन्सी निबा म्हड दोःसी खमाहेन्से

मत्ती १२:४३-४५

24 “म्हड महिला लहुडग्याम थोन्सी निमाहेन्से थेसे बल्पबा न्हबारी तोडतोडबा ग्लारीक्यार ग्ला म्हाइसी भ्रला, तर थेसे खानडएनोन बल्पबा न्हबा ग्ला आयाड्माहेन्से ‘डा जुन महिला लहुडग्याम थोन्सी खजी थेनोन महिला लहुडरी चिबारी निड’ भिसी दोःसी निला। 25 ओच्छे थे म्हड दोःसी खमा थेसे डाच्छा हाड चिबा ग्ला साडसाडबा प्राड्ला। 26 जमाहेन्से थे म्हड निसी हाड

भन्दा नइबा अर्गु गोर निस म्हडगदे भसी थे म्हि न्हडरी वाड्सी चिमुला। थेतबासेलमा थे म्हिला गति डाच्छाला भन्दा लिच्छाला गति झन नइबा तला।”

सुख याड्बागदे

27 येशूसे चु ताम सुड्बान लमा म्हिला हुल न्हडग्याम क्रिड्बान प्रिडम्हेमे गिकसे “ह्वाडदा न्हसी इहे ख्वाबा आमासे परमेश्वरग्याम मोलम याड्बा मुला,” भिसी भिजी। 28 तर येशूसे “जुन म्हिसे परमेश्वरला बचन इयान्सी परमेश्वरसे कुल्बा अन्छार लला, थे म्हिसे परमेश्वरग्याम झन मोलम याड्ला,” भिसी सुड्जी।

म्हिगदेसे चिनु म्हाइबा

मत्ती १२:३८-४२

29 येशूला क्युर्नोन म्हिला हुल तमाहेनसे येशूसे थेनीगदेदा चुहड् भिसी सुड्जी, “एनीगदे दान्देला म्हिगदे खाहड्बा नइबा म्हि! उदेकला चिनु जे म्हाइबा। तर योना अगमवक्ताला चिनु बाहेक अर्गु चिनु आउन। 30 निनवे शहरला म्हिगदेला लागिरी योना चिनु तबा हड्न्नोन परमेश्वरसे पुइखबा म्हि दान्देला म्हिगदेला लागिरी चिनु हिन्ना। 31 निसाफ लबा धुइरी ल्होग्याम खबा ग्लेस्यासे दान्देला म्हिगदेला दोष उन्ना, तिग्दा भिसम थे सोलोमन ग्लेला ज्ञान बुद्धिला ताम इयान्बारी ल्हानान थारेड्ग्याम खबा मुबा। तर च्यागो, चुरी सोलोमन ग्ले भन्दा घेन म्हि मुसैनोन थेला ताम आड्यान्नी। 32 निसाफ लबा धुइरी निनवे शहरला म्हिगदे रे:सी दान्देला म्हिगदेला दोष उन्ना। तिग्दा भिसम योना अगमवक्तासे पाड्बा ताम इयान्सी थेनीगदेसे ह्वाड ह्वाडला पाप ख्लासी परमेश्वरपट्टि दो:बा मुबा। तर च्यागो, चुरी योना अगमवक्ता भन्दा घेन म्हि गिक मुला।

लूहुइला नाडसल

मत्ती ५:१५; ६:२२-२३

33 “खालैसे नाडसल प्रासी फामसे घप्सी आथान, ओच्छे लुम्सीनोन आथान। बरु दिम न्हडरी खबा म्हिगदेदा य्हाल तगै भिसी नोबा ग्लारी थान्ना। 34 एला मी एला लूहुइला लागिरी नाडसल हड्बान हिन्ना। एला मी ज्यबा मुसम एसे ज्यना लसी म्राड्ला। तर एला मी ज्यबा आरेसम एसे तिगै म्राड्बारी आखम ओच्छे ए धोपधोपरी भ्रतोःला। 35 थेतबासेलमा ए होशियार तउ, तिग्दा भिसम एला लूहुइरी मुबा नाडसल सिसी धोपधोप थातगै। 36 चुदे एनीगदेला लूहुइरी तिगै धोपधोप आतना जम्मान लूहुइ य्हाल तजी भिसम नाडसलसे एनीगदेदा य्हाल तना लबा हड्नोन एनीगदेला पूरान लूहुइ य्हाल तला।”

येशूसे फरिसीदेन यहूदी धर्मगुरुगदेला दोष उन्बा

मत्ती २३:१-३६; मर्कुस १२:३८-४०

37 येशूसे चुहड् सुड्सी जिन्माहेन्से फरिसी गिकसे येशूदा सोल छ्योइबारी ह्वाडला दिमरी ड्योइजी। जमाहेन्से येशू थेला दिमरी फेप्सी सोल छ्योइबारी धन्छ्याजी। 38 तर येशूसे छ्या आस्याल्ना† सोल्बा म्राड्सी थे फरिसी उदेक तजी।

39 थे उदेक तबा म्राड्सी प्रभुसे थेदा चुहड् भिसी सुड्जी, “एनी फरिसीगदेसे खोरेदेन खार्बाला पाखापट्टि म्याप्सी चोखो सहोबा हड् लसी एनीगदेएनोन म्हिदा उन्बारी चोखो दोबा सहोमुला। तर एनीगदेला सेम लोभदेन नइबा तामसे प्लिड्बा तमुला। 40 एनीगदे खाहड्बा मूर्ख म्हि, जुनसे पाखापट्टि सहोजी, थेसेन न्हडपट्टिनोन सहोबा आहिन? 41 एनीगदेदेन छ्याम मुबा सहेगदे प्राड्बोगदेदा पिन्गो। जमाहेन्से एनीगदेला लागिरी जम्मान

† 11:38 यहूदीला ठिम अनछार या आखुना चबा म्हिदा परमेश्वरला डाच्छा अशुद्ध भिसी म्हन्मुबा।

सूहे चोखो तला। ⁴² परमेश्वरग्याम सजाय याड्तोःबा फरिसीगदे, एनीगदेसे परमेश्वरदा बाबरीदेन जिरा ओच्छे अर्गु मसलाला दोडला भो च्युइला भो गिक मी पिनमुला, तर एनीगदेसे म्हिगदेदा ठीक निसाफदेन परमेश्वरदा लतोःबा मायाला भिसम तिगै वासता आलमुला। तर एनीगदेसे चु गे न्हीनोन लतोःबा मुबा। ⁴³ परमेश्वरग्याम सजाय याड्बा फरिसीगदे, एनीगदेसे यहूदीगदे हुप तबा दिमला मुल ठिरी चिबारीदेन बजाररी स्य्हान्दो म्हिगदेसे मान लगै भिसी सेम लमुला। ⁴⁴ परमेश्वरग्याम सजाय याड्तोःबागदे, एनीगदे म्हिगदेसे आम्राड्बा धुर्सा हड्बान हिनना। थेतबासेलमा म्हिगदेसे था आयाड्ना चुहड्बा धुर्साथोरी भ्रमुला।”

⁴⁵ ओच्छे यहूदी धर्मगुरुगदे न्हडला गिकसे येशूदा “गुरु हाडसे चुहड् सुड्सी डन्नाएनोन बेइज्जत लबा मुला” भिसी भिमा, ⁴⁶ येशूसे चुहड् भिसी सुड्जी, “एनी धर्मगुरुगदेएनोन परमेश्वरग्याम सजाय याड्तोःबा म्हिगदे हिनना। तिग्दा भिसम एनीगदेसे म्हिगदेदा पुइनोन आखम्बा धोइ काप्बा मुला। तर एनीगदेसे चा या जुम्बीसेनोन आथुर्मुला।

⁴⁷ “परमेश्वरग्याम सजाय याड्तोःबा म्हिगदे, एनीगदेसे हाडला आखे म्हेमेगदेसे साइबा अगमवक्तागदेला धुर्सा सहोबा मुला। ⁴⁸ तर एनीगदेला आखे म्हेमेसे तिग लमुबा थे एनीगदेला गेग्यामसेन उन्बा मुला। ओच्छे थेन्ना गेदेन एनीगदेला गे ढिकबा मुला। तिग्दा भिसम थेनीगदेसे अगमवक्तागदेदा साइजी, ओच्छे एनीगदेसे चा म्हिदा उन्बाला लागिरी अगमवक्तागदेला धुर्सा सहोबा मुला। ⁴⁹ थेतबासेलमा परमेश्वरसे हाडला ज्ञान बुद्धिग्याम चुहड् भिसी सुड्बा मुला, ‘डाइ थेनीगदे मुबा ग्लारी अगमवक्तादेन मुल चेला पुइखला थेनीगदेसे कोइदा साइला कोइदा ल्हानान दुख पिनना।’ ⁵⁰ थेतबासेलमा जम्बुलिड छ्यामाहेन्से दान्देधोना साइबा अगमवक्तागदेला सजाय दान्देला म्हिगदेसे याड्ला। ⁵¹ ओच्छे

हाबिलहेन्से परमेश्वरला मन्दिर न्हडला चोखो ग्लादेन धूप म्नाबा ग्लाला गुडरी साइबा जकरियाधोनाला सजाय दान्देल्ला म्हागदेला थोबोरी खला। 52 “परमेश्वरग्याम सजाय याड्तोःबा यहूदी धर्मगुरुगदे, एनीगदेदेन छ्याम परमेश्वरला ज्ञान, बुद्धिला म्नाप ठोड्बा साँचो मुला। तसैनोन एनीगदे न्हडरी आवाड्नी ओच्छे न्हडरी वाड्बारी म्हाइबा म्हागदेदाएनोन वाड्आपुड्नी।”

53 येशू थेग्याम थोन्सी फेप्वारी छ्याइमा यहूदी धर्मगुरुगदेदेन फरिसीगदेसे येशूदा ल्हानान बिरोध लसी ल्हानान तामगदे ड्योइबारी छ्याइजी। 54 येशूसे जोहाब पिन्मा खानडै गल्ती स्याप्ला वा भिसी थेनीगदेसे दाउ च्यासी चिजी।

12

चेलागदेदा होशियार तना लबा

मत्ती १०:२६-३३

1 थे धुडरी थेरी झ्यासीन झ्याबारी आखम्बाधोनाला म्हागदे पोप तबासे लमा गिकसे गिकदा नाड्बारी छ्याइजी, ओच्छे जम्मान भन्दा डाच्छा येशूसे हाडला चेलागदेदा चुहड् भिसी सुड्बारी छ्याइजी, “एनीगदे फरिसीगदेला खमीरग्याम जोगब तसी चिउ। थे खमीर चा थेनीगदेसे म्हन्बा कप्टी ताम हिन्ना।* 2 घप्सी आम्राड्बा सहे तिगै आरे, ओच्छे छुम्सी था आयाड्बा सहे तिगै आरे।* 3 थेतबासेलमा जुन ताम एनीगदेसे धोपधोपरी पाड्ला थे ताम य्हाल तमा थेःला। ओच्छे दिम न्हडरी सा ताम लसी पाड्बा ताम दिमला धुरीग्याम थेःना लला।

खाल म्नाड्सी लोड्तोःबा?

मत्ती १०:२८-३३; १२:३२

* 12:1 मत्ती १६:६; मर्कू ८:१५ * 12:2 मत्ती ४:२२; लूका ८:१७

4 येशूसे दोःसी चुहड् भिसी सुड्जी, “डाला होगदे ड्यान्गो, एनीगदे हाडदा साइबा म्हि म्राड्सी थालोड्गो। तिगदा भिसम थेसे एनीगदेला ल्हुइदा जे साइला, तर आत्मादा चा साइबारी आखम। 5 तर एनीगदे खाल्देन छ्याम लोड्तोःला थे ताम ड्यान्गो, जुनदेन छ्याम एनीगदेदा साइसी नर्गरी भ्याड्बा शक्ति मुला, थे म्राड्सी जे लोड्गो। 6 तिग डबल न्हीरी च्युर्गन डा ग्लुबारी आखम? खमला। तसैनोन थे न्हडला गिकदाएनोन परमेश्वरसे आम्लेः। 7 ओचछे एनीगदेला थोबोला क्राएनोन परमेश्वरसे झ्यासी जिन्बा मुला। थेतबासेलमा एनीगदे थालोड्गो। तिगदा भिसम थे ल्हानान च्युर्गनगदे भन्दा मी एनीगदे ल्हानान घेन मुला।

स्य्हान्दोगदेदा स्त्रीष्टला बारेरी पाड्बा

मत्ती १०:३२-३३

8 “डाला ताम ड्यान्गो, जुन म्हिसे डादा महिला ओन्छाडरी सेमहेन्से प्रभु भिसी पाड्ला, परमेश्वरसे पुइखबा म्हिसेनोन थेदा परमेश्वरला दूतगदेला ओन्छाडरी चु हाडलान हिन्ना भिसी पाड्ला। 9 तर जुन म्हिसे म्हिगदेला ओन्छाडरी डादा डाइ थेदा डोसेबा आरे भिसी भिला, डाइएनोन परमेश्वरला दूतगदेला ओन्छाडरी थेदा सेबान आरे भिसी पाड्ला। 10 च्यागो, जुन म्हिसे परमेश्वरसे पुइखबा महिला बिरोधरी ताम लला, थेसे माफ याड्ला। तर परमेश्वरला आत्माला बिरोधरी ताम लबा म्हिसे खाइमै माफ आयाड्।*

11 “म्हिगदेसे एनीगदेदा चुड्सी यहूदीगदे हूप तबा दिमला नेतादेन शासन लबा म्हिगदे ओचछे न्यायाधीश मुबा ग्लारी भोर्बा धुइरी खाहड् लसी जोहाब पिन्बा भिसी एनीगदेसे धन्दा सुर्दा

* 12:10 मत्ती १२:३२; मर्कू ३:२९

थालउ।* 12 तिग्दा भिसम थे धुइरी खाहड् लसी जोहाब पिन्तो:ला भिसी एनीगदेदा परमेश्वरला आत्मासेन लोप्ला।”

मूर्ख फ्युकपो महिला उखान

13 महिला हुल न्हडग्याम म्हि गिकसे येशूदा “गुरु, डाला ज्योज्योदा अंश भो लसी पिन्गो भिसी सुड्सी पिन्गो” भिसी भिमा, 14 येशूसे थेदा “एनीगदेला निसाफ लबादेन अंश भो लसी पिन्बारी डादा खाल्से अधिकार पिन्बा मुला” भिसी सुड्जी। 15 ओच्छे येशूसे थेनीगदेदा “एनीगदे होशियार तसी लोभग्याम जोगब तसी चिउ। तिग्दा भिसम म्हिदेन छ्याम जतिन धन सम्पत्ति मुसैनोन थेसे म्हिदा सत्यला जुनी आपिन” भिसी सुड्बान, 16 थेनीगदेदा उखान गिक सुड्जी, “ग्ला गिकरी फ्युकपो म्हि गिक मुबा, थेला बुरी ल्हानान बाली रोजी। 17 थे फ्युकपो म्हिसे सेम सेमरी चुहड् भिजी, ‘डादेन छ्याम बाली थान्बा ग्ला आरे, डाइ तिग लसे?’ 18 ओच्छे थेसे चुहड् भिजी, ‘दाहेनसे डाइ चुहड् लला, जम्मान ढुकुटीगदे फुप्सी घेन घेन सहोला, ओच्छे जम्मान बालीदेन मालसामान थेरीन थान्ना। 19 ओच्छे थेसे हाडला सेम न्हड न्हडरी चुहड् भिसी भिजी, “डाइ ल्हानान दिडधोनादा छ्योबा बाली पोप लबा मुला। थेतबासेलमा डा सुख शान्तिरी चबा थुड्बादेन मोजमजा लसी चिला।”

20 “तर परमेश्वरसे थेदा ‘मूर्ख, तिनी म्हुनडनोन एला प्राण डाइ किन्ना, एसे पोप लसी थान्बा धन सम्पत्ति खाल्से चला?’ भिसी सुड्जी।”

21 चु उखान सुड्सी जिन्माहेनसे येशूसे “हाडला लागिरी धन सम्पत्ति पोप लबा महिला गति चुहड्बान तला। परमेश्वरसे चुहड्बा म्हिगदेदा फ्युकपो आम्हनमुला” भिसी सुड्जी।

* 12:11 मत्ती १०:१९-२०; मर्कू १३:११; लूका २१:१४-१५

धन्दा सुर्दा थालउ

मत्ती ६:२५-३४

22 जमाहेन्से येशूसे हाडला चेलागदेदा चुहड् भिसी सुड्जी, “थेतबासेलमा एनीगदेसे डाला ताम ड्यानगो, ‘सोबाला लागिरी तिग चसे, तिग क्वान्से भिसी धन्दा सुर्दा थालउ।’ 23 तिग्दा भिसम चबा थुड्बादेन क्वान्बा भन्दा एनीगदेला प्राणदेन ल्हुइ घेन हिन्ना। 24 एनीगदेसे कावागदेदा च्यागो! थेनीगदेसे न्ह कमाइ लला, न्ह बाली धुइला, न्ह थेनीगदेला ढुकुटीन मुला। तसैनोन परमेश्वरसे थेनीगदेदा चबा सहे पिन्बान मुला। एनीगदे मी चरागदे भन्दा ल्हानान घेन मुला। 25 एनीगदे न्हडरी खाल्से धन्दा सुर्दा लसी छिन्नडला लागिरी आयू काप्खम्ला? 26 चुदे जजा गे मी लआखममुला भिसम तिग्दा एनीगदे अर्गु तामला धन्दा सुर्दा लबा?

27 “एनीगदेसे म्हेन्दोदा च्यागो, थेनीगदेसे न्ह गे लला, न्ह क्वान राला। तर च्यागो, सोलोमन ग्लेदेन छ्याम ल्हानान धन सम्पत्ति मुसैनोन थे म्हेन्दो तेएनोन जेबा आरेमुबा।* 28 तिनी ल्हेबान निसी न्हडगर खर्माहेन्से मेरी फर्बा छेदा मी परमेश्वरसे चुहड् लसी जेना लमुला भिसम झन एनीगदेदा परमेश्वरसे गाते जेना लला? खाइ एनीगदेला विश्वास? 29 थेतबासेलमा एनीगदेसे तिग चबा, तिग थुड्बा भिसी धन्दा सुर्दा लसी म्हाइसी थाभ्रउ। 30 तिग्दा भिसम परमेश्वरदा डोआसेबा जम्बुलिडला म्हिगदेसे चा चुहड् लसी धन्दा सुर्दा लमुला। तर एनीगदेदा चु जम्मान सहे तो:ला भिसी परमेश्वर आबादा था मुला। 31 थेतबासेलमा डाच्छा परमेश्वरला यहुल्सा म्हाइगो। जमाहेन्से परमेश्वरसे एनीगदेदा चु जम्मान सहे पिन्ना।”

हाडला लागिरी स्वर्गरी धन सम्पत्ति सोसी थान्गो

मत्ती ६:१९-२१

* 12:27 १ राजा १०:४-७; २ इति ९:३-६

32 दोःसी येशूसे चुहड् भिसी सुड्जी, “डाला कोलागदे, एनीगदे थालोड्गो! तिग्दा भिसम एनीगदेला परमेश्वर आबा ल्हानान ताड्सी एनीगदेदा थेसे हाडला य्हुल्सा पिन्बारी छ्याइबा मुला। 33 थेतबासेलमा एनीगदेसे हाडदेन छ्याम मुबा धन सम्पत्ति चूड्सी खबा टाडगा प्राड्बोगदेदा भो लसी पिन्गो। ओच्छे खाइमै आन्होड्बा दुकुटी स्होसी हाडला लागिरी स्वर्गरी धन सम्पत्ति सोसी थान्गो। थेरी य्होएनोन आख, बुलुडसेनोन आच। 34 तिग्दा भिसम जुन ग्लारी एनीगदेला धन सम्पत्ति मुला, एनीगदेला सेमएनोन थेरीन तला।”

छोर्सी चिउ

मत्ती २४:४२-५१; मर्कूस १३:३२-३७

35 दोःसी येशूसे थेनीगदेदा चुहड् भिसी सुड्जी, “एनीगदे हाडला क्वान क्वान्सी नाडसल म्रासी तयार लसी चिउ।* 36 ओच्छे एनीगदे ब्याहला भोजरी निसी खबा मालिकदा भ्रान्सी चिबा नोकर हड्बान तउ। तिग्दा भिसम मालिक खसी प्राप द्वक द्वक लमैछ्याम थेनीगदेसे हाडला मालिकदा प्राप ठोड्सी पिन्मुला। 37 च्यागो, थे नोकरगदे गाते ताड्म्याड्ला, हाडला मालिक खबा धुइरी थेनीगदेदा छोर्सी चिबा म्राड्जी। थेतबासेलमा थेसे केः खीसी हाडला नोकरगदेदा चबा सहे पिन्ना। 38 थे नोकरगदे गाते ताड्म्याड्ला, मालिक म्हन गुडरी अथवा स्य्हो तबा धुइरी खसैनोन हाडला नोकरगदे छोर्सी चिबा म्राड्जी। 39 तर एनीगदेसे चु तामएनोन था याड्गो, दिमला म्हिसे य्हो खबा धुइ था याड्सम थेसे हाडला दिम न्हडरी य्हो वाड्आपुड्। 40 थेहड् लसीन एनीगदेएनोन होशियार तसी छोर्सी चिउ। तिग्दा भिसम परमेश्वरसे पुड्खबा म्हिएनोन एनीगदेसे आम्हन्बा धुइरी खला।

* 12:35 मत्ती २५:१-१३

ज्यबा गे लबा नोकरदेन आज्यबा गे लबा नोकर

मत्ती २४:४५-५१

41 जमाहेन्से पत्रुससे येशूदा “प्रभु, चु उखान डन्ना लागिरी जे सुड्बा कि स्य्हान्दो म्हिगदेला लागिरीनोन सुड्बा हिन्ना?” भिसी इयोइमा, 42 प्रभुसे थेदा चुहड् भिसी सुड्जी, “दिमरी गे लबा बुद्धि मुबादेन भर्तुपपा म्हि खाल हिन्ना? मालिकसे दिमला स्य्हान्दो नोकरगदेदा ठीक ठीक धुडरी चबा थुड्बा ढिकना लसी पिन्बारी जिम्मा पिन्थान्जी।” 43 मालिक दोःसी खबा धुडरीनोन थेसे मालिकसे कुल्सी थान्बा हड् लसी गे लबा म्राड्जी भिसम इनाम याड्बा नोकर थेनोन हिन्ना। 44 च्यागो, एनीगदेसे डाला ताम इयान्गो, मालिकसे थेहड्बा नोकरदा हाडला जम्मान धन सम्पत्ति जिम्मा पिन्ना। 45 तर थे आज्यबा नोकरसे ‘डाला मालिक योनान आख’ भिसी म्हन्सी, इय्होइबा म्हिगदेदेन छ्याम चिसी चबा थुड्बा लसी हाडदेन छ्यामनोन गे लबा नोकरगदेदा तोबा गयाड्बा लजी भिसम, 46 थेला मालिक थेसे आम्हन्बा धिनदेन धुडरी धोखसी मालिकसे थेदा ल्हानान सजाय पिन्ना। ओच्छे थेदा परमेश्वरदा विश्वास आलबा म्हिगदे मुबा ग्लारी भ्याड्ला।

47 “हाडला दिमला मालिकला सेमला ताम था याड्सीनोन सेम निबा गे आलबा नोकरसे तोबा चला। 48 तर हाडला मालिकला सेमला ताम था आयाड्ना तोबा चबा खाल्ला गे लसेनोन थे नोकरदा ल्हाना आतोः। ओच्छे जुन म्हिदा ल्हाना पिन्बा मुला थेसेनोन ल्हानान पिन्तोःला। थेहड् लसीन जुन म्हिदा ल्हानान जिम्मा पिन्बा मुला थेदेन छ्याम ल्हानान किन्ना।

थेमे न्हडरी बिरोध लबा

मत्ती १०:३४-३६

49 “च्यागो, डा जम्बुलिडरी मे सल्कब लबारी खबा हिन्ना। बरु डाच्छान सल्कब तबा हिन्सै तसेला मुबा। 50 डाइ दुखला

बपत्तिस्मा किन्तोःबा मुला, थे बपत्तिस्मा आकिन्तेधोना डादा शान्ति आत।* 51 तिग एनीगदेसे डा जम्बुलिडरी महिगदेदा ढिक्ना लबारी खबा भिसी म्हन्बा? आहिन, डा मी एनीगदेदा फेना लबारी खबा हिन्ना। 52 दाहेन्से गोर डा महिला थेमे ह्वाड ह्वाड न्हडरी फेला। ओच्छे न्हीला बिरोधरी सोम, सोमला बिरोधरी न्ही रेःला। 53 थेहड् लसीन आबाला बिरोधरी झा, झाला बिरोधरी आबा, आमाला बिरोधरी झामे, झामेला बिरोधरी आमा ओच्छे स्युमीला बिरोधरी चाड, चाडला बिरोधरी स्युमी रेःला।”*

धुइ च्यासी भ्रतोःबा

मत्ती १६:२-३; ५:२५-२६

54 जमाहेन्से महिला हुलदाएनोन येशूसे चुहड् भिसी सुड्जी, “जम्बुलिडला न्हुपग्याम खसु थोन्माहेन्से ‘दाहेन्से नाम खला’ भिसी एनीगदेसे भिमुला, ओच्छे थेहड्-नोन तमुला। 55 थेहड् लसीन जम्बुलिडला ल्होपट्टिसे लाबा खबारी छ्याइमाहेन्से ‘दाहेन्से छेप्बा छला’ भिसी एनीगदेसे भिमुला, ओच्छे थेहड्-नोन तमुला। 56 कप्टीगदे, एनीगदेसे सदेन मुरी च्यासी तिग तबारी छ्याइबा मुला भिबा ताम चा था याड्मुला। तर दान्दे तिग तबारी छ्याइबा मुला भिबा ताम चा तिग्दा था आयाड्बा?

57 “डाइ लबा गे ठीक मुला कि आरे’ भिसी एनीगदेसे तिग्दा पक्का आलबा? 58 खालैसे एदा मुद्दा युसी न्यायाधीश मुबा ग्लारी भोर्जी भिसम, थे म्हिदेन छ्याम ग्यामरीन ढिक्गो। आहिन्सम थेसे एदा न्यायाधीशला डाच्छापट्टि राप्पुड्ला। ओच्छे न्यायाधीशसे सिपाहीगदेला यारी जिम्मा पिन्ना। जमाहेन्से सिपाहीगदेसे भोर्सी झ्याल्खानरी झाड्ला। 59 एसे डाला ताम ड्यानगो, एसे जम्मान टाडगा आफातेधोना थेग्याम थोन्बारी आम्याड्।”

* 12:50 मर्कू १०:३८ * 12:53 मीका ७:६

13

पाप ख्लासी परमेश्वरपट्टि दोःबा

1 थेनोन धुइरी थेरी मुबा कोइ कोइ म्हिगदेसे येशूदा चुहड् भिसी पाड्जी। गालीलला म्हिगदेसे परमेश्वरदा बलि फुल्बान लमा पिलातस भिबा रोमी अञ्चलाधीशसे थेनीगदेदान साइजी। ओच्छे थेनीगदेला काएनोन पशुला कादेन छ्याम दोड्जी। 2 जमाहेन्से येशूसे थेनीगदेदा चुहड् भिसी जोहाब पिन्जी, “थे गालीलला म्हिगदेसे चुहड् लसी दुख नाजी भिदेमा एनीगदेसे चु गालीलला म्हिगदेदा स्य्हान्दोगदे भन्दा ल्हानान पापी मुला भिसी म्हन्बा? 3 आहिन, एनीगदेसे डाला ताम ड्यानगो, तिग्दा भिसम एनीगदेसे हाड हाडला पाप ख्लासी परमेश्वरपट्टि आदोःनी भिसम एनीगदेएनोन थेहड् लसीन नाश तला। 4 थेहड् लसीन सिलोआम भिबा ग्लाला धरहरा गुर्सी सिबा च्युक भ्रेः म्हिगदे तिग यरूशलेमला स्य्हान्दो म्हिगदे भन्दा पापी मुबा भिसी म्हन्बा? 5 आहिन, डाला ताम ड्यानगो, तिग्दा भिसम एनीगदेसे हाड हाडला पाप ख्लासी परमेश्वरपट्टि आदोःनी भिसम एनीगदेएनोन थेहड् लसीन नाश तला।”

तिगै आरोबा दोडला उखान

6 जमाहेन्से येशूसे थेनीगदेदा उखान गिक सुड्जी, “म्हि गिकसे वारीरी अञ्जीरला दोड सूबा मुबा। थे म्हिसे थे अञ्जीरला दोडरी अञ्जीर रोजी वा भिसी च्याबारी खमा तिगै आस्यापनी। 7 थेतबासेलमा थेसे हाडला वारीरी गे लबा म्हिदा ‘डाइ अञ्जीर रोला वा भिसी च्याबा सोम दिड तजी, तर दान्देधोना आरोनी। दाहेन्से चुदा थासी भ्याड्गो’ भिसी भिमा, 8 थे गे लबा म्हिसे ‘अझ तिदिड भ्रान्गो, डाइ चु दोडला क्यारक्युर ख्वसी सार युला। 9 ओते लसीनोन आरोनी भिसम हाडसे चु दोड थासी भ्याड्खम्ला’ भिसी भिजी।”

येशूसे कुब्रे तबा म्रिडम्हेमेदा खम्ना लबा

10 येशूसे बल्पबा न्हबा धिनकुनुं यहूदीगदे हुप तबा दिमरी लोपबान मुबा। 11 थेरी म्हडसे स्याप्सी कुब्रे तबा म्रिडम्हेमे गिक मुबा। थे खाइमै सिधा तसी भ्रबारी आखम्मुबा। थे थेहड् तबा च्युक भ्रे: दिड तबा मुबा। 12 येशूसे थे म्रिडम्हेमेदा म्राड्सी हाडला डामरी ड्योइसी, “दाहेन्से ए खम्जी” भिसी सुड्जी। 13 ओच्छे थेथोरी येशूसे हाडला छ्या थान्मैछ्याम थे कुब्रे तबा म्रिडम्हेमे खम्जी। जमाहेन्से थे म्रिडम्हेमेसे परमेश्वरला जयजयकार लबारी छ्याइजी।

14 येशूसे थे म्रिडम्हेमेदा बल्पबा न्हबा धिनकुनु खम्ना लबा म्राड्सी यहूदीगदे हुप तबा दिमला नेता बोमो खसी, “म्हिगदेदा गे लबा धिन साता गिकरी ढुरे मुनोन मुला। थेतबासेलमा चु ढुरे न्हडरी खसी खम्ना लउ, बल्पबा न्हबा धिनकुनु आहिन” भिसी भिजी*।

15 प्रभुसे थेदा चुहड् भिसी सुड्जी, “कप्टी, तिग एनीगदेसे बल्पबा न्हबा धिनकुनु म्हे मुइदेन गधादा पुइसी क्युइ ख्वाबारी आभोर्मुला? 16 चु अब्राहामला सन्तानदा च्युक भ्रे: दिडधोना शैतानसे आख्लाबा मुबा भिसम, तिनी बल्पबा न्हबा धिनकुनुएनोन खम्ना लतो:बा आहिन?” 17 येशूसे चुहड् लसी जोहाब पिन्बा म्राड्सी, येशूला बिरोधीगदे पे:जी। तर थेरी मुबा म्हिगदे चा येशूसे लबा उदेकला गे म्राड्सी ताड्जी।

पच्छै बलुदेन खमीरला उखान

मत्ती १३:३१-३३; मर्कुस ४:३०-३२

18 जमाहेन्से येशूसे थेनीगदेदा “परमेश्वरला यहुल्सादा डाइ तिगदेन छ्याम दाँजब लसे? परमेश्वरला यहुल्सा खाहड्बा मुला भिसम, 19 चु चा पच्छै ढापला बलु गिक हड्बान हिनना। खालै

† 13:10 “बल्पबा न्हबा धिन” चा यहूदीगदेसे परमेश्वरला लागिरी फेसी थान्बा धिन हिनना। * 13:14 प्रस्था २०:९-१०; व्यव ५:१३-१४

म्हिसे घुर्यानरी ढ्वमाहेन्से थे ढाप फुइसी ल्हेबान निमुला। जमाहेन्से थे पच्छे ढापला दोडला हाँगारी चरागदेसे जड स्होसी चिला” भिसी सुड्जी।

20 दोःसी येशूसे थेनीगदेदा चुहड् भिसी सुड्जी, “परमेश्वरला यहुल्सादा डाइ तिगदेन छ्याम दाँजब लसे? 21 चु मी गेडरी युबा खमीर हड्बान हिन्ना। थे खमीर म्रिडम्हेमे गिकसे फाम सोम ब्रारी युसी ज्योप्ला। ओच्छे थे ब्रा आभोतेधोना थेसे घप्सी थान्ना।”

साडरो म्राप

मत्ती ७:१३-१४, २१-२३; ८:११-१२

22 जमाहेन्से येशू शहर शहरदेन नाम्सा नाम्सारी फेप्सी म्हिगदेदा लोपबान यरूशलेमरी फेप्जी। 23 थेनोन धुइरी म्हि गिकसे, “प्रभु, तिग थाबा याड्बा म्हिगदे ल्हाना आरे?” भिसी येशूदा ड्योडमा, 24 येशूसे थेरी मुबा म्हिगदेदा चुहड् भिसी सुड्जी, “च्यागो, साडरो म्रापग्याम वाड्बारी भड लउ। तिग्दा भिसम ल्हानान म्हिगदे वाड्बारी म्हाइमुला, तसैनोन वाड्बारी आखममुला। 25 दिमला मालिक रेःसी म्राप ढुड्सी जिनमाहेन्से एनीगदेसे मडग्यारग्याम ढ्वक ढ्वक लसी ‘गुरु, डन्दा म्राप ठोड्सी पिन्गो’ भिसी भिमा, थेसे एनीगदेदा ‘एनीगदे खाल हिन्ना? ओच्छे खानडग्याम खबा? डाइ एनीगदेदा डोसेबा आरे’ भिसी भिला। 26 एनीगदेसे ‘हाड डन्देन छ्यामनोन सोल्बा छ्योडबा लबा मुबा। ओच्छे डन्ना नाम्सारीक्यार हाडसे लोपबा मुबा’ भिसी भिमा, 27 थेसे एनीगदेदा ‘एनीगदे खाल हिन्ना? डाइ डोआसेनी। थेतबासेलमा पाप गे लबागदे, एनीगदे डा मुबा ग्लाग्याम निउ’ भिसी भिला।* 28 ओच्छे एनीगदेसे अब्राहाम, इसहाक, याकूबदेन जम्मान अगमवक्तागदेदा परमेश्वरला यहुल्सारी म्राड्मा, हाडदा चा मडग्यार भ्याड्मा क्राबा क्रिड्बा लसी स्वा क्रेला।* 29 स्यार,

* 13:27 भजन ६:८ * 13:28 मत्ती २२:१३; २५:३०

ल्हो, न्हुप, झ्याड जम्मान ग्लाग्यामसे म्हिगदे खसी परमेश्वरला य्हुल्सारी थेदेन छ्यामनोन चबा थुड्बा लबारी चिला।* 30 तर च्यागो, दान्दे लिच्छा मुबागदे डाच्छा तला, ओच्छे दान्दे डाच्छा मुबागदे लिच्छा तला।”*

यरूशलेमदा म्राड्सी येशूदा दुख इहम्बा

मत्ती २३:३७-३९

31 थेनोन धुइरी कोइ कोइ फरिसीगदे येशू मुबा ग्लारी खसी, “हाड चुग्याम थोन्सी फेपूगो। तिग्दा भिसम हाडदा हेरोदसे साइबारी छ्याइबा मुला” भिसी भिमा, 32 येशूसे थेनीगदेदा चुहड् भिसी सुड्जी, “एनीगदे निसी थे ल्हुन्दी हड्बा छट्टुदा चुहड् भिउ, ‘तिनीदेन न्हडगर डाइ म्हडगदे तापूबादेन आखम्बागदेदा खम्ना लबा गे लला, ओच्छे रेनी डाला गे जिन्ना।’ 33 ओच्छे तिनी, न्हडगर, रेनीकुनुधोनारी डा यरूशलेम शहररी धोनोन तोःला। तिग्दा भिसम यरूशलेम शहररी बाहेक अर्गु ग्लारी अगमवक्तादा आसाइ!

यरूशलेमला म्हिगदे म्राड्सी येशूदा दुख इहम्बा

मत्ती २३:३७-३९

34 “यरूशलेमला म्हिगदे, एनीगदेसे अगमवक्तागदेदा साइला ओच्छे परमेश्वरसे एनीगदे मुबा ग्लारी पुइखबागदेदा युडबासे तोला। डाइ एनीगदेला कोलागदेदा नागा मामासे हाडला कोलागदेदा भ्यापूसे घपूबा हड् लसी पोप लबारी म्हाइमा एनीगदेसे आड्यान्नी। 35 दाहेन्से परमेश्वरसे एनीगदेला दिम खलाला। च्यागो, डाला ताम ड्यान्गो, एनीगदेसे ‘परमप्रभुला मिनरी फेपूखबादा मोलम याड्बा म्हि’ भिसी आभितेधोना डादा आम्राड्।”*

* 13:29 मत्ती ८:११-१२
भजन ११८:२६; यर्मि २२:५

* 13:30 मत्ती १९:३०; २०:१६; मर्कू १०:३१

* 13:35

14

फरिसी गिकला दिमरी येशू फेपूबा

1 येशू बूलपूबा न्हबा धिनकुनु फरिसीगदेला नेता गिकला दिमरी सोल छ्योइबारी फेपूजी। थेरी मुबा फरिसीगदेसे येशूला चिवा लसी चिमुबा। 2 थेरी टाड्बा बेथासे स्यापूबा म्हि गिक येशूला डाच्छापट्टि मुबा। 3 येशूसे यहूदी धर्मगुरुगदेदेन फरिसीगदेदा “बूलपूबा न्हबा धिनकुनु आखम्बा म्हिदा खम्ना लबारी तला कि आत?” भिसी ड्योइमा, 4 थेनीगदे कुटिसी चिजी। ओच्छे येशूसे थे आखम्बा म्हिदा हाडला यासे थुर्सी खम्ना लमाहेन्से “दिमरी निउ” भिसी सुड्जी।

5 जमाहेन्से येशूसे थेनीगदेदा “बूलपूबा न्हबा धिनकुनु एनीगदेला कोलागदे अथवा ग्लाप इनार न्हडरी ताइजी भिसम तिग एनीगदेसे तुरुन्तन आते:ना चिला?” भिसी सुड्मा,* 6 थेनीगदेसे तिगै पाड्बारी आखम्नी।

हाडसे हाडदान घेन थास्होउ

7 थेरी चबा थुड्बारी खबा म्हिगदेसे मुल ठिगदे धम्सी चिबारी म्हाइबा म्राड्सी येशूसे थेनीगदेदा उखान गिक सुड्जी, 8 “खालैसे एनीगदेदा ब्याहरी निम्तो पिन्जी भिसम मुल ठिरी चिबारी थाम्हाइगो। तिग्दा भिसम थेरी एनीगदे भन्दा घेन म्हिदाएनोन निम्तो पिन्बा मुला तला। 9 एदेन थेदा निम्तो पिन्बा म्हि खसी ‘चु ग्लारी थेदा चिपुड्गो’ भिसी एदा चिबा ग्लाग्याम रे:पुड्ला। जमा ए पे:सी जम्मान भन्दा धिरी चितो:ला। 10 थेतबासेलमा एसे निम्तो याड्बा धुइरी निसी जम्मान भन्दा धिला ग्लारी चिउ। जमाहेन्से एदा निम्तो पिन्बा म्हि खसी ‘तोर धन्छ्यागो’ भिसी मुल ठिरी चिपुड्ला।* थे धुइरी एदेन छ्याम चबा थुड्बारी चिबागदेला

* 14:5 मत्ती १२:११ * 14:10 हितो २५:६-७

ओन्छाडरी एसे मान याड्ला। 11 तिग्दा भिसम जुन म्हिसे हाडसे हाडदान घेन सहोला थेदा जम्मान भन्दा जजा सहोला ओच्छे जुन म्हिसे हाडसे हाडदान जजा सहोला थेदा जम्मान भन्दा घेन सहोला।”*

12 येशूसे हाडदा निम्तो पिन्बा म्हिदाएनोन चुहड् भिसी सुड्जी, “एसे चबा थुड्बारी होगदे, हाडला ज्योज्यो आलेगदे, हाडला म्हिगदेदेन फ्युकपो खिमजेमगदेदा जे थाड्योइगो। तिग्दा भिसम थेनीगदेसेनोन एसे हड् लसीन निम्तो पिन्सी एला गुण फाला। 13 थेतबासेलमा एसे प्राडबोगदे, कुज्यागदेदेन मी आम्राड्बा म्हिगदेदाएनोन ड्योइगो। 14 थेहड् लजी भिसम एसे मोलम याड्ला। तिग्दा भिसम थेनीगदेसे एसे लबा गुण फाबारी आखमसै परमेश्वरसे म्हन्बा अनछारला गे लबा म्हिगदे सिबाग्याम सोबा धुइरी परमेश्वरसेन एसे लबा गुण फाला।”

भोजला उखान

मत्ती २२:१-१४

15 येशूला ताम थे:सी येशूदेन छ्याम चबा थुड्बा लबा म्हिगदे न्हडला गिकसे “परमेश्वरला यहुल्सारी चबा थुड्बा लम्याड्बागदे गाते ताड्म्याड्ला” भिसी भिजी। 16 जमाहेनसे येशूसे थेदा उखानग्याम चुहड् भिसी सुड्जी, “म्हि गिकसे घेन भोज पिन्बारी ल्हानान म्हिगदेदा निम्तो पिन्जी। 17 भोज ठीक लसी जिनमाहेनसे हाडसे निम्तो पिन्बा म्हिगदेदा जम्मान ठीक तजी भिसी ड्योइबारी हाडला नोकरदा पुड्जी। 18 तर निम्तो याड्बा जम्मान म्हिगदेसे निउ गिक गिक लसी चुहड् भिबारी छ्याइजी, ‘गिकसे चा डाइ बु ग्लुबा मुला थे च्याबारी नितो:ला। थेतबासेलमा डादा माफ लउ, डा खआम्याड्’ भिसी भिजी। 19 ओच्छे स्य्हान्दोसे चा ‘डाइ हल डा ग्लाप ग्लुबा मुला, तिनीन

* 14:11 मत्ती २३:१२; लूका १८:१४

थे ग्लाप च्याबारी नितोःबा मुला। थेतबासेलमा डादा माफ लउ, डा खआम्याड्' भिसी भिजी। ²⁰ थेहड् लसीन स्युहान्दोसेनोन 'डाइ भर्खर जे ब्याह लबा मुला, थेतबासेलमा डा खआम्याड्' भिसी भिजी। ²¹ नोकरसे चु ताम हाडला मालिकदा पाड्माहेन्से दिमला मालिक बोमो खसी 'ए शहरला ग्यामदेन गल्लीगदेरी निसी थेरी मुबा जम्मान प्राडबो, कुज्यादेन मी आम्राड्बागदेदा ड्योइसी चुरी भउ' भिसी कुल्जी। ²² चुहड् लसी जिन्माहेन्से नोकरसे दिमला मालिकदा 'गुरु, हाडसे कुल्बा अन्छार डाइ जम्मादान ड्योइसी भजी, तसैनोन अझ ग्ला मुला' भिसी भिमा, ²³ मालिकसे 'ए शहरला मुल ग्यामदेन गल्ली गल्लीरी निसी म्हिगदेदा कर लसी भसी खउ। तिग्दा भिसम डाला दिम नाडनोन म्हिगदे तगै! ²⁴ चु भन्दा डाच्छा निम्तो याड्बा म्हिगदे खालैसेनोन डाला भोजला ब्रोइ म्यहाड् आम्यहाड्' भिसी भिजी।”

चेलासे लतोःबा गे
मत्ती १०:३७-३८

²⁵ महिला हुल येसूदेन छ्याम निबान लबा धुडरी थेनीगदेपट्टि दोःसी येसूसे चुहड् भिसी सुड्जी, ²⁶ “चुदे डादेन छ्याम भ्रजी भिसम थेसे हाडला आबा आमा, मिड, कोलागदे, ज्योज्यो आले, नाना आडा ओच्छे हाडलान ज्यानएनोन माया मारब आलनी भिसम थे डाला चेला दोआखम।* ²⁷ जुन म्हिसे आसितेधोना हाडला दुख हाडसेन नासीं डादेन छ्याम आभ्र थे डाला चेला दोआखम।*

²⁸ “चुदे एनीगदे न्हडरी खालै म्हिसे धरहरा सहोबा सेम लसम थेसे धरहरा सहोसी जिन्बाधोना गाते खर्च निला भिसी डाच्छान हिसाब लतोःला। ²⁹ थेहड् आलनी भिसम थेसे धरहराला जग थान्सी धरहरा सहोसी जिन्ना लबारी आखमनी भिसम चु म्राड्बा

* 14:26 मत्ती १०:३७ † 14:27 “हाडला दुख हाडसेन नासीं” भिबादा ग्रीक बाइबलरी चा “हाडला कुस हाडसेन पुडतोःला” भिसी भिबा मुला। * 14:27 मत्ती १०:३८; १६:२४; मर्कू ८:३४; लूका ९:२३

जम्मान म्हिगदेसे थेदा खिसी लसी, ³⁰ 'चु म्हिसे सहोबारीम छ्याइमुबा तर सहोसी जिन्ना लबारी चा आखम्नी' भिला।

³¹ "खजिबै ग्लेसे अर्गु यहुल्साला ग्लेदेन छ्याम लडाइ लबारी निमा हाडदेन छ्याम मुबा हजार च्युइ सिपाहीगदे भोर्सी हाडदेन छ्याम लडाइ लबारी खबा बोगल गिक हजार सिपाहीदा ढाबारी खम्ला कि आखम थे डाच्छान चिसी सल्लाह आल? ³² लडाइ लबारी आखम्नाम भिसी था याड्माहेन्से डाच्छान ढिक्बाला लागिरी स्य्हान्दो ग्ले मुबा ग्लारी हाडला ग्ले ब्लोन पुइला। ³³ थेहड् लसी एनीगदे न्हडला जुन म्हिसे डाला लागिरी जम्मान सहे ख्लाआखम थे म्हि डाला चेला दोआखम।

चजा हड् तबा

मत्ती ५:१३; मर्कूस ९:५०

³⁴ "चजा ज्यबा सहे हिन्ना, तर चजाला डम्बा सहे निजी भिसम थेदा दोःसी तिग्से डम्ना लबा? ³⁵ थे चजा न्ह साप्राला लागिरी गे खेल्बा तला न्ह सारनोन तला। जमाहेन्से म्हिगदेसे थे चजा भ्याड्ला। जुन म्हिदा ड्यानबा सेम मुला थेसे ड्यानसी घोउ।"

15

म्हाबा ग्युला उखान

मत्ती १८:१२-१४

¹ तिरेकुनु तिरो दुइबा म्हिगदेदेन पापीगदे जम्मान येशूला बचन ड्यानबारी थेला डामरी खजी। ² चु म्राड्सी फरिसीदेन यहूदी धर्मगुरुगदेसे "चु म्हि मी पापीगदेदेन छ्याम ढिक्सी थेनीगदेदेन छ्यामनोन चिसी चबा थुड्बा लबा चीम" भिसी येशूला तामगन लबारी छ्याइजी।*

* 15:2 लूका ५:२९-३०

3 जमाहेन्से येशूसे थेनीगदेदा उखान गिक सुड्जी, 4 “एनीगदे खालै म्हिला ग्यार्जा गिक ग्यु न्हडरी गिक म्हाजी भिसम थेसे बोगल बलिसे च्युक कु ग्युगदेदा ख्लासी थे म्हाबा ग्यु आस्याप्तेधोना आम्हाइ? म्हाइला। 5 थे ग्यु स्यापमाहेन्से ताड्सी ताड्सी थेसे बमरी पुइसी दिमरी भला। 6 ओच्छे हाडला ह्योगदेदेन खिमजेमगदेदा ड्योइसी एनीगदेएनोन डा हड् लसी ताड्गो। तिग्दा भिसम ‘डाइ डाला म्हाबा ग्यु स्यापजी’ भिसी भिला। 7 थेतबासेलमा एनीगदेसे डाला ताम ड्यानगो, चुहड् लसीन हाडला पाप आखलाना डनी परमेश्वरला डाच्छा ज्यबा दोसी हाडला पाप ख्लाआतोःबा बोगल बलिसे च्युक कु म्हिगदेला लागिरी भन्दा हाडला पाप ख्लासी परमेश्वरपट्टि दोःबा म्हि गिकला लागिरी स्वर्गरी मुबागदे ल्हानान ताड्ला।

म्हाबा डबलला उखान

8 दोःसी येशूसे उखान गिकग्याम चुहड् भिसी सुड्जी, “खालै म्निडम्हेमे गिकदेन छ्याम म्हुइला गोर च्युइ डबल मुबा। थे डबल च्युइ न्हडरी डबल गिक म्हाजी भिसम थेसे थे डबल आस्याप्तेधोना नाडसल म्नासी दिम साडसिड लसी आम्हाइ? म्हाइला। 9 ओच्छे थे म्हाबा डबल स्यापमाहेन्से थेसे हाडला ह्योगदेदेन खिमजेमगदेदा ड्योइसी ‘एनीगदेएनोन डा हड् लसी ताड्गो। तिग्दा भिसम डाइ डाला म्हाबा डबल याड्जी’ भिसी भिला। 10 थेतबासेलमा एनीगदेसे डाला ताम ड्यानगो, थेहड् लसीन खालै म्हिसे हाडला पाप ख्लासी परमेश्वरपट्टि दोःजी भिसम थे पापी गिकला लागिरी परमेश्वरला दूतगदे परमेश्वरदेन छ्यामनोन ताड्ला।”

म्हाबा झाला उखान

11 दोःसी येशूसे उखान गिक सुड्जी, “च्यागो, म्हि गिकला झा न्ही मुबा। 12 थेला झा च्याड्बासे चा आबादा ‘डाला अंश भउ

आबा' भिसी भिजी। जमाहेन्से थेसे हाडला सम्पत्ति झा न्हीदान भो लसी पिन्जी।

13 “तिगै धिन लिच्छा थे महिला झा च्याड्बा हाडला जम्मान सम्पत्ति भोर्सी अर्गु यहुल्सारी निजी। थेसे थेरी मोजमजा लसी जम्मान सम्पत्ति जिन्ना लजी। 14 थेला जम्मान धन सम्पत्ति जिन्बा धुइरीन थे यहुल्सारी ल्हानान अनिकाल तजी, ओच्छे थेसे ल्हानान दुख याइजी। 15 जमाहेन्से थे, थे यहुल्साला म्हि गिक मुबा ग्लारी गे म्हाइबारी निजी। थे म्हिसे थेदा हाडला ह्वा छबारी पुइजी। 16 थेदा खालैसे चबा थुड्बा आपिन्बासे लमा थेसे ह्वाला दाना चसीन हाडला फो म्रेन्ना लबारी म्हाइजी।

17 “जमाहेन्से थेसे हाडला दिम ढन्जी। ओच्छे चुहड् भिबारी छ्याइजी, ‘डाला दिमरी डाला आबाला नोकरगदेसे म्रेन्ना चसीनोन लेड्बाधोना चबा सहे मुला। तर डा चा भिसम चुरी फोइथाननोन सिबारी छ्याइबा मुला। 18 दाहेन्से डा आबा मुबा ग्लारी निसी, “आबा, डाइ परमेश्वरदेन हाडला बिरोधरी पाप लजी। 19 दाहेन्से डा हाडला झा भिबाधोनाला आरे। तसैनोन हाडसे डादा दया लसी हाडला नोकरगदे न्हडला गिक म्हन्सी थान्गो भितो:जी”’ भिसी म्हन्जी।

20 “जमाहेन्से थे आबा मुबा ग्लारी निजी। आबासे थेदा थारेड्ग्याम खबान लबा म्राइसी थेला सेमरी दया रे:जी। ओच्छे ताइसी झादा स्यापबारी यार्बान निसी झादा हाप ख्वाइसी च्योक लजी। 21 ओच्छे झासे ‘आबा, डाइ परमेश्वरदेन हाडला बिरोधरी पाप लबा मुला। डा दाहेन्से हाडला झा भिबाधोनाला आरे’ भिसी भिजी। 22 तर आबासे हाडला नोकरगदेदा ड्योइसी चुहड् भिजी, ‘जम्मान भन्दा ज्यबा क्वान, च्यापदेन लखम योना भसी चुदा क्वान्सी पिन्गो। 23 ओच्छे छोबा हड्बा बहर भसी साइगो। तिनी य्हाडसे भोज लइ। 24 तिग्दा भिसम चु डाला झा सिबा मुबा दान्दे

सोबा मुला, थे म्हाबा मुबा तर दान्दे याड्बा मुला।' जमाहेन्से जम्मान ताड्सी भोज चबारी छ्याइजी।

25 “थे धुइरी थेला थेबा झा बुरी मुबा। थे बुग्याम खबा धुइरी दिमला डामरी धोखमा दिमरी व्हाइ गोबादेन स्य्हबान लबा थे:जी।

26 जमाहेन्से थेसे नोकर गिकदा ड्योइसी, ‘चुरी तिग लबा?’ भिसी ड्योइमा, 27 नोकरसे थेदा ‘हाडला आले दो:सी दिमरी खबा मुला। चुहड् लसी हाडला झा ज्यना लसी खबासे लमा आबासे जम्मान भन्दा छोबा बहर गिक साइबा मुला’ भिसी भिजी।

28 “चु ताम थे:सी थे बोमोसे दिम न्हडरी वाड्बारी आम्हाइनी। थेतबासेलमा थेला आबा मडग्यार खसी थेदा व्हाम्बारी छ्याइजी।

29 तर थेसे आबादा ‘च्यागो, डाइ चुदे दिडधोना हाडला नोकरसे हड् लसी जम्मान गे लसी हाडसे कुल्बा जम्मान तामएनोन ड्यानजी। तसैनोन डाला ह्योगदेदेन छ्याम ढिक्सी चबा थुड्बा लबारी हाडसे डादा खाइमै रा गिकधोना पिन्जी? 30 तर तिनी हाडला धन सम्पत्ति बेश्यागदेदेन छ्याम भ्रसी जिन्ना लबा झा दो:सी खमा चा थेला लागिरी छोबा बहर साइबा?’ भिसी भिमा, 31 आबासे थेदा ‘झा, ए मी सदन डादेन छ्याम मुनोन मुला। ओच्छे डादेन छ्याम मुबा जम्मान धन सम्पत्ति एलान हिन्ना। 32 तिनी य्हाडसे ताड्सी भोज लतो:बा धिन हिन्ना। तिगदा भिसम एला आले सिबा मुबा दान्दे सोबा मुला, म्हाबा मुबा दान्दे याड्बा मुला’ भिसी भिजी।”

16

चलाक नाइके

1 येशूसे हाडला चेलागदेदा चुहड् भिसी सुड्जी, “ग्ला गिकरी फ्युकपो म्हि गिकला गे लबा नाइके गिक मुबा। ‘नाइकेसे हाडला धन सम्पत्ति नाश लजी’ भिसी म्हिगदेसे थे फ्युकपो म्हिदा पाड्जी।

2 जमाहेन्से थे फ्युकपो म्हिसे हाडला गे लबा नाइकेदा ड्योइसी

‘म्हिंगदेसे एला बिरोधरी पाड्बा ताम तिग हिन्ना? दाहेन्से जम्मान हिसाब किताब डादा घोना लउ। ओच्छे चु गे ख्लागो’ भिसी भिमा, ³थे नाइकेसे चुहङ् भिसी म्हन्जी, ‘दाहेन्से डादा मालिकसे गेग्याम ते:बारी छ्याइबा मुला, डा तिग लइ? ख्वबा मोइबा लइ भिसम भड आरे, ह्रीसी चबारी डादा पे:बा खमुला। ⁴ दाहेन्से डाइ तिग लतो:बा थे डादा था मुला, डादा मालिकसे गेग्याम ते:माहेन्से म्हिंगदेसे डादा मान लला भिबा ताम डाइ था याड्सी जिन्बा मुला।’⁵ जमाहेन्से थेसे हाडला मालिकला असामीगदेदा गिक गिक लसी ड्योइजी। ओच्छे थेसे डाच्छा खबा असामीदा ‘एदा डाला मालिकला छे गाते मुला?’ भिसी ड्योइमा, ⁶थे असामीसे ‘हजार सोम लिटर छ्युगु मुला’ भिसी भिमाहेन्से थे नाइकेसे ‘दाहेन्से एला तमसुकरी हजार गिकसे ग्यार्जा डा लिटर जे भ्रिउ’ भिसी भिजी। ⁷थेहङ् लसी स्य्हान्दोदाएनोन ‘एदा डाला मालिकला छे गाते मुला?’ भिसी ड्योइमा, थे असामीसे ‘हजार गिक बोरा ग्वा मुला’ भिसी भिमाहेन्से थे नाइकेसे ‘एला तमसुकरी ग्यार्जा भ्रे: बोरा जे भ्रिउ’ भिसी भिजी।

⁸ “मालिकसे थे बेइमान नाइकेसे चलाक गे लबा म्राड्सी थेला हर्गबढाइ लजी। तिग्दा भिसम चु जम्बुलिडला म्हिंगदे हाडला हो स्होबारी परमेश्वरदा डोसेबा म्हिंगदे भन्दा ल्हानान चलाक तमुला। ⁹थेतबासेलमा एनीगदेसे डाला ताम ड्यानगो, एनीगदेसे हाडला लागिरी जम्बुलिडला धन सम्पत्तिसे हो स्होउ। तिग्दा भिसम एनीगदेला धन सम्पत्ति जिन्सी निसैनोन थेनीगदेसे एनीगदेदा जुकजुकधोना चिबा ग्लारी मान लला।

जजाबा तामरीन विश्वास लखम्बा ततो:ला

मत्ती ६:१४

¹⁰ येसूसे दो:सी चुहङ् भिसी सुङ्जी, “खालैसे जजाबा तामरी विश्वासला गे लजी भिसम थेदा घेन गेरीएनोन विश्वास लला।

तर जजाबा तामरी विश्वासला गे आलनी भिसम थेदा घेन गेरीएनोन विश्वास आल। ¹¹ थेतबासेलमा एनीगदेसे जम्बुलिडला धन सम्पत्तिरी विश्वासला गे आलनी भिसम खाल्से एनीगदेदा सत्यला धन सम्पत्ति जिम्मा पिन्ना? ¹² थेह्ङ् लसीन स्य्हान्दोला धन सम्पत्तिरी विश्वासला गे आलनी भिसम एनीगदेदा धन सम्पत्ति खाल्से पिन्ना?

¹³ “खजिबै नोकरसे मालिक न्हीला गे लबारी आखम। तिग्दा भिसम थेसे गिकदा हेला लला, स्य्हान्दोदा माया लला, अथवा गिकसे भिबा ताम ड्यानना, स्य्हान्दोदा वास्तान आल। थेह्ङ् लसीन एनीगदेसेनोन परमेश्वरदेन धन सम्पत्ति न्हीलान गे लबारी आखम।”*

येशूसे लोप्बा अर्गु तामगदे

मत्ती ११:१२-१३; ५:१८, ३२

¹⁴ चु ताम थे:सी थेरी मुबा फरिसीगदेसे येशूदा खिसी लजी। तिग्दा भिसम थेनीगदे टाङ्गाला लिच्छा जे भ्रमुबा। ¹⁵ ओच्छे येशूसे थेनीगदेदा “म्हिगदेला ओन्छाडरी हाडसे हाडदान डनी ज्यबा म्हि हिन्ना भिसी भ्रबा एनीगदेन हिन्ना। तर परमेश्वरदा एनीगदेला सेम खाह्ङ्बा मुला भिसी था मुला। तिग्दा भिसम म्हिगदेसे घेन भिसी म्हन्बा तामगदे परमेश्वरला लागिरी ल्हानान नइबा खबा ताम हिन्ना। ¹⁶ “बप्तिस्मा पिन्बा यूहन्नाला धुइधोना मोशाला ठिमदेन अगमवक्तागदेसे भ्रिबा परमेश्वरला बचन थे:ना लबा मुबा। थेनोन धुइहेन्से परमेश्वरला यहुल्साला समाचार थे:ना लबान मुला। ओच्छे जम्मान म्हिगदे भड लसी परमेश्वरला यहुल्सारी वाड्बान मुला।” ¹⁷ मुदेन जम्बुलिड नाश तसैनोन परमेश्वरसे मोशादा पिन्बा ठिमरी मुबा ताम गिकनोन आम्हा।*

* 16:13 मत्ती ६:२४ * 16:16 मत्ती ११:१२-१३ * 16:17 मत्ती ५:१८

18 “खालै म्हिसे हाडला म्रिडदेन छ्याम छोडपत्र लसी स्य्हान्दो म्रिडम्हेमेदेन छ्याम ब्याह लजी भिसम थे चा ब्रेल्सी भ्रबा हिन्ना। थेहड् लसी थेसे ख्लाबा म्रिडम्हेमेदा जुन म्हिसे ब्याह लला थेएनोन ब्रेल्सी भ्रबा हिन्ना।”*

फ्युकपो म्हिदेन लाजरस

19 दोःसी येशूसे चुहड् भिसी सुड्जी, “ग्ला गिकरी फ्युकपो म्हि गिक मुबा। थेसे मलमलला महंगो क्वान क्वान्सी धिन धिननोन मोजमजा लसी चिमुबा। 20 तर थेला प्रापरी चा जिउ नाड पोरनोन पोर मुबा लाजरस भिबा ह्रीबा म्हि गिकदा भसी थान्मुबा। 21 थे फ्युकपो म्हिसे चमा ताइबा भ्राइभ्रुइ चम्याड्ला वा भिसी च्यासी चिमुबा। नगीगदे चा खसी थेला पोर ल्हेम्मुबा।

22 “तिरेकुनु थे प्राडबो म्हि सिजी। जमाहेन्से थेदा स्वर्गदूतगदेसे अब्राहामला डामरी भोर्सी थान्जी। ओच्छे थे फ्युकपो म्हिएनोन सिजी। 23 थे फ्युकपो म्हि नर्गरी ल्हानान दुख नासी चिबा धुइरी थेसे च्यामा थारेडग्याम अब्राहामला डामरी लाजरसदा प्राड्जी। 24 ओच्छे थेसे क्रिड्सी ‘आबा अब्राहाम, डादा दया लसी लाजरसदा डा मुबा ग्लारी पुइखउ। थेला या जुम्बी क्युइरी ब्लुम्सी डाला लेरी थोपा गिक क्युइ ताइना लगै। तिग्दा भिसम डा चुरी मेसे क्रोसी भोल्सी चिबा मुला’ भिसी भिजी।

25 “जमाहेन्से अब्राहामसे थेदा ‘झा, एसे तिग ढन्बा आरे? ए सोबा धुइरी ल्हानान सुख याड्बा मुबा, तर लाजरससे चा ल्हानान दुख याड्बा मुबा। दान्दे चा लाजरससे चुरी सुख शान्ति याड्बा मुला, एसे चा दुख नासी चितोःबा मुला। 26 एदेन छ्याम डन्ना गुडरी घेन व्हाड मुला। थेतबासेलमा क्याम्सड झासम लबा सेम मुसैनोन क्याम्सड झासम लबारी आखम्मुला’ भिसी भिजी।

* 16:18 मत्ती ५:३२; १ कोर ७:१०-११

27 “जमाहेन्से थे फ्युक्पो म्हिसे ‘थेहड् भिसम आबा अब्राहाम, डाला बिन्ती मुला, लाजरसदा डाला आबाला दिमरी पुइगो।
28 तिग्दा भिसम थेरी डाला आले डा मुला। थेसे थेनीगदेदा डा हड् लसी थाभ्रउ भिसी पाङ्गै, आहिन्सम थेनीगदेएनोन चु दुख नातो:बा ग्लारी खला’ भिसी भिजी।

29 “जमाहेन्से अब्राहामसे, ‘थेनीगदेदेन छ्याम मोशादेन अगमवक्तागदेसे भिबा परमेश्वरला बचन मुनोन मुला, एला आलेगदेसे थे बचनरी भिबा ताम ड्यानसम तनोन तला’ भिसी भिजी।

30 “ओच्छे थे फ्युक्पो म्हिसे ‘आहिन अब्राहाम आबा, थेनीगदेदा ओतेसे जे आत। सिबा म्हिगदे न्हडला खालै सोसी थेनीगदे मुबा ग्लारी निजी भिसम थेनीगदे हाड हाडला पाप ख्लासी परमेश्वरपट्टि दो:सेला मुबा’ भिसी भिजी।

31 “तर अब्राहामसे थेदा ‘मोशादेन अगमवक्तागदेला ताम आड्यानबागदेसे सिबा म्हि सोसी निसैनोन थेनीगदेसे विश्वास आल’ भिसी भिजी।”

17

येशूसे विश्वासदेन माफ लतो:बा भिसी लोपबा

मत्ती १८:६-७, २१-२२; मर्कुस ९:४२

1 येशूसे हाडला चेलागदेदा चुहड् भिसी सुड्जी, “च्यागो, म्हिदा पापरी फसब लबा तामगदे मी खनोन खमुला। तर स्य्हान्दोदा पापरी फसब लबा म्हिसे चा परमेश्वरग्याम सजाय याड्ला।

2 जुन म्हिसे चु कोलागदेदा पाप लपुड्ला थेहड्बा म्हिदा पाप लपुड्बा भन्दा खारेरी हान्दा च्योसी समुन्द्ररी भ्याड्बान ज्यबा तला।
3 थेतबासेलमा हाडला लागिरी होशियार तसी चिउ! एला आलेसे पाप लजी भिसम थेदा बड्गो। ओच्छे थेसे डाइ लबा पाप

खलाला भिजी भिसम थेदा माफ लउ।* 4 एला आलेसे एला बिरोधरी धिनना निसरेमधोना पाप लसैनोन निसरेमधोनान थेसे डाइ लबा पाप खलाला भिजी भिसम थेदा माफ लउ।”

5 जमाहेन्से प्रभुला मुल चेलागदेसे प्रभुदा “प्रभु, डन्ना विश्वास ल्हेना लसी पिन्गो” भिसी भिजी।

6 प्रभुसे थेनीगदेदा “एनीगदेदेन छ्याम पच्छैला बलु गिक तेःबा जे विश्वास मुजी भिसम चु किम्बुला दोडदा ‘ए प्योक्सी समुन्द्ररी निउ’ भिजी भिसम थे एनीगदेसे भिबा हड्णोन तला।

नोकरसे लतोःबा गे

7 “एनीगदे न्हडरी खालैला नोकर बु मोइसी तसै ग्यु छसी तसै दिमरी खमा, एनीगदेसे थेदा ‘चबा थुड्बा लउ’ भिसी खाइमै भिला? आभि। 8 बरु एनीगदेसे थेदा ‘निउ, डाला लागिरी चबा थुड्बा तयार लउ, डाइ चसी आजिन्तेधोना डादा क्योड्सी चिउ, ओच्छे ए चउ’ भिसी भिला। 9 हाडसे कुल्बा अन्छार गे लबा थे नोकरदा एसे खाइमै धन्यवाद पिन्ना? आपिन। 10 थेहड् लसीन एनीगदेदा कुल्बा जम्मान गे लसी जिन्माहेन्से ‘डनी मी गे आखेल्बा नोकर हिन्ना। तिग्दा भिसम डन्से लतोःबा गे जे लबा हिन्ना’ भिसी भिउ।”

येशूसे कोरे खबा म्हि च्युइदा खम्ना लबा

11 येशू यरूशलेम भिबा शहररी फेप्बा धुइरी सामरियादेन गालील अञ्चलग्याम तबान फेप्जी। 12 येशू नाम्सा गिकरी वाड्बारी छ्याइबा धुइरी कोरे खबा म्हि च्युइदा स्याप्जी। थे कोरे खबा म्हिगदे जजाकी क्याथाडनोन राप्सी, 13 “येशू गुरु, डन्दा दया लउ” भिसी क्रिड्जी।

14 जमाहेन्से येशूसे थेनीगदेदा “एनीगदे परमेश्वरला मन्दिररी पूजा लबा म्हि मुबा ग्लारी निसी हाडदा उन्गो” भिसी सुड्जी।

* 17:3 मत्ती १८:१५

ओच्छे थेनीगदे निना निनान ग्यामरीन खमजी।* 15 थेनीगदे न्हडला गिकसे हाड खम्बा था याड्सी परमेश्वरदा जयजयकार लबान दोःसी खजी। 16 ओच्छे थे म्हिसे येशूदा धन्यवाद पिन्सी येशूला स्य्हापरी फ्या लजी। थे म्हि चा सामरी य्हुलला मुबा।

17 जमाहेन्से येशूसे “कोरेग्याम खम्बा म्हि च्युइ न्हडरी चु गिक जेन हिनना? स्य्हान्दो म्हि कु चा खानड निजी? 18 परमेश्वरदा धन्यवाद पिन्बारी चु सामरी बाहेक स्य्हान्दो खालै आतनी?” भिसी सुड्जी। 19 जमाहेन्से येशूसे थे सामरी य्हुलला म्हिदा “दाहेन्से ए रेःसी निउ, एला विश्वाससे लमा एला कोरे म्हाबा मुला” भिसी सुड्जी।

परमेश्वरला य्हुल्सा एनीगदेला गुडरीन मुला

मत्ती २४:२३-२८, ३७-४१

20 फरिसीगदेसे परमेश्वरला य्हुल्सा खाइमा खला भिसी ड्योइमा, येशूसे थेनीगदेदा “परमेश्वरला य्हुल्सा म्हाड्ना लसी आख। 21 खालै म्हिसे परमेश्वरला य्हुल्सा चुरी मुला, थेरी मुला भिसी भिदेमा एनीगदेसे आम्राड्। तिग्दा भिसम परमेश्वरला य्हुल्सा एनीगदेला गुडरीन मुला” भिसी सुड्जी।

22 जमाहेन्से येशूसे हाडला चेलागदेदा चुहड् भिसी सुड्जी, “एनीगदेसे तिरेकुनु परमेश्वरसे पुइखबा म्हिदा च्याबा सेम लला, तसैनोन एनीगदेसे आम्राड्। 23 म्हिगदेसे एनीगदेदा थे थेरी मुला, चुरी मुला भिसी भिला, जमा धुइरी एनीगदे थानिउ ओच्छे थेनीगदेला लिच्छा थाभ्रउ। 24 तिग्दा भिसम परमेश्वरसे पुइखबा म्हि तिप्लीड खबा धुइरी मुला कुनी गिकग्याम अर्गु कुनीधोना य्हाल तबा हड् तला। 25 तर डाच्छा थेसे ल्हानान दुखदेन म्हिगदेसे लबा बिरोध नातोःबा मुला।

* 17:14 लेवी १४:१-३२

18

हेम्बो सिबा म्रिडम्हेमेदेन न्यायाधीशला उखान

¹ जमाहेन्से येशूसे हाडला चेलागदेदा “सदन प्रार्थना लसी चिगै ओच्छे खाइमै हरेस थाचगै” भिसी उखान गिक सुड्जी। ² “शहर गिकरी न्यायाधीश गिक मुबा। थेसे परमेश्वरदेन म्हिगदेला वास्ता आलमुबा। ³ थेनोन शहररी हेम्बो सिबा म्रिडम्हेमे गिकएनोन मुबा। थे म्रिडम्हेमे घरिघरि थे न्यायाधीश मुबा ग्लारी निसी ‘डादा डाला बिरोधरी रे:बा म्हिग्याम ठीक निसाफ लसी पिन्गो’ भिसी भिमुबा।

⁴ “तिगै धिनधोना मी थेसे थे म्रिडम्हेमेला तामदा आड्यान्नी। तर लिच्छा थेसे, ‘डा परमेश्वरदेन म्हिगदेला वास्ता आलबा म्हि हिन्ना। ⁵ तर चु हेम्बो सिबा म्रिडम्हेमेसे डादा ल्हानान दुख पिन्बासे लमा चुला ठीक निसाफ लसी पिन्तो:जी। आहिन्सम चु घरिघरि खसी डादा छेर्ना लला’ भिसी सेमरी म्हन्जी।”

⁶ जमाहेन्से प्रभुसे चुहड् भिसी सुड्जी, “च्यागो, थे आज्यबा न्यायाधीशसे तिग लबा चीम, एनीगदेसे था याड्गो। ⁷ थेहड् लसीन परमेश्वरसे धिन म्हुननोन बिनती लबा हाडसे धम्बा हाडला म्हिला ठीक निसाफ आल? तिग हाडला म्हिदा ह्ये लबारी घडना लला? ⁸ च्यागो, परमेश्वरसे हाडला म्हिला ठीक निसाफ लबारी खाइमै घडना आल। तसेनोन परमेश्वरसे पुड्खबा म्हि खमा तिग चु जम्बुलिडरी डादा विश्वास लबागदे स्याप्ला?”

म्हि न्हीला प्रार्थना

⁹ हाडसे हाडदान डा ज्यबा म्हि हिन्ना भिसी ढुकक तसी स्य्हान्दोदा चा हेला लबा म्हिगदेदा येशूसे चुहड् भिसी उखान गिक सुड्जी, ¹⁰ “फरिसीदेन तिरो दुड्बा म्हि प्रार्थना लबारी परमेश्वरला मन्दिररी निजी। ¹¹ ओच्छे फरिसीसे चुहड् भिसी प्रार्थना लजी, ‘परमेश्वर हाडदा धन्यवाद मुला, तिग्दा भिसम

डा स्यूहान्दो म्हिगदे हड्बा लोभी, बेइमानी, स्यूहान्दोदेन छ्याम ब्रेल्सी भ्रबा म्हि हड्बा आहिन। ओच्छे चु तिरो दुइबा म्हि हड्बाएनोन आहिन। ¹² डाइ सातारी न्हीरेम फोइथान चिसी प्रार्थना लबा मुला। ओच्छे डाइ याड्बा जम्मान स्हेला भो च्युइला भो गिक हाडदा पिन्बा मुला।'

¹³ "तर तिरो दुइबा म्हि चा थारेडनोन राप्सी स्वर्गपट्टि आच्याना हाडला कु ठोक्बान, 'परमेश्वर, डा पापीदा दया लउ' भिसी भिजी। ¹⁴ थेतबासेलमा एनीगदेसे डाला ताम ड्यान्गो, चु तिरो दुइबा म्हि चा स्यूहान्दो म्हि भन्दा परमेश्वरदा सेम निबा म्हि दोसी हाडला दिमरी निजी। तिग्दा भिसम जुन म्हिसे हाडसे हाडदान घेन स्होला थे म्हि जजा तला। तर जुन म्हिसे हाडसे हाडदान जजा स्होला थे म्हि घेन तला।"*

येशूसे कोलागदेदा मोलम पिन्बा

मत्ती १९:१३-१५; मर्कूस १०:१३-१६

¹⁵ म्हिगदेसे हाडला कोलागदेदा येशूसे हाडला छ्या थान्सी मोलम पिन्गै भिसी येशू मुबा ग्लारी भजी। चु म्राड्सी चेलागदेसे थेनीगदेदा बड्जी। ¹⁶ तर येशूसे थेनीगदेदा ड्योइसी चुहड् भिसी सुड्जी, "कोलागदेदा डा मुबा ग्लारी खपुड्गो, थेनीगदेला ग्याम थाकागो। तिग्दा भिसम परमेश्वरला य्हुल्सा चु कोलागदे हड्बालान हिन्ना। ¹⁷ एनीगदेसे डाला ताम ड्यान्गो, जुन म्हिसे चु कोलागदेसे हड् लसी परमेश्वरला य्हुल्सादा विश्वास आल, थे म्हि परमेश्वरला य्हुल्सारी खाइमै वाड्आम्याड्।"

परमेश्वरला य्हुल्सादेन फ्युक्पो म्हि

मत्ती १९:१६-३०; मर्कूस १०:१७-३१

* 18:14 मत्ती २३:१२; लूका १४:११

18 यहूदी नेता गिकसे येशूदा “ज्यबा गुरु, जुकजुकधोनाला जुनी याड्बाला लागिरी डाइ तिग लतो:ला?” भिसी ड्योइमा, 19 येशूसे थेदा चुहड् भिसी सुड्जी, “एसे डादा तिग्दा ज्यबा भिबा? परमेश्वर बाहेक खालै ज्यबा आरे। 20 परमेश्वरसे कुल्बा ताम एदा थानोन मुला। म्हि थासाइगो, स्यूहान्दोदेन छ्याम ब्रेल्सी थाभ्रउ, य्हो थालउ, लुसीला ताम पाड्सी थाभ्रउ ओच्छे हाडला आबा आमादा मान लउ।”*

21 जमाहेन्से थेसे, “चु जम्मान ताम मी डाइ जत्धुगुहेन्सेन लसीन चिबा मुला” भिसी भिजी। 22 चु ताम थे:माहेन्से येशूसे थेदा “अझ एसे गे गिक लतो:बा मुला, दाहेन्से एसे हाडदेन छ्याम मुबा जम्मान धन सम्पत्ति चूड्सी प्राड्बोगदेदा भो लसी पिन्गो। एसे स्वर्गरी धन सम्पत्ति याड्ला, ओच्छे डादेन छ्याम भ्रउ” भिसी सुड्जी। 23 तर चु ताम थे:सी थे म्हिदा ल्हानान दुख ड्हमजी। तिग्दा भिसम थे ल्हानान फ्युक्पो मुबा।

24 थे म्हिला सेमरी ल्हानान दुख तबा था याड्सी येशूसे चुहड् भिसी सुड्जी, “थेदा च्यासी फ्युक्पो म्हिदा परमेश्वरला य्हुल्सारी वाड्बारी गाते गाहो मुला। 25 तिग्दा भिसम फ्युक्पो म्हिदा परमेश्वरला य्हुल्सारी वाड्बारी भन्दा ऊँटदा दापला मीग्याम वाड्बारी सजिलो मुला।”

26 चु ताम थे:बागदेसे येशूदा “थेहड् भिसम खाल्से थार्बा याड्ला?” भिसी ड्योइजी।

27 जमाहेन्से येशूसे थेनीगदेदा “चु गे म्हिसे लबारीन आखम्बा गे तसैनोन परमेश्वरसे लखम्ला” भिसी सुड्जी।

28 ओच्छे पत्रुससे, “स्हीगो प्रभु, डन्से हाडला दिमनामनोन ख्लासी हाडदेन छ्याम भ्रबा मुला” भिसी भिमा, 29 येशूसे थेनीगदेदा “एनीगदेसे डाला ताम ड्यान्गो, जुन म्हिसे हाडला दिम, मिड,

* 18:20 प्रस्था २०:१२-१६; वयव ५:१६-२०

ज्योज्यो आले, आबा आमा, ओच्छे झा झामेदा परमेश्वरला
यहुल्साला लागिरी खलाला, ³⁰ थेसे दान्देन थे भन्दा ल्हाना
याड्ला, ओच्छे लिच्छा खबा धुइरी थेसे जुकजुकधोनाला जुनी
याड्ला” भिसी सुड्जी।

येशूसे हाडला साइला भिसी सुड्बा

मत्ती २०:१७-१९; मर्कूस १०:३२-३४

³¹ येशूसे हाडला च्युक न्ही चेलागदेदा कुनी गिकरी भोर्सी चुहड्
भिसी सुड्जी, “च्यागो, य्हाड यरूशलेमरी निबान मुला। दाहेन्से
परमेश्वरसे पुइखबा म्हिला बारेरी अगमवक्तागदेसे भिबा ताम
पूरा तला। ³² थेदा अर्गु यहुलला म्हिगदेला यारी जिममा पिन्ना।
जमाहेन्से थे म्हिगदेसे थेदा खिसी लला ओच्छे थो स्वाबान
बेइज्जत लला, ³³ जमाहेन्से कोर्से तोला ओच्छे साइला। तसैनोन
थे सोमरेमाकुनु सिबाग्याम सोला।” ³⁴ तर चेलागदेसे चु ताम
तिगै आघोनी। तिग्दा भिसम चु ताम म्हिला ज्ञान बुद्धिसे घोसी
घोआखम्बा तबासे लमा येशूसे तिग सुड्बा हिन्ना भिसी थेनीगदेसे
म्हन्बारीएनोन आखम्नी।

येशूसे मी आम्राड्बा म्हिला मी म्राड्ना लबा

मत्ती २०:२९-३४; मर्कूस १०:४६-५२

³⁵ येशू यरीहो शहरला डामरी धोमा थेरी मी आम्राड्बा म्हि गिक
ग्यामला कुनीरी हीसी चिमुबा। ³⁶ थे मी आम्राड्बा म्हिसे हाडला
डामग्याम म्हिला हुल निबान लबा थे:सी, “चुरी तिग तजी?” भिसी
ड्योइमा, ³⁷ म्हिगदेसे थेदा “नासरतला येशू चुग्यामसेन फेप्वान
मुला” भिसी भिजी।

³⁸ जमाहेन्से थेसे क्रिड्वान, “दाऊद ग्लेला सन्तान येशू, डादा
दया लउ” भिसी भिमा, ³⁹ डाच्छा भ्रबागदेसे थेदा कुटिसी चिउ भिसी

बड्जी। तर थेसे झन क्रिड्बान, “दाऊद ग्लेला सन्तान येशू, डादा दया लउ” भिसी भिजी।

40 थेसे चुहड् भिबा थे:सी येशू थेन तसी थेदा हाड मुबा ग्लारी भपुड्जी। ओच्छे थे डामरी खमाहेन्से, 41 “डाइ एला लागिरी तिग लउ भिसी म्हन्बा मुला?” भिसी ड्योड्जी। जमाहेन्से थेसे “प्रभु, डाला मी म्राड्ना लसी पिन्गो” भिसी भिजी।

42 येशूसे थेदा “लु, एसे म्राड्गै, एसे विश्वास लबासे लमा एसे म्राड्बा मुला” भिसी सुड्जी। 43 येशूसे चुहड् सुड्मैछ्याम थेसे म्राड्जी। ओच्छे थेसे परमेश्वरदा जयजयकार लबान येशूदेन छ्याम भ्रजी। चु म्राड्बा म्हिगदेसेनोन परमेश्वरदा जयजयकार लजी।

19

तिरो दुइबा जखायस

1 येशू यरीहो शहरग्याम फेपबान मुबा। 2 थेरी जखायस भिबा फ्युक्पो म्हि गिक मुबा। थे तिरो दुइबा म्हिगदे न्हडला मुल म्हि मुबा। 3 थेसे येशूदा खाल चीम भिसी च्याबारी म्हाइजी। तर महिला हुलसे लमा थेसे येशूदा आम्राड्नी। तिग्दा भिसम थे मेबा मुबा। 4 थेतबासेलमा येशूदा च्याबारी थे डाच्छा डाच्छा यार्बान निसी अञ्जीरला दोडरी क्रे:जी। तिग्दा भिसम येशू थेग्यामसेन फेपबारी छ्याइबा मुबा। 5 थेरी धोखमाहेन्से येशूसे तोरपट्टि सहीसी जखायसदा “जखायस, ए योना मार फापसी खउ! तिग्दा भिसम तिनी डा एला दिमरी चितो:बा मुला” भिसी सुड्जी।

6 जमाहेन्से जखायस ताड्सी मार फापसी येशूदा फ्याफुल्जी। 7 चु म्राड्माहेन्से म्हिगदेसे “चु म्हि मी पापीला दिमरी डोन्बो दोसी निजी” भिसी येशूला तामगन लजी।

8 तर जखायससे “प्रभु, दाहेन्से डाइ डाला गडसल धन सम्पत्ति प्राडबोगदेदा भो लसी पिन्ना, ओच्छे डाइ खालैदा ठगब लसी किन्बा मुसम थेदा भो बलि ल्हाना दोःसी पिन्ना” भिसी भिजी।

9 जमाहेन्से येशूसे थेदा “तिनीहेन्से चु दिमसे थार्बा याड्बा मुला। तिग्दा भिसम जखायसएनोन अब्राहामला सन्तान हिनना। 10 परमेश्वरसे पुड्खबा म्हि म्हाबागदेदा म्हाइबारीदेन थार्बा पिन्बारी खबा हिनना” भिसी सुड्जी।

म्हरला डबलला उखान

मत्ती २५:१४-३०

11 येशू यरूशलेमला डामरी धोमुबा। म्हिगदेसे दाहेन्से परमेश्वरला यहुल्सा योनान खबान मुला भिसी म्हनसी येशूला ताम ड्यान्सी चिमुबा। थेतबासेलमा येशूसे थेनीगदेदा चुहड् भिसी उखान गिक सुड्जी, 12 “खालै घ्रेन म्हि गिक ह्वाडला ग्लारी शासन लबा सेम लसी थे यहुल्साला ग्ले मुबा ग्लारी निजी। 13 निबा भन्दा डाच्छा थेसे ह्वाडला नोकर च्युइदा ड्योइजी। ओच्छे जम्मादान म्हरला डबल गिक गिक पिन्सी ‘डा आखतेधोना चु टाडगासे व्यापार लउ’ भिसी कुल्जी। 14 तर थेला यहुल्साला म्हिगदेसे चा थेदा सेम आनिमुबा। थेतबासेलमा थे निसी जिन्माहेन्से ‘चु म्हिसे शासन लगै भिबा डन्ना सेम आरे’ भिसी ग्ले ब्लोनदा पुड्जी।

15 “तर थे म्हि शासन लबा अधिकार किन्सी खजी। जमाहेन्से थेसे ह्वाडला नोकरगदेदा व्यापार लसी गाते स्होजी भिसी ड्योइबारी ड्योइजी। 16 ओच्छे डाच्छा खबा नोकरसे ‘मालिक, ह्वाडसे पिन्बा डबल गिकसे डाइ डबल च्युइ स्होजी’ भिसी भिजी। 17 जमाहेन्से थे म्हिसे थेदा ‘स्याबास! ए डाला ज्यबा नोकर हिनना! तिग्दा भिसम एसे डादा जजा तामरी विश्वास उन्जी। थेतबासेलमा डाइ एदा शहर च्युइरी शासन लबा अधिकार पिन्ना’ भिसी भिजी।

† 19:13 “म्हरला डबल गिक” भिबा चा थे धुइरी ला सोमला तलब हिनना।

18 ओच्छे स्यूहान्दो नोकरसे 'मालिक, ह्वाडसे पिन्बा डबल गिकसे डाइ डबल डा स्होजी' भिसी भिजी। 19 जमाहेन्से थेदाएनोन थे म्हिसे 'ए शहर डाला मुल म्हि तला' भिसी भिजी। 20 ओच्छे स्यूहान्दो नोकरएनोन खसी 'मालिक, डाइ ह्वाडला म्हरला डबल रूमालरी झोर्सी थान्बा मुला, थे चुरी मुला। 21 ह्वाड खरो म्हि भिसी डादा था मुबासे लमा डादा लोड्बा खजी, ह्वाडसे व्यापार आलबा ग्लारी नाफा म्हाइमुला, ओच्छे तिगै आढ्वबा ग्लारी बाली दुइबारी म्हाइमुला' भिसी भिजी। 22 थे शासन लबा म्हिसे थेदा 'गे आखेल्बा नोकर! एला तामग्यामसेन डाइ ए गे आखेल्बा चीम भिसी निसाफ लला। डाइ व्यापार आलबा ग्लारी नाफा म्हाइमुला ओच्छे तिगै आढ्वबा ग्लारी बाली दुइबारी म्हाइबा खरो म्हि भिसी एदा थानोन चीम। 23 थेहड् भिसम एसे तिग डाइ पिन्बा डबल बैकरी आथान्नी? एसे बैकरी थान्बा हिन्सम डाइ दोःसी ब्याजदेन थे डबल किन्म्याड्सेला' भिसी भिजी। 24 ओच्छे थेसे थेरी राप्सी चिबागदेदा 'दाहेन्से थेग्याम थे म्हरला डबल ब्यन्सी गोर च्युड डबल मुबादा पिन्गो' भिसी भिजी। 25 जमाहेन्से थेनीगदेसे 'मालिक, थेदेन छ्याम मी डाच्छालान गोर च्युड डबल मुला' भिसी भिमा, 26 थे शासन लबा म्हिसे थेनीगदेदा 'एनीगदेसे डाला ताम ड्यान्गो, तिग्दा भिसम जुन म्हिदेन छ्याम मुला थेदा अर्गुएनोन पिन्ना। तर जुन म्हिदेन छ्याम आरे थेदेन छ्याम मुबा जजाकीएनोन थेग्याम ब्यन्ना। 27 थेतबासेलमा डाइ शासन थालगै भिसी म्हन्बा डाला शत्रुगदेदा चुरी भसी डाला डाच्छापट्टि साइगो' भिसी कुल्जी।”

येशू यरूशलेमरी फेपूबा

मत्ती २१:१-११; मर्कूस ११:१-११; यूहन्ना १२:१२-१९

28 चुहड् सुड्सी जिन्माहेन्से येशू थेनीगदेला डाच्छा डाच्छा यरूशलेमपट्टि फेपूजी। 29 ओच्छे बेथफागेदेन बेथानिया नाम्साला

डामला जैतून भिबा गडरी धोखमाहेन्से येशूसे हाडला चेलागदे न्हडला न्हीदा पुइजी। ³⁰ पुइबा धुइरी चुहड् भिसी सुइजी, “एनी जजाकी क्याथाडला नाम्सारी निउ। नाम्सारी धोमाहेन्से एनीगदेसे दान्देधोना खालै आक्रेःबा गधाला कोला गिक स्याप्ला। थेदा ब्लासी चुरी भसी खउ। ³¹ बलबारी छ्याइमा खालैसे एनीदा ‘चुदा तिग्दा बलबा’ भिसी ड्योइजी भिसम, ‘चु प्रभुदा तोःबा मुला’ भिसी भिउ।”

³² जमाहेन्से थे चेला न्ही नाम्सारी निजी। ओच्छे थेरी थेनीसे येशूसे सुइबा हड् नोन गधाला कोला स्यापजी। ³³ थेनीसे थे गधाला कोलादा बलबारी छ्याइमा थे गधाला धनीसे “एनीसे चु गधाला कोलादा तिग्दा बलबा?” भिसी ड्योइजी।

³⁴ ओच्छे चेला न्हीसे “चु प्रभुदा तोःबा मुला” भिसी भिजी।

³⁵ जमाहेन्से थे चेला न्हीसे गधाला कोलादा येशू मुबा ग्लारी भसी हाडला घ तीसी येशूदा थेथोरी धन्छ्यापुइजी। ³⁶ येशू फेप्वारी छ्याइबा धुइरी म्हिगदेसेनोन ग्यामरी हाड हाडला घगदे तीजी।

³⁷ येशू यरूशलेम डामला जैतून भिबा गडला ग्युरोरी धोखमा येशूदेन छ्याम भ्रबा चेलागदेसे येशूसे लबा उदेकला गेगदे ढन्सी ताड्बान क्रिड्सी चुहड् भिसी परमेश्वरदा धन्यवाद पिन्बारी छ्याइजी,

³⁸ “परमप्रभुला मिनरी फेप्वबा ग्लेसे परमेश्वरग्याम मोलम याङ्गै,

स्वर्गरी शान्ति तगै।

ओच्छे स्वर्गरी धन्छ्याबा परमेश्वरदा मानदेन

जयजयकार तगै।

³⁹ महिला हुल न्हडग्याम फरिसीगदेसे येशूदा “गुरु, हाडला चेलागदेदा कुटिसी चिउ भिसी बड्गो” भिसी भिजी।

40 तर येशूसे थेनीगदेदा “डाला ताम ड्यानगो, चुगदे कुटिसी चिजी भिसम युड्बागदेन क्रिड्बारी छ्याइला” भिसी सुड्जी।

यरूशलेम नाश तला भिबा था याड्सी येशू क्राबा

41 यरूशलेम डामरी धोमा येशूसे शहरदा हाडला डाच्छापट्टि म्राड्सी क्राबान चुहड् भिसी सुड्जी, 42 “यरूशलेमला म्हिगदे, तिनी शान्तिला लागिरी तिग तोःला भिसी था याड्बा हिन्सम तसेला, तर एनीगदेसे था आयाड्नी! 43 थेतबासेलमा दाहेन्से एनीगदेला शत्रुगदे ढिक्सी क्युर्सीन खसी एनीगदेदा गुडरी झाड्ला। 44 ओच्छे थेनीगदेसे एनीगदेला शहरला पर्खाल फुप्सी एनीगदेला शहरदा नाश लला। जमाहेन्से एनीगदेला कोलागदेदा साइला। तिग्दा भिसम परमेश्वरसे एनीगदेदा थार्ना लबा धुइदा एनीगदेसे डोआसेनी।”

येशू परमेश्वरला मन्दिररी फेपबा

मत्ती २१:१२-१७; मर्कूस ११:१५-१९; यूहनना २:१३-२२

45 जमाहेन्से येशू परमेश्वरला मन्दिररी फेपजी। ओच्छे परमेश्वरला मन्दिर न्हडरी चूड्बागदेदा चुहड् भिसी सुड्बान तापजी, 46 “च्यागो, परमेश्वरला बचनरी ‘डाला दिम प्रार्थना लबा दिम तला’ भिसी भिबा मुला। तर एनीगदेसे मी यहोगदे चिबा ग्ला सहोबा मुला।”*

47 जमाहेन्से धिन धिननोन येशूसे परमेश्वरला मन्दिररी लोपबारी छ्याइजी। थे धुइरी परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे ओच्छे थे यहुल्साला नेतागदे ढिक्सी येशूदा साइबारी म्हाइमुबा। 48 तर थेनीगदेसे तिगै निउ आयाड्नी। तिग्दा भिसम जम्मान म्हिगदेसे सेम लसी येशूला ताम ड्यानमुबा।

* 19:46 यशै ५६:७; यर्मि ७:११

20

येशूला अधिकारला बारेरी ड्योइबा

मत्ती २१:२३-२७; मर्कूस ११:२७-३३

1 तिरेकुनु येशू परमेश्वरला मन्दिररी लोपबान मुबा ओच्छे परमेश्वरला यहुल्साला समाचार थेःना लबान मुबा। थेनोन धुइरी परमेश्वरला मन्दिररी पूजा लबा मुल म्हिगदेदेन यहूदी गन्बागदे ओच्छे यहूदी धर्मगुरुगदे येशू मुबा ग्लारी खजी। 2 ओच्छे थेनीगदेसे येशूदा “हाडसे खानडग्याम अधिकार याड्सी चु गे लबा हिन्ना? हाडदा चु अधिकार खाल्से पिन्बा हिन्ना?” भिसी ड्योइमा, 3 येशूसे थेनीगदेदा “डाइएनोन एनीगदेदा ताम गिक ड्योइला, थे ताम डादा पाड्गो। 4 यूहन्नासे पिन्बा बपुत्तिस्मा परमेश्वरग्याम हिन्ना कि म्हिग्याम हिन्ना?” भिसी ड्योइजी। 5 जमाहेन्से थेनीगदे हाड हाड न्हडरी ताम लबारी छ्याइजी, “परमेश्वरग्याम भिजी भिसम थेसे यहाडदा ‘थेहड् भिसम एनीगदेसे तिग्दा यूहन्नादा विश्वास आलबा?’ भिसी भिला। 6 तर म्हिगदेग्याम भिजी भिसम म्हिगदेसे यहाडदा बिरोध लला। तिग्दा भिसम थेनीगदेसे यूहन्नादा अगमवक्ता भिसी विश्वास लबा मुबा।” 7 थेतबासेलमा थेनीगदेसे येशूदा “खाइ, थेसे चु अधिकार खानडग्याम याड्जी डन्दा था आरे” भिसी भिमा, 8 येशूसे थेनीगदेदा “थेहड् भिसम डाइएनोन चु गेगदे खाल्ला अधिकारग्याम लबा हिन्ना, थे एनीगदेदा आपाड्” भिसी सुड्जी।

अधियाँ स्होबा म्हिगदेला उखान

मत्ती २१:३३-४६; मर्कूस १२:१-१२

9 जमाहेन्से येशूसे म्हिगदेदा उखान गिक सुड्जी, “म्हि गिकसे वारीरी अडगुर सूसी अधियाँरी पिन्सी थे ल्हानान धिनना लागिरी अर्गु यहुल्सारी निजी। 10 अडगुर मिन्बा धुइ तमाहेन्से थे फ्युकुपो

म्हिसे ह्वाडला भो किन्बाला लागिरी अधियाँ लबागदे मुबा ग्लारी ह्वाडला नोकरगदेदा पुइजी। तर थे अधियाँ लबागदेसे थेदा तोबा ग्याड्बा लसी तिगै आपिन्ना पुइजी। 11 थे वारीला धनीसे स्य्हान्दो नोकर गिकदा पुइजी। थेदाएनोन थे अधियाँ लबागदेसे तोसी बेइज्जत लसी थान्थान पुइखजी। 12 थेहड् लसीन थेसे दोःसी स्य्हान्दो नोकरदाएनोन पुइजी थेदाएनोन थे अधियाँ लबागदेसे सिबाधोनान् तोसी तेःजी।

13 “जमाहेन्से थे वारीला धनीसे ‘दाहेन्से डाइ तिग लसे? डाइ माया लबा डाला झादान पुइतोःजी। डाला झादा मी थेनीगदेसे मान लला वा?’ भिसी पुइजी। 14 तर थेदा म्राड्सी अधियाँ लबागदेसे ‘चु मी य्हाडला धनीला झा हिन्ना, य्हाडसे थेदा साइगे। जमाहेन्से थेला सम्पत्ति य्हाडलान तला’ भिसी ह्वाड ह्वाड न्हडरी ताम लजी। 15 जमाहेन्से थेनीगदेसे थेदा अडगुर वारीग्याम मडग्यार भोर्सी साइजी।”

चुहड् सुड्सी जिनमाहेन्से येशूसे थेनीगदेदा “दाहेन्से थे वारीला धनीसे थेनीगदेदा तिग लला तला? 16 थे खसी अधियाँ लबा म्हिगदेदा साइला ओच्छे थे अडगुरला वारी स्य्हान्दोगदेदा सहोबारी पिन्ना।” भिसी सुड्जी। चु थेःसी म्हिगदेसे “चुहड्बाम खाइमै थातगै” भिसी भिजी। 17 ओच्छे येशूसे थेनीगदेला लीरी स्हीसी चुहड् भिसी सुड्जी, “थेहड् भिसम परमेश्वरला बचनरी

‘जुन युडबादा दिम सहोबा कर्मीगदेसे गे आखेल भिसी भ्याड्बा मुबा

थेनोन युडबा दिमला सुर युडबा दोजी’

भिसी भ्रिबा चु तामला अर्थ तिग हिन्ना?*

18 थे युडबाथोरी ताइबागदे जम्मान छारछिर निला, ओच्छे थे युडबा खालैथोरी ताइजी भिसम थेरी मुबा म्हि फ्लातफ्लेत निला।”

* 20:17 भजन ११८:२२

तिरो फातोःबा कि फाआतोःबा भिसी येशूदा ड्योइबा
मत्ती २२:१५-२२; मर्कूस १२:१३-१७

19 जमाहेनसे यहूदी धर्मगुरुगदेदेन परमेश्वरला मन्दिररी पूजा लबा मुल म्हिगदेसे थे धुइरी येशूदा चुइबारी म्हाइजी। तिग्दा भिसम चु उखान येशूसे थेनीगदेलान बिरोधरी सुइबा हिन्ना भिबा ताम थेनीगदेदा था मुबा। तर थेनीगदे म्हिगदे म्हाइसी लोड्मुबा। 20 थेतबासेलमा थेनीगदेसे येशूदा चुइबारी दाउ च्याजी। थेनीगदेसे येशूदा तामग्याम फसब लसी रोमी अञ्चलाधीशला यारी जिम्मा पिन्बारी म्हाइमुबा। थेतबासेलमा हाडसे हाडदान डा ज्यबा म्हि हिन्ना भिसी भ्रबा म्हिगदेदा थेनीगदेसे येशू मुबा ग्लारी पुइजी। 21 थे म्हिगदे येशू मुबा ग्लारी निसी, “गुरु, हाडसे लोपबा ताम ठीक हिन्ना। हाडसे खालेला ली सहीसी गे आलमुला, ओच्छे हाडसे परमेश्वरला सत्य ग्याम उन्मुला भिसी डन्दा था मुला। 22 थेतबासेलमा डन्से रोमी ग्याल्बो कैसरदा तिरो फाबा य्हाडला ठिम अन्छार ठीक हिन्ना कि आहिन?” भिसी ड्योइजी।

23-24 तर येशूसे थेनीगदेला पापी सेम था याइसी येशूसे थेनीगदेदा “डादा डबल गिक भउ। चु डबलरी मुबा छापदेन मिन खाल्ला हिन्ना?” भिसी सुइमा, थेनीगदेसे “रोमी ग्याल्बो कैसरला” भिसी जोहाब पिन्जी। 25 जमाहेनसे येशूसे थेनीगदेदा “थेहड् भिसम रोमी ग्याल्बो कैसरला जति कैसरदा पिन्गो, परमेश्वरला जति परमेश्वरदा पिन्गो” भिसी सुइजी। 26 थेनीगदेसे महिला ओन्छाडरी येशूदा खजिबै तामग्याम फसब लसी चुइबारी आखमनी। ओच्छे येशूसे सुइबा तामरी थेनीगदे उदेक म्हन्सी कुटिसी चिजी।

सिबाग्याम सोना लबाला बारेरी ड्योइबा
मत्ती २२:२३-३३; मर्कूस १२:१८-२७

27 जमाहेन्से सिबाग्याम दोःसी आसो भिसी विश्वास लबा कोइ कोइ सदुकीगदे येशू मुबा ग्लारी खजी। 28 ओच्छे थेनीगदेसे येशूदा चुहड् भिसी ड्योइजी, “गुरु, मोशासे य्हाडदा पिन्बा ठिम अन्छार खालैला ज्योज्योसे ब्याह लसी कोलागदे आतनान सिजी भिसम ज्योज्योला लागिरी कोलागदे तगै भिसी आलेसे चाडदा ब्याह लतोःला भिसी भ्रिबा मुला। 29 ग्ला गिकरी ज्योज्यो आले निस मुबा। थेबासे ब्याह लजी, तर कोलागदे आतनान थे सिजी। 30 थेहड् लसीन पाराडसे चाडदा ब्याह लजी, थेएनोन कोलागदे आतनान सिजी। 31 जमाहेन्से साँजीसे चाडदा ब्याह लजी, थेएनोन कोलागदे आतनान सिजी। थेहड् लसी जम्मासेन पालोन पालो चाडदा ब्याह लजी। तर जम्मान कोलागदे आतनान सिजी। 32 ओच्छे थे म्रिडम्हेमेएनोन सिजी। 33 थेतबासेलमा डन्दा सुड्गो, सिबाग्याम सोना लजी भिसम थे म्रिडम्हेमे खजिबाला म्रिड तला? तिग्दा भिसम थेनीगदे जम्मासेन थे म्रिडम्हेमेदेन छ्याम ब्याह लबा मुला।”

34 जमाहेन्से येशूसे थेनीगदेदा चुहड् भिसी सुड्जी, “दान्देला म्हिगदेसे ब्याह लला, ओच्छे ब्याहएनोन लसी पिन्ना। 35 तर स्वर्गरी निम्याड्सेला म्हिगदे सिबाग्याम सोना लबा धुइरी ब्याह लसी आपिन ब्याहएनोन आल। 36 ओच्छे थेनीगदे खाइमै आसि तिग्दा भिसम थेनीगदे स्वर्गदूतगदे हड्बान तला। ओच्छे सिबाग्याम सोना लबाला सन्तान तबासे लमा थेनीगदे परमेश्वरला सन्तान हिनना। 37 परमप्रभुसे लुड्बा झाडग्याम मोशादा ‘डा अब्राहामला परमेश्वर, इसहाकला परमेश्वर ओच्छे याकूबला परमेश्वर हिनना’ भिसी सुड्बा ताम मोशासे भ्रिबा मुला। चु तामग्यामसेन सिबाग्याम सोना लमुला भिसी उन्बा मुला।* 38 परमेश्वर सिबागदेला परमेश्वर आहिन, तर सोबागदेला

* 20:37 प्रस्था ३:२, ६

परमेश्वर हिन्ना! थेतबासेलमा परमेश्वरला लागिरी जम्मान सोबा मुला।”

³⁹ जमाहेन्से कोइ कोइ यहूदी धर्मगुरुगदेसे “गुरु, हाडसे सुड्बा ताम ठीक हिन्ना” भिसी भिजी। ⁴⁰ जमाहेन्से खालैसेन येशूदा तिगै ताम इयोइबारी आँट आलनी।

येशू खाल हिन्ना

मत्ती २२:४१-४६; मर्कूस १२:३५-३७

⁴¹ जमाहेन्से येशूसे थेनीगदेदा चुहड् भिसी सुड्जी, “म्हिगदेसे खाहड् लसी थार्बा पिन्बा ख्रीष्टदा दाऊद ग्लेला सन्तान भिसी भिबा? ⁴²⁻⁴³ तिग्दा भिसम दाऊद हाडसेन भिबा व्हाइला किताबरी चुहड् भिसी भिबा मुला,

‘परमप्रभुसे डाला प्रभुदा डाइ एला शत्रुगदेदा एला काड धिरी आथान्तेधोना

ए डाला दाहिने यापट्टि चिउ भिसी सुड्जी।”*

⁴⁴ दाऊद ग्लेसेन ख्रीष्टदा प्रभु भिला भिसम खाहड् लसी ख्रीष्ट दाऊद ग्लेला सन्तान तला?”

यहूदी धर्मगुरुगदे म्राड्सी होशियार ततो:बा

मत्ती २३:१-३६; मर्कूस १२:३८-४०

⁴⁵ ओच्छे जम्मान म्हिगदेसे इयान्बान लबा धुइरी येशूसे हाडला चेलगदेदा चुहड् भिसी सुड्जी, ⁴⁶ “एनीगदे यहूदी धर्मगुरुगदे म्राड्सी होशियार तसी चिउ। तिग्दा भिसम थेनीगदे ज्यबा ज्यबा क्वान क्वान्सी कोर्बारी निमुला, ओच्छे बजाररीक्यार निमा म्हिगदेसे मान लगै भिसी सेम लमुला। थेहड् लसीन यहूदीगदे हुप तबा दिमदेन भोज चबा ग्लारीनोन मुल ठिरी चिबारी सेम लमुला। ⁴⁷ थेहड् लसी थेनीगदेसे हेम्बो सिबा

* 20:42-43 भजन ११०:१

मिडम्हेमेगदेला दिमनाम ब्यन्मुला ओच्छे म्हिगदेदा उन्बाला लागिरी हेड्बा हेड्बा प्रार्थना लमुला। थेहड्बा म्हिगदेसे ल्हानान सजाय याड्ला।”

21

हेम्बो सिबा मिडम्हेमेसे पिन्बा भेटी

मर्कूस १२:४१-४४

1 येशूसे परमेश्वरला मन्दिररी फ्युक्पो म्हिगदेसे भेटी युबा ताडरी भेटी युबान लबा म्हाड्जी। 2 ओच्छे हेम्बो सिबा प्राडबो मिडम्हेमेसेनोन डबल न्ही युबा म्हाड्जी। 3 चु म्हाड्सी येशूसे, “च्यागो, डाला ताम ड्यान्गो। स्यहान्दो म्हिगदेसे भन्दा चु हेम्बो सिबा प्राडबो मिडम्हेमेसे ल्हानान भेटी युबा मुला। 4 तिग्दा भिसम स्यहान्दो म्हिगदेसे हाडदेन छ्याम मुबा ल्हानान सम्पत्तिग्याम युजी, तर चु हेम्बो सिबा मिडम्हेमे प्राडबो तसीनोन हाडदेन छ्याम मुबा जति जम्मान युजी” भिसी सुड्जी।

परमेश्वरला मन्दिर नाश तला

मत्ती २४:१-२; मर्कूस १३:१-२

5 तिरेकुनु चेलागदेसे, “ज्यबा ज्यबा युड्बादेन म्हिगदेसे फुल्बा भेटीगदेग्याम जेना लसी सहोबा चु परमेश्वरला मन्दिर गाते जेबा!” भिसी ताम लबान मुबा। तर येशूसे थेनीगदेदा, 6 “तिरेकुनु चुहड्बा धुइएनोन खाल, थे धुइरी दान्दे म्हाड्बा चु मन्दिरला युड्बा गिकनोन बाँकी आचिना जम्मान फुप्ला” भिसी सुड्जी।

जम्बुलिड नाश तबा धुइला चिनुगदे

मत्ती २४:३-१४; मर्कूस १३:३-१३

7 ओच्छे थेनीगदेसे, “गुरु, चु तामगदे खाइमा तला? चुहड् तबारी छ्याड्जी भिसी खाहड्बा चिनु म्हाड्ला?” भिसी ड्योइमा, 8 येशूसे थेनीगदेदा चुहड् भिसी सुड्जी, “एनीगदे होशियार तसी

चिउ, खालैसे एनीगदेदा झुक्याब थालगै। तिग्दा भिसम डाला मिन किन्सी 'डानोन थार्बा पिन्बा ख्रीष्ट हिनना' भिसी ल्हानान म्हिगदे खला। ओच्छे 'धुइ खसी जिन्बा मुला' भिसी भिला, तर एनीगदेसे थेनीगदेला ताम थाड्यानगो। 9 ओच्छे लडाइ तजी भिबा ताम थे:सी एनीगदे आत्तेब थातउ, तिग्दा भिसम चु जम्बुलिड नाश तबा भन्दा डाच्छा चु तनोन तो:ला। तर थेनोन धुइरी चु जम्बुलिड नाश आत।" 10 जमाहेन्से येशूसे थेनीगदेदा दो:सी चुहड् भिसी सुड्जी, "म्हि यहुलला बिरोधरी म्हि यहुलनोन ओच्छे यहुल्साला बिरोधरी यहुल्सा रे:ला। 11 ओच्छे घेन घेन सडगुल खला, जम्मान ग्लारी अनिकालदेन देसान खला। मुरी घेन घेन लोड्बा खबा चिनुगदे म्राड्ला।

12 "तर चु तबा भन्दा डाच्छा म्हिगदेसे एनीगदेदा चुड्सी दुख पिन्ना। ओच्छे यहूदीगदे हुप तबा दिमरी जिम्मा लसी एनीगदेदा झ्यालखानरी झाड्ला। ओच्छे एनीगदेसे डादा विश्वास लबासे लमा ग्लेदेन अञ्चलाधीशगदेला डाच्छापट्टि भोर्ला। 13 थे धुइरी एनीगदेसे डाला बारेरी पाड्बा मौका याड्ला। 14 तर एनीगदेसे हाडदा जोगब लबारी तिग पाड्तो:बा भिसी धन्दा सुर्दा थालउ। 15 तिग्दा भिसम थे धुइरी एनीगदेसे तिग ताम पाड्तो:बा थे ताम पाड्बारी डाइ एनीगदेदा ज्ञान बुद्धि पिन्ना। जमाहेन्से थेनीगदेसे एनीगदेला ताम थाबारी आखम ओच्छे एनीगदेसे पाड्बा तामला जोहाबएनोन पिन्बारी आखम।* 16 तर एनीगदेदा हाडलान आबा आमा, ज्योज्यो आले ओच्छे हाडला म्हिगदेदेन ह्योगदेसेनोन चुड्सी पिन्ना। ओच्छे एनीगदे न्हडला कोइ कोइदा मी म्हिगदेसे साइपुड्ला। 17 थेहड् लसीन डादा विश्वास लबासे लमा एनीगदेदा जम्मान म्हिगदेसे हेला लला। 18 तर एनीगदेला थोबोला क्रा गिक सुत्तै आताइ। 19 जस्तोन दुख तसैनोन एनीगदेसे सेमहेन्सेन

* 21:15 लूका १२:११-१२

विश्वास लसी चिबासे लमा जुकजुकधोनाला जुनी याड्ला।

येशूसे यरूशलेम नाश तला भिसी सुड्बा

मत्ती २४:१५-२१; मर्कूस १३:१४-१९

20 “यरूशलेम शहरदा सिपाहीगदेसे घेरब लबा म्राड्माहेन्से शहर नाश तबा धुइ खसी जिन्जी भिसी एनीगदेसे घोउ। 21 थे धुइरी यहूदिया अञ्चलरी मुबागदे गडरीक्यार यागै, शहर न्हडरी मुबागदेसे शहर ख्लागै ओच्छे नाम्सारी मुबागदे शहररी थाखगै। 22 तिग्दा भिसम थे धिन चा परमेश्वरग्याम सजाय याड्बा धिन हिन्ना। ओच्छे परमेश्वरला बचनरी भिबा जम्मान ताम पूरा तनोन तला।* 23 थे धुइरी जिउ न्हीला म्रिडम्हेमेदेन कोलादा इहे ख्वाबा आमागदेदा इन गाते ल्हानान दुख तला! ओच्छे यहूलसा नाडनोन ल्हानान दुख तला। चु यहूलला म्हिगदेदा परमेश्वरसे ल्हानान सजाय पिन्ना। 24 थे धुइरी कोइ कोइ म्हिगदेदा तरवारसे ताम्सी साइला, कोइ कोइदा चुड्सी यहूलसा यहूलसारी भोर्ला। ओच्छे अर्गु यहूलला म्हिगदेला धुइ आजिन्तेधोना थेनीगदेसे यरूशलेमरी रजाई लला।

येशू दोःसी फेप्खबा धुइ

मत्ती २४:२९-३१; मर्कूस १३:२४-२७

25 “लनी धिनीदेन सारगदेरी खाइमै आम्राड्बा चिनुगदे म्राड्ला। ओच्छे समुन्द्र घुर्बादेन समुन्द्रला छालसे लमा जम्बुलिडला जम्मान म्हिगदे लोड्सी आत्तेब तला।* 26 जम्बुलिडरी तबारी छ्याइबा दुखला बारेरी था याड्सी म्हिगदे लोड्सी सिबा तेबान तला। तिग्दा भिसम मुरी मुबा जम्मान शक्ति याडयोड तला। 27 जमाहेन्से परमेश्वरसे पुइखबा म्हिदा घेन शक्तिदेन यहाल यहालरी खसुरी खबान लबा म्राड्ला।* 28 थेहड् तमाहेन्से

* 21:22 होशे ९:७ * 21:25 यशै १३:१०; इज ३२:७; योए २:३१; उन्बा ६:१२-१३

* 21:27 दानि ७:१३; उन्बा १:७

आलोड्ना एनीगदेसे स्वर्गपट्टि च्यागो, तिग्दा भिसम एनीगदेदा योनान थार्ना लला।”

अञ्जीरला दोड च्यासी लोप्तोःबा ताम

मत्ती २४:३२-३५; मर्कूस १३:२८-३१

29 जमाहेन्से येशूसे थेनीगदेदा उखानग्याम चुहड् भिसी सुड्जी, “एनीगदेसे अञ्जीर दोडदेन अर्गु दोडगदे, 30 भुबा म्राड्माहेन्से दाहेन्से छेपबा छबा ला खबारी छ्याइजी भिसी था याड्मुला। 31 थेहड् लसीन डाइ पाड्बा ताम तबान लबा म्राड्माहेन्से एनीगदेसे परमेश्वरला य्हुल्सा खबा धुइ तबारी छ्याइजी भिसी था याड्गो।

32 “च्यागो, एनीगदेसे डाला ताम ड्यान्गो, चु जम्मान ताम पूरा आततेधोना दान्देला म्हिगदे आसि। 33 मुदेन जम्बुलिड म्हासी निसैनोन डाला बचन खाइमै आम्हा।”

येशूसे छोर्सी चिउ भिसी लोपबा

34 “तर एनीगदे होशियार तसी चिउ, आहिन्सम मोजमजा लसी ड्य्होइसी भ्रबादेन हाडला ल्हुइला धन्दा सुर्दासे लमा एनीगदेला सेम न्होड्ला। ओच्छे परमेश्वरसे पुइखबा म्हि खमा एनीगदे तिक्खुरीन पासोरी परब तबा हड् तला। 35 थेहड् लसीन जम्बुलिडरी चिबा जम्मान म्हिगदेथोरी थे धिन खला। 36 थेतबासेलमा एनीगदे ‘थे लोड्बा खबा धुइरी जोगब तबारीदेन परमेश्वरसे पुइखबा महिला डाच्छा रापबारी खमगै भिसी प्रार्थना लसी छोर्सी चिउ’ भिसी सुड्जी।”

37 थे धुइरी येशूसे धिनीरी म्हिगदेदा परमेश्वरला मन्दिररी लोप्मुबा, ओच्छे म्हुन तमाहेन्से जैतून भिबा गडरी बास स्य्हूबारी फेप्मुबा।* 38 येशूला बचन ड्यान्बाला लागिरी म्हिगदे स्य्होरीन परमेश्वरला मन्दिररी खमुबा।

* 21:37 लूका १९:४७

22

येशूदा साइबारी सल्लाह लबा

मत्ती २६:१-५, १४-१६; मर्कूस १४:१-२, १०-११

1 मिश्र यहुल्साग्याम फेसी खबा धिनदा ढन्सी खमीर आयुना गेड चसी धड्बा चाड खबारी छ्याइमुबा। 2 थे धुइरी परमेश्वरला मन्दिररी पूजा लबा मुल म्हिदेन यहूदी धर्मगुरुगदेसे येशूदा खाहड् लसी साइबा भिसी दाउ च्यासी भ्रमुबा। तर थेनीगदे म्हिगदेदेन छ्याम लोड्मुबा। 3 थे धुइरी च्युक न्ही चेलागदे न्हडला यहूदा इस्करियोत भिबा चेलाला सेम न्हडरी शैतान वाड्जी। 4 जमाहेन्से यहूदा इस्करियोत परमेश्वरला मन्दिररी पूजा लबा मुल म्हिदेन मन्दिरला सिपाहीगदेला हाकिम मुबा ग्लारी निसी येशूदा चुड्सी थेनीगदेला यारी जिम्मा लसी पिन्ना भिसी सल्लाह लजी। 5 जमाहेन्से थेनीगदे ताड्सी यहूदा इस्करियोतदा टाडगा पिन्ना भिसी कबुल लजी। 6 जमाहेन्से यहूदा इस्करियोतसे तला, भिसी महिला हुल आरेबा धुइरी येशूदा चुड्सी पिन्बारी दाउ च्यासी भ्रजी।

येशूसे भोज तयार लउ भिसी कुल्बा

मत्ती २६:१७-२५; मर्कूस १४:१२-२१; यूहन्ना १३:२१-३०

7 मिश्र यहुल्साग्याम फेसी खबा धिनदा ढन्सी धड्बा चाड खसी जिन्बा मुबा। थे चाडकुनु ग्यु बोगो बलि पिन्तो:बा मुबा। 8 थे धुइरी येशूसे पत्रुसदेन यूहन्नादा “एनीगदे निसी य्हाडला लागिरी चाडला भोज तयार लउ” भिसी कुल्जी।

9 जमाहेन्से थेनीगदेसे “डन्से भोज खानड तयार लउ” भिसी येशूदा ड्योइमा, 10 येशूसे थेनीगदेदा “एनीगदे शहररी धोमैछ्याम दर्बुडरी क्युड पुडसी निबान लबा म्हि गिकदा स्याप्ला, एनीगदे थे महिला लिच्छा लिच्छा निउ। 11 ओच्छे थे म्हि जुन दिमरी वाड्ला थे दिमला धनीदा ‘डाइ डाला चेलागदेदेन छ्याम चिसी मिश्र

यहुल्साग्याम फेसी खबा धिनदा ढन्सी धड्बा चाडला भोज चबा कोठा खानड मुला? भिसी डन्ना गुरुसे ड्योइबा मुला' भिसी भिउ।
 12 जमाहेन्से एनीगदेदा थेसे डाच्छान जेना लसी थान्बा तलाथोला घेन कोठा उन्सी पिन्ना। एनीगदेसे थेरीन य्हाडला लागिरी भोज तयार लउ” भिसी कुल्जी।

13 जमाहेन्से थेनीगदे निजी ओच्छे येशूसे सुड्बा हड्ढोन स्यापजी। ओच्छे थेनीगदेसे थे मिश्र यहुल्साग्याम फेसी खबा धिनदा ढन्सी धड्बा चाडला भोज तयार लजी।

प्रभु भोज

मत्ती २६:२६-३०; मर्कूस १४:२२-२६; १ कोरिन्थी ११:२३-२५

14 चबा धुइ तमाहेन्से येशू ह्याडला मुल चेलागदेदेन छ्याम सोल छ्योइबारी धन्छ्याजी। 15 जमाहेन्से येशूसे थेनीगदेदा “डाइ दुख नाबा भन्दा डाच्छा एनीगदेदेन छ्याम चिसी चु चाडला भोज चबा सेम ल्हानान मुबा। 16 थेतबासेलमा एनीगदेसे डाला ताम ड्यानगो, परमेश्वरला यहुल्सारी चु भोजला अर्थ पूरा आततेधोना डाइ चु भोज दोःसी आच” भिसी सुड्जी। 17 जमाहेन्से येशूसे खोरे यारी थोसी परमेश्वरदा धन्यवाद पिन्माहेन्से “ना, चु एनीगदे जम्मासेन भो लसी थुड्गो। 18 एनीगदेसे डाला ताम ड्यानगो, तिग्दा भिसम परमेश्वरला यहुल्सा आखतेधोना डाइ अडगुरला निडगु आथुड्” भिसी सुड्जी। 19 जमाहेन्से येशूसे यारी गेड थोसी परमेश्वरदा धन्यवाद पिन्माहेन्से गेड क्युइसी चेलागदेदा पिन्बान, “चु एनीगदेला लागिरी पिन्बा डाला ल्हुइ हिनना। दाहेन्से डादा ढन्सी चिबाला लागिरी एनीगदेसे चुहड्ढोन लउ” भिसी सुड्जी। 20 थेहड् लसीन गेड चसी जिन्माहेन्से येशूसे खोरे थोसी चेलागदेदा चुहड् भिसी सुड्जी, “चु खोरेरी मुबा अडगुरला निडगु डाला काग्याम सहोबा छार कबुल हिनना। चु डाला का एनीगदेला लागिरी बगब तबा मुला। 21 “तर च्यागो, डादा चुड्सी पिन्बा म्हि

डादेन छ्यामनोन चिसी चबान मुला। ²² परमेश्वरसे पुइखबा म्हिमी परमेश्वरसे सुइबा अन्छार निनोन तोःला। तर परमेश्वरसे पुइखबा म्हिदा चुइसी पिन्बा म्हिसे चा परमेश्वरग्याम सजाय याइला।” ²³ चु ताम थेःसी चेलागदे ह्राड ह्राड न्हडरी चुहइबा गेलबा म्हि खाल मुला तला? भिसी ताम लजी।

खाल घेन खाल जजा

²⁴ जमाहेनसे चेलागदे ह्राड ह्राड न्हडरी खाल घेन भिसी ताम लबारी छ्याइजी। ²⁵ चु ताम था याइसी येशूसे थेनीगदेदा चुहइ भिसी सुइजी, “चु जम्बुलिडला ग्लेगदेदेन घेन घेन म्हिगदेसे म्हिगदेथोरी शासन लमुला। ओच्छे म्हिगदेसे थेनीगदेन इन्दा दया लबा ज्यबा म्हि हिनना भिसी भिमुला। ²⁶ तर एनीगदे चा थेहइ तबारी आत। ओच्छे एनीगदे न्हडरी जुन घेन मुला थे जजा दोगै ओच्छे नेता दोबासे चा स्य्हान्दोगदेला सेवा लगै। ²⁷ तिग्दा भिसम चबारी चिबा मालिकदेन चबा पिन्बा नोकररी खजिबा चा घेन हिनना? तिग चबारी चिबा मालिक घेन आहिन? हिनना। तर डा एनीगदेला ओन्छाडरी चबा पिन्बा नोकर हइबान मुला। ²⁸ एनीगदे चा डादा दुख तमा हो लबागदे हिनना। ²⁹ थेतबासेलमा डाला आबासे डादा यहुल्सा गिकला अधिकार पिन्बा हइ लसी डाइएनोन एनीगदेदा थे यहुल्साला अधिकार पिन्ना। ³⁰ जमाहेनसे एनीगदेसे डाला यहुल्सारी टेबुल गिकरीन चबा थुइबा लला। ओच्छे इस्राएलला च्युक न्ही वंशला निसाफ लसी ठिरी चिला।”

पत्रुससे येशूदा खलाला भिसी पाइबा ताम

मत्ती २६:३१-३५; मर्कुस १४:२७-३१; यूहन्ना १३:३६-३८

³¹ जमाहेनसे येशूसे पत्रुसदा “सिमोन, सिमोन, शैतानसे एदा ग्वा यह्पाबा हइ लसी यह्पाबारी छ्याइबा मुला। ³² तर एला विश्वास याडयोड थातगै भिसी डाइ एला लागिरी प्रार्थना लजी। ए दोःसी डादेन छ्याम खमाहेनसे एसे आलेगदेदा विश्वासरी कोइना लउ।

33 जमाहेन्से पत्रुससे येशूदा “प्रभु, डा हाडदेन छ्याम झ्यालखानरी चितोःसै हाडदेन छ्याम सितोःसै सिबारी तयार मुला” भिसी भिजी।

34 तर येशूसे पत्रुसदा “पत्रुस, डाला ताम ड्यान्गो, न्हडगर स्य्होरी नागा क्राबा भन्दा डाच्छा एसे डादा डोसेबान आरे भिसी सोमरेमधोना पाड्ला” भिसी सुड्जी।

खबारी छ्याडबा दुखला लागिरी होशियार तउ

35 येशूसे थेनीगदेदा “डाइ एनीगदेदा टाडगा, झोला, लखम आभोर्ना निउ भिसी पुइमुबा। थे धुइरी एनीगदेदा तिगै सहेला खाँचो तजी? भिसी ड्योइमा, थेनीगदेसे “आतनी” भिसी भिजी।

36 जमाहेन्से येशूसे थेनीगदेदा चुहड् भिसी सुड्जी, “तर दाहेन्से टाडगा मुबासे टाडगा थोगो, झोला मुबासे झोला थोगो, ओच्छे जुन म्हिदेन छ्याम तरवार आरे थेसे हाडला क्वान चूड्सी भिसै तरवार गिक ग्लुउ। 37 एनीगदेसे डाला ताम ड्यान्गो, तिगदा भिसम परमेश्वरला बचनरी ‘थेदा अपराधीगदेदा हड्णोन लला भिसी भिबा ताम डाग्याम पूरा तनोन तोःला’ तिगदा भिसम डाला बारेरी भिबा ताम पूरा तबान मुला।”* 38 जमाहेन्से येशूदा चेलागदेसे “प्रभु, चुरी तरवार न्ही मुला” भिसी भिमा, येशूसे थेनीगदेदा “तजी” भिसी सुड्जी।

येशूसे लबा प्रार्थना

मत्ती २६:३६-४६; मर्कूस १४:३२-४२

39 येशू सदला हड्णोन थे ग्लाग्याम थोन्सी जैतून भिबा गडरी फेपजी। ओच्छे थेला चेलागदेएनोन लिच्छा लिच्छा निजी। 40 थे ग्लारी धोमाहेन्से येशूसे थेनीगदेदा “एनीगदे फसब आतबाला लागिरी प्रार्थना लसी चिउ” भिसी सुड्जी। 41 ओच्छे येशू थेनीगदेग्याम जजाकी क्याथाड फेप्सी पुइ जूसी चुहड् भिसी

* 22:37 यशै ५३:१२

प्रार्थना लबारी छ्याइजी। ⁴² “आबा, तसम डादा चु दुखग्याम फेसी पिन्गो। तर डाइ म्हन्बा अन्छार आहिन, हाडसे म्हन्बा अन्छार पूरा तगै।” ⁴³ जमाहेन्से स्वर्गग्याम स्वर्गदूत गिक खसी येशूदा दुख नाखम्बा भड पिन्जी। ⁴⁴ थे धुइरी येशूदा ल्हानान दुख तबासे लमा थेसे इन प्रार्थना लजी। थे धुइरी थेला टू काला धारा हड लसी सरी ताइबान मुबा।

⁴⁵ प्रार्थना लसी हाडला चेलागदे मुबा ग्लारी फेप्खमा येशूसे थेनीगदे दुखसे लमा लारकलुरूक तसी म्हेसी चिबा स्यापजी। ⁴⁶ जमाहेन्से येशूसे थेनीगदेदा “तिग्दा एनीगदे म्हेसी चिबा? रे:गो, पापरी फसब आतबाला लागिरी एनीगदेसे प्रार्थना लउ” भिसी सुड्जी।

येशूदा चुड्बा

मत्ती २६:४७-५६; मर्कूस १४:४३-५०; यूहन्ना १८:३-११

⁴⁷ येशूसे चु ताम सुड्बान लबा धुइरी थेरी महिला हुल गिक खजी। थे महिला हुलला डाच्छा डाच्छा च्युक न्ही चेलागदे न्हडला यहूदा भिबा चेला खजी। येशूदा च्योक लबाला लागिरी थे येशूला डामरी खजी। ⁴⁸ तर येशूसे थेदा “यहूदा, तिग एसे परमेश्वरसे पुइखबा म्हिदा च्योक लसी फसब लबारी म्हाइबा?” भिसी सुड्जी।

⁴⁹ जमाहेन्से येशूला डामरी मुबा चेलागदेसे थेरी तबारी छ्याइबा ताम था याड्सी येशूदा “प्रभु, डन्से तरवार चलब लउ?” भिसी, ⁵⁰ थेनीगदे न्हडला गिकसे परमेश्वरला मन्दिररी पूजा लबा मुल महिला नोकरदा ताम्मा थेला दाहिनेपट्टिला नाब्यड च्वाट्टन थाजी। ⁵¹ तर येशूसे “तजी थालउ” भिसी थेला नाब्यडरी थुर्सी खम्ना लजी।

⁵² जमाहेन्से येशूसे हाडदा चुड्बारी खबा परमेश्वरला मन्दिररी पूजा लबा मुल म्हिगदेदेन मन्दिरला सिपाहीगदेला हाकिमगदेदा

ओच्छे यहूदी गन्बागदेदा “एनीगदे यहूदा चुड्बारी खबा हड् लसी तिग्दा कडीदेन तरवार थोसी खबा? 53 डा धिन धिननोन एनीगदेदेन छ्यामनोन परमेश्वरला मन्दिररी मुबा। थे धुडरी एनीगदेसे डादा आचुड्नी। तर दाहेन्से एनीगदेला गे लबा धुइ खबा मुला ओच्छे चु धोपधोपसे शासन लबा धुइ हिन्ना” भिसी सुड्जी।

पत्रुससे येशूदा डोसेबा आरे भिसी पाड्बा

मत्ती २६:५७-५८, ६९-७५; मर्कूस १४:५३-५४, ६६-७२; यूहन्ना १८:१३-१८, २५-२७

54 जमाहेन्से थेनीगदेसे येशूदा चुड्सी परमेश्वरला मन्दिररी पूजा लबा मुल महिला दिमरी भोजी। पत्रुसएनोन थारेडग्यामसेन येशूला लिच्छा लिच्छा निजी। 55 थेरी महिगदे खाडगाला गुडरी मे फुड्सी दबान मुबा। ओच्छे पत्रुसएनोन थेरी खसी थेनीगदेदेन छ्यामनोन चिजी। 56 थेनोन धुडरी नोकरस्या गिकसे पत्रुसदा मे दूसी चिबा म्राड्सी थेदा “चु महिएनोन येशूदेन छ्यामनोन मुबा” भिसी भिमा, 57 पत्रुससे थे नोकरस्यादा “माइ, डाइ थेदा डोसेबा आरे” भिसी भिजी।

58 ओच्छे छिननड लिच्छा स्य्हान्दो महि गिकसे पत्रुसदा म्राड्सी, “एएनोन थेनीगदेला ह्यो हिन्ना” भिसी भिमा, पत्रुससे “डा आहिन” भिसी जोहाब पिन्जी।

59 ओस्पन घण्टा गिक लिच्छा स्य्हान्दो महि गिकसे “चु महिएनोन पक्कान येशूदेन छ्यामनोन मुबा, तिग्दा भिसम चुएनोन गालीलला हिन्ना” भिसी भिमा, 60 पत्रुससे “एसे तिग भिबा, डादा था आरे” भिसी भिमैछ्याम नागा क्राजी। 61 ओच्छे प्रभुसे पत्रुसदा सहीजी। जमाहेन्से “न्हडगर स्य्होरी नागा क्राबा भन्दा डाच्छा सोमरेमधोना एसे डादा डोसेबान आरे भिला” भिसी प्रभुसे सुड्बा ताम पत्रुससे ढन्जी। 62 जमाहेन्से पत्रुस मडग्यार निसी घ्वाँ घ्वाँ क्राजी।

येशूदा सिपाहीगदेसे खिसी लसी तोबा

मत्ती २६:५९-६८; मर्कूस १४:५५-६५; यूहन्ना १८:१९-२४

63 जमाहेन्से येशूदा चुड्सी भबा म्हिगदेसे येशूदा खिसी लबान तोजी। 64 ओच्छे येशूला मी घपसी तोबान, “लु, अगमवाणी पाङ्गो, एदा खाल्से तोजी?” भिसी भिजी। 65 ओच्छे थेनीगदेसे येशूदा बड्बान बेइज्जत लजी।

येशूदा यहूदीगदेला सभारी भोर्बा

मत्ती २६:५९-६६; मर्कूस १४:५५-६४; यूहन्ना १८:१९-२४

66 यहाल तमैछ्याम येशूदा यहूदी गन्बागदे हुप तबा सभारी भोर्जी। थे सभारी परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे मुबा। 67 जमाहेन्से थेनीगदेसे येशूदा “ए थार्बा पिन्बा ख्रीष्ट हिनना भिसम डन्दा पाङ्गो” भिसी भिमा, येशूसे थेनीगदेदा “डाइ पाङ्गसैनोन हाडनीसे विश्वास आल। 68 ओच्छे डाइ तिगै ड्योइसैनोन हाडनीसे जोहाब पिन्बारी आखम। 69 तर दाहेन्से परमेश्वरसे पुड्खबा म्हि शक्तिशाली परमेश्वरला दाहिनेपट्टि चिला” भिसी सुड्जी।

70 जमाहेन्से थेनीगदे जम्मासेन येशूदा “थेहड् भिसम तिग ए परमेश्वरला झा हिनना?” भिसी ड्योइमा, येशूसे थेनीगदेदा “हाडनीसे सुड्बा हड्नोन डा थेनोन हिनना” भिसी जोहाब पिन्जी।

71 येशूसे चुहड् सुड्माहेन्से थेनीगदेसे “थेलान सुड्ग्याम यहाडसे चु जम्मान ताम थे:सी जिन्माहेन्से दाहेन्से यहाडदा थेला बिरोधरी अर्गु प्रमाण तिग्दा तो:जी” भिसी भिजी।

23

पिलातससे येशूदा ड्योइबा छार्बा लबा

मत्ती २७:१-२, ११-१४; मर्कूस १५:१-५; यूहन्ना १८:२८-३८

1 जमाहेन्से यहूदीगदेलान सभाला म्हिगदेसे येशूदा पिलातस भिबा रोमी अञ्चलाधीश मुबा ग्लारी भोर्सी जिम्मा पिन्जी। 2 ओच्छे थेनीगदेसे येशूदा दोष लबान, “चुसे हाडसे हाडदान डा थार्बा पिन्बा ख्रीष्ट हिन्ना भिबादेन रोमी ग्याल्बो कैसरदा तिरो फाआतो: भिसी य्हाडला यहूलसाला म्हिगदेदा न्होड्ना लबा डन्से स्यापजी” भिसी भिजी। 3 थेनीगदेला ताम थे:सी पिलातससे येशूदा “तिग ए यहूदीगदेला ग्ले हिन्ना?” भिसी ड्योड्मा, येशूसे पिलातसदा “थे मी हाडसेन सुड्बा मुला” भिसी जोहाब पिन्जी।

4 जमाहेन्से पिलातससे परमेश्वरला मन्दिररी पूजा लबा मुल म्हिदेन थेरी मुबा जम्मान म्हिगदेदा “डाइ चु म्हिला तिगै गलती आस्यापनी” भिसी भिमा, 5 थेनीगदेसे क्रिड्बान, “चुसे यहूदिया अञ्चलदेन गालील अञ्चलहेन्से चुधोनाला म्हिगदेदा हाडला ताम लोप्सी न्होड्ना लबा मुला” भिसी भिजी।

6 जमाहेन्से पिलातससे “चु म्हि गालीलला हिन्ना?” भिसी ड्योड्जी। 7 येशू हेरोदसे शासन लबा अञ्चलला चीम भिसी था याड्माहेन्से पिलातससे येशूदा हेरोद मुबा ग्लारी पुड्जी। थे धुइरी हेरोद यरूशलेमरी मुबा। 8 येशूदा म्राड्माहेन्से हेरोद ल्हानान ताड्जी। तिग्दा भिसम थेसे येशूला बारेरी थे:बासे लमा ल्हानान धिनहेन्से येशूदा च्याबा सेम लमुबा। ओच्छे थेसे येशूसे लबा तिगै उदेकला गे च्याम्याड्ला भिसी आश लबा मुबा। 9 थेतबासेलमा थेसे येशूदा ल्हानान ताम ड्योड्जी तर येशूसे तिगै जोहाब आपिन्नी। 10 ओच्छे परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे क्रिड्बान येशूदा दोष लबारी छ्याड्जी। 11 जमाहेन्से हेरोददेन थेला सिपाहीगदेसे येशूदा खिसी लबान बेइज्जत लजी। ओच्छे येशूदा ग्लेसे क्वान्बा हड्बा क्वान क्वान्सी पिन्सी पिलातस मुबा ग्लारी दो:सी पुड्जी। 12 डाच्छा हेरोददेन पिलातस आढिक्बा मुबा। तर थे धिनकुनुहेन्से थेन्नी ढिक्जी।

येशूदा सिबाला सजाय पिन्बा

मत्ती २७:१५-२६; मार्कूस १५:६-१५; यूहन्ना १८:३९-१९:१६

13 जमाहेन्से पिलातससे परमेश्वरला मन्दिररी पूजा लबा मुल म्हिगदेदेन यहूदी नेतागदेदा ओच्छे म्हिगदेदा ड्योइसी, 14 “एनीगदेसे चुसे म्हिगदेदा न्होङ्ना लजी भिसी डा मुबा ग्लारी भजी, तर डाइ एनीगदेला डाच्छापट्टिन चुदा ड्योइबा छार्बा लमा डाइ हाडनीसे लबा दोष तिगै आस्यापनी। 15 हेरोदसेएनोन तिगै दोष आस्यापबासे लमा चुदा यहाड मुबा ग्लारी पुइखजी। च्यागो, साइनोन तोःबा खाल्ला गे चा चुसे तिगै लबा आरे। 16 थेतबासेलमा डाइ चुदा सजाय जे पिन्सी पुइला” भिसी भिजी। 17 यहूदीगदे मिश्र यहुल्साग्याम फेसी खबा धिनदा ढन्सी धड्बा चाडला धुइरी पिलातससे झ्यालखानरी मुबा म्हि गिकदा पुइतोःमुबा।† 18 तर जम्मान म्हिगदेसे “चुदा साइनोन तोःला, बरु डन्ना लागिरी बारब्बादा पुइसी पिन्गो” भिसी क्रिड्जी। 19 थे धुइरी जम्मान म्हिसे डोसेबा बारब्बा भिबा आज्यबा गे लबा म्हि गिक झ्यालखानरी थान्बा मुबा।

20 पिलातससे येशूदा पुइबा सेम लसी म्हिगदेदा घोना लबारी म्हाइजी। 21 तर थेनीगदे जम्मासेन, “चुदा क्रुसरी टाँगब लसी साइगो, क्रुसरी साइगो!” भिसी क्रिड्बाला क्रिड्बान लजी। 22 दोःसीएनोन पिलातससे थेनीगदेदा “तिग्दा? चुसे थेहड्बा आज्यबा गे तिग लबा मुला? डाइ मी चुदा साइतोःबा दोष तिगै आस्यापनी। थेतबासेलमा डाइ चुदा सजाय पिन्सी पुइला” भिसी भिजी। 23 तर थेनीगदे झन क्रिड्सी, “क्रुसरी साइनोन तोःला” भिसी भिजी। चुहड् लसी क्रिड्सी म्हिगदेसे ढाजी। 24 जमाहेन्से पिलातससे येशूदा थेनीगदेसे भिबा हड्न्नोन लपुड्जी। 25 ओच्छे आन्दोलन लसी म्हि साइबासे लमा झ्यालखानरी

† 23:17 चु पदला ताम ल्हानान हड्बा ग्रीक बाइबलरी भिबा आरे।

झाड्बा बारब्बादा पिलातससे पुइसी पिन्जी। तिग्दा भिसम म्हिगदेसे थेदान पुइसी पिन्गो भिसी भिमुबा। तर येशूदा चा थेनीगदेसे पाड्बा अन्छार थेनीगदेला यारी जिम्मा लसी पिन्जी।

येशूदा क्रुसरी साइबा

मत्ती २७:३२-४४; मर्कूस १५:२१-३२; यूहन्ना १९:१७-२७

26 जमाहेन्से थेनीगदेसे येशूदा थेग्याम भोर्बान लमा कुरेनी भिबा गूलाला सिमोन खबान मुबा। थेदा चुड्सी येशूला क्रुस पुइपुड्सी येशूला लिच्छा लिच्छा भ्रपुड्जी। 27 ओच्छे महिला हुल येशूला लिच्छा लिच्छा निजी। थेरी म्रिडम्हेमेगदेएनोन क्राबा क्रिड्बा लबान मुबा। 28 तर थेनीगदेपट्टि दोःसी येशूसे चुहड् भिसी सुड्जी, “यरूशलेमला झामेगदे, डाला लागिरी थाक्रागो, तर हाडलान लागिरी ओच्छे हाडलान कोलागदेला लागिरी क्रागो। 29 तिग्दा भिसम चुहड्बा धुइएनोन खबान मुला। थे धुइरी म्हिगदेसे कोला आन्हबा म्रिडम्हेमेदेन ड्हे ख्वाआतोःबा म्रिडम्हेमेगदेदा परमेश्वरग्याम मोलम याड्बा म्हि हिन्ना भिसी भिला। 30 थेनोन धुइरी म्हिगदेसे गडगदेदा डनीथोरी ताइगो ओच्छे डन्दा लहुउ भिसी भिला।* 31 दोड पिडगै मुबा धुइरीन चुगदेसे चुहड् लमुला भिसम दोड खर्माहेन्से झन तिग लला?” भिसी सुड्जी।

32 थेनीगदेसे य्हो न्हीदाएनोन येशूदेन छ्यामनोन साइबारी भोर्जी। 33 जमाहेन्से थेनीगदे खप्पर भिबा गडरी धोखजी। थेरी थेनीगदेसे येशूदा क्रुसरी टाँगब लजी। ओच्छे थे य्हो न्हीदाएनोन गिकदा येशूला दाहिनेपट्टि, गिकदा देब्रेपट्टि लसी क्रुसरी टाँगब लजी। 34 थे धुइरी येशूसे “आबा, चुगदेदा माफ लउ। तिग्दा भिसम चुगदेसे तिग लबान मुला थे चुगदेदा था आरे” भिसी सुड्जी। ओच्छे सिपाहीगदेसे चिट्ठा युसी येशूला क्वान हाड हाड न्हडरी भो लजी।*

* 23:30 होशे १०:८; उन्बा ६:१६ * 23:34 भजन २२:१८

35 थेरी राप्सी च्यासी चिबा म्हिगदेदेन यहूदी नेतागदेसे येशूदा खिसी लबान, “चुसे स्यहान्दो म्हिदा मी जोगब लजी। चु परमेश्वरसे धम्बा थार्बा पिन्बा ख्रीष्ट हिनसम हाडसे हाडदान जोगब लगै” भिसी भिजी।*

36 ओच्छे सिपाहीगदेसेएनोन येशूदा अडगुरला कम्बा निडगु पिन्सी खिसी लबान,* 37 “ए यहूदीगदेला ग्ले हिनसम हाडसे हाडदान जोगब लउ” भिसी भिजी।

38 ओच्छे येशूदा “यहूदीगदेला ग्ले” भिसी दोष उन्बा ताम भिसी येशूला थोबोथोरी थान्जी।

39 येशूदेन छ्यामनोन क्रुसरी टाँगब लबा यहो न्ही न्हडला गिकसे येशूदा खिसी लबान, “ए थार्बा पिन्बा ख्रीष्ट आहिन? लु, एसे हाडदा जोगब लउ, ओच्छे डन्दाएनोन जोगब लउ” भिसी भिजी। 40 तर स्यहान्दो यहोसे थेदा बड्बान चुहड् भिसी सुड्जी, “एदा परमेश्वर म्राड्सी लोड्बा आखमुला? थेसे याड्बा सजाय एसे याड्बा आरे? 41 य्हाडसे मी आज्यबा गे लबासे लमा ठीक सजाय नाबान मुला, तर चुसे मी थेहड्बा तिंगै आज्यबा गे लबा आरे।”

42 जमाहेनसे थेसे येशूदा “येशू, हाडला यहुल्सारी फेप्बा धुइरी डादाएनोन ढन्गो” भिसी भिजी।

43 ओच्छे येशूसे थेदा “एसे डाला ताम ड्यानगो, तिनीन ए डादेन छ्याम स्वर्गरी तला” भिसी सुड्जी।

येशू सिबा

मत्ती २७:४५-५६; मर्कुस १५:३३-४१; यहून्ना १९:२८-३०

44 ओस्पन धिनना बाह बजेहेनसे तीन बजेधोना यहुल्सा नाडनोन धोपधोप तजी। 45 थे धुइरी धिनीला यहाल म्हाजी, ओच्छे परमेश्वरला मन्दिर न्हडला पर्दा पख्ले न्ही तसी ढेजी।*

* 23:35 भजन २२:७ * 23:36 भजन ६९:२१ * 23:45 प्रस्था २६:३१-३३

46 जमाहेन्से येशूसे क्रिड्बान, “आबा, डाला आत्मा किन्गो” भिसी सुड्माहेन्से येशूला सा निजी।*

47 चु म्राड्सी रोमी कप्तानसे परमेश्वरदा जयजयकार लबान, “चु म्हि पक्कान परमेश्वरला डाच्छा ज्यबा म्हि चीम” भिसी भिजी।

48 चु म्राड्सी थेरी च्याबारी खबा जम्मान म्हिगदेदा ल्हानान दुख तसी क्राबा क्रिड्बा लबान दिमरी निजी। 49 ओच्छे येशूदा डोसेबा म्हिगदेदेन गालीलग्याम येशूदेन छ्याम छ्याम खबा म्रिड्महेमेगेदे थारेड्ग्यामसेन चु ताम च्यासी चिबा मुबा।*

येशूदा धुर्सारी थान्बा

मत्ती २७:५७-६१; मर्कूस १५:४२-४७; यूहन्ना १९:३८-४२

50 योसेफ भिबा म्हि ज्यबादेन परमेश्वरसे कुल्बा ताम ड्यान्बा म्हि मुबा। थे यहूदी सभाला सदस्य मुबा। 51 थेसे स्यहान्दोगदेसे येशूदा साइबारी सल्लाह लबा धुइरी बिरोध लमुबा। तिग्दा भिसम थेसे परमेश्वरसे शासन लबा धुइ खला भिसी भ्रान्सी चिबा मुबा। थे यहूदिया अञ्चलला अरिमाथिया भिबा नाम्साला म्हि मुबा। 52 थे पिलातस मुबा ग्लारी निसी येशूला लास हीजी। 53 ओच्छे थेसे येशूला लास क्रुसग्याम तेःसी मलमलला क्वानसे रिल्जी। जमाहेन्से युड्बाला पहरारी ट्वाइसी स्होबा धुर्सारी थान्जी, थे धुर्सारी चु भन्दा डाच्छा खालैला लास थान्बा आरेबा। 54 थे धिन बल्पबा न्हबा धिनना डाच्छाकुनु मुबा। थेतबासेलमा बल्पबा न्हबा धिन खबारी छ्याइमुबा। 55 गालीलग्याम येशूदेन छ्याम खबा म्रिड्महेमेगेदेएनोन योसेफदेन छ्यामनोन निजी ओच्छे येशूला लास धुर्सारी थान्बा च्याजी। 56 जमाहेन्से थेनीगदे दिमरी निसी येशूला लासरी फोर्बाला लागिरी ज्यबा खाल्ला छ्युगुदेन अत्तर

* 23:46 भजन ३१:५ * 23:49 लूका ८:२-३

तयार लजी। तर न्हडगरदड चा यहूदीगदेला ठिम अन्छार बल्पबा न्हबा धिन धड्जी।*

24

येशू सिबाग्याम सोबा

मत्ती २८:१-१०; मर्कूस १६:१-८; यूहन्ना २०:१-१०

1 जमाहेन्से थे म्रिडम्हेमेगदे आइतवारकुनु स्य्होरीन हाडसे तयार लबा ज्यबा खाल्ला छ्युगुदेन अत्तर भोर्सी येशूदा थान्बा धुर्सारी निजी। 2 थेनीगदे थेरी धोमा धुर्साला म्रापरी थान्बा युड्बा बलिड्सी थान्बा म्राड्जी। 3 तर थेनीगदे धुर्सा न्हडरी वाड्सी च्यामा थेरी येशूला लास आम्राड्नी। 4 थेरी थेनीगदे अलमल तसी चिबा धुइरी झक्झक्बा क्वान क्वान्बा म्हि न्ही थेनीगदेला डामरीन राप्जी। 5 थे म्हि न्हीदा म्राड्सी म्रिडम्हेमेगदे लोड्सी सरी ख्लुप तजी। जमाहेन्से थे म्हि न्हीसे थेनीगदेदा चुहड् भिसी भिजी, “एनीगदेसे सोबा म्हिदा तिग्दा सिबागदे थान्बा धुर्सारी म्हाइबा? 6 येशू चुरी आरे। थेदा सिबाग्याम सोना लसी जिन्बा मुला! येशू गालीलरी मुबा धुइरी एनीगदेदा तिग भिसी सुड्बा मुबा थे ताम एनीगदेसे ढन्गो। 7 परमेश्वरसे पुइखबा म्हिदा पापीगदेला यारी जिम्मा लला, ओच्छे कुसरी टाँगब लला तसैनोन डादा सोमरेमाकुनु सिबाग्याम सोना लला।” 8 जमाहेन्से येशूसे सुड्बा ताम थेनीगदेसे ढन्जी।

9 जमाहेन्से थे म्रिडम्हेमेगदे धुर्साग्याम दोःसी निसी हाडसे म्राड्बा जम्मान ताम च्युक गिक चेलागदेदेन स्य्हान्दो जम्मान म्हिगदेदा पाड्जी। 10 थे म्रिडम्हेमेगदे चा मरियम मगदलिनी, याकूबला आमा मरियमदेन योअन्ना मुबा। ओच्छे थेनीगदेदेन छ्याम स्य्हान्दो म्रिडम्हेमेगदेएनोन मुबा। थेनीगदेसेन मुल

* 23:56 प्रस्था २०:१०; वयव ५:१४

चेलागदेदा हाडसे म्राड्बा जम्मान ताम पाड्मुबा। ¹¹ तर चेलागदेसे “एनीगदेसे तिग आतोःबा ताम लबा?” भिसी पत्याब आतनी। ¹² तर पत्रुस चा डोड रेःसी धुर्सापट्टि यार्बान निजी। थेरी धोसी धुर्साला म्रापग्याम योड तसी च्यामा येशूदा बेरब लबा क्वान जे म्राड्जी। चुहड् तबा म्राड्सी थे उदेक म्हन्बान दिमपट्टि निजी।

इम्माउस नाम्सारी निबा ग्यामरी येशूदा स्याप्बा

मर्कूस १६:१२-१३

¹³ थेनोन धिनकुनु येशूला चेलागदे न्हडला चेला न्ही यरूशलेमग्याम ओस्पन कोस सोमसे गडसल थारेडला इम्माउस भिबा नाम्सारीक्यार निबान मुबा। ¹⁴ थेनीगदेसे यरूशलेमरी तबा तामला बारेरी हाड हाड न्हडरी ताम लबान मुबा। ¹⁵ चुहड् लसी ताम लसी भ्रबान लबा धुडरी येशूएनोन थेनीगदेदेन छ्यामनोन फेप्जी। ¹⁶ तसैनोन थेनीगदेसे येशूदा डोआसेनी। तिग्दा भिसम परमेश्वरसे थेनीगदेदा डोसेना आलनी।

¹⁷ जमाहेन्से येशूसे थेनीगदेदा “एनीगदेसे तिग ताम लसी भ्रबा?” भिसी ड्योइमा, थेनीगदेला ली धोपधोप लसी थेन तजी।

¹⁸ थे न्ही न्हडला क्लेओपास भिबासे येशूदा “यरूशलेमरी कोर्सी खबा म्हि तसीनोन थेरी तिनी न्हडगर तिग तबा मुला थे ताम था आयाड्बा चा हाड जे चीम” भिसी पाड्मा, ¹⁹ येशूसेएनोन थेनीगदेदा “तिग ताम?” भिसी ड्योइजी।

जमाहेन्से थेनीगदेसे “नासरतला येशूला बारेरी तबा ताम हाडदा था आरे? थे म्हि अगमवक्ता हिन्ना। थेसे लबा गेदेन लोप्बा ताम परमेश्वरदेन म्हिला ओन्छाडरी शक्तिशाली मुबा। ²⁰ तर थेदा परमेश्वरला मन्दिररी पूजा लबा मुल म्हिदेन यहूदी नेतागदेसे चुदा साइगो भिसी क्रुसरी टांगब लपुड्जी। ²¹ यहाड इस्राएलीगदेदा येशूसेन पापग्याम फेला भिसी डन्से आश लमुबा। तर येशूदा साइबाएनोन तिनी सोमरे तजी। ²²⁻²³ चुदे

जे आहिन, तिनी स्यूहोरीन डन्ना कोइ कोइ नाना आडागदे येशूदा थान्बा धुर्सारी निमा, थेनीगदेसे येशूला लास आसयापनी। थेरी थेनीगदेसे स्वर्गदूतगदेदा म्राड्जी। थे स्वर्गदूतगदेसे “येशू सोसी जिनबा मुला” भिसी थेनीगदेदा पाड्बा ताम डन्दाएनोन पाड्सी उदेक तना लजी। ²⁴ चु ताम थेःसी डन्ना कोइ कोइ होगदे येशूदा थान्बा धुर्सारी च्याबारी निजी। थेनीगदेसेएनोन थे म्रिडमहेमेगदेसे पाड्बा हड्णोन स्यापजी, तर येशूदा भिसम आम्राड्नीम।”

²⁵ जमाहेन्से येशूसे थेनीगदेदा चुहड् भिसी सुड्जी, “ताम आघोबा म्हि, अगमवक्तागदेसे पाड्बा ताम विश्वास लबारी एनीगदेदा खाहड्बा गाहो तबा? ²⁶ तिग थार्बा पिन्बा ख्रीष्ट हाडला शक्तिदेन यहालरी फेप्खबा भन्दा डाच्छा चु दुख नातोःबा आरेबा?” ²⁷ ओच्छे येशूसे हाडला बारेरी मोशाहेन्से जम्मान अगमवक्तागदेसे परमेश्वरला बचनरी भिबा ताम थेनीगदेदा घोना लजी।

²⁸ थेनीगदे इम्माउस नाम्साला डामरी धोखमाहेन्से येशू अझ थेग्याम क्यारनोन फेपबारी छ्याइजी। ²⁹ तर थे चेला न्हीसे येशूदा “म्हुन तबारी छ्याइजी, थेतबासेलमा तिनी हाड डन्देन छ्यामनोन धन्छ्यागो” भिसी भिमाहेन्से येशू थेनीगदेदेन छ्याम धन्छ्याबाला लागिरी दिम न्हडरी फेपजी। ³⁰ येशू थेनीगदेदेन छ्याम सोल छ्योइबारी धन्छ्याजी। जमाहेन्से येशूसे गेड छ्यारी थोसी धन्यवाद पिन्सी गेड क्युइसी थेनीगदेदा पिन्जी। ³¹ जमाहेन्से थेनीगदेसे येशूदा डोसेजी। तर थेनोन धुइरी थेनीगदेसे येशूदा थेरी आम्राड्नी। ³² ओच्छे थेनीगदेसे “येशू य्हाडदेन छ्याम ग्यामरी ताम लबान परमेश्वरला बचन घोना लबा धुइरी य्हाडला सेम गाते ताड्बा मुबा” भिसी हाड हाड न्हडरी ताम लजी।

³³ जमाहेन्से तुरुन्तन थेनीगदे यरूशलेमपट्टि निजी। थेरी धोमा थेनीगदेसे च्युक गिक चेलागदेदेन छ्याम पोप तसी चिबा म्हिगदेसे,

34 “प्रभु सिबाग्याम सोबादेन सिमोन मुबा ग्लारी फेपूबा ताम चा पक्कान हिन्ना चीम” भिसी ताम लसी चिबा स्यापूजी।
35 जमाहेन्से थेन्नीसे एनोन ग्यामरी तबा तामदेन प्रभुसे गेड क्युडबा धुइरी थेन्नीसे प्रभुदा डोसेजी भिबा ताम थेरी मुबागदेदा पाडूजी।

येशू चेलागदे मुबा ग्लारी फेपूखबा

मत्ती २८:१६-२०; मर्कूस १६:१४-१८; यूहन्ना २०:१९-२३; मुल चेला १:४-८

36 थेनीगदेसे चु ताम लबान लबा धुइरी येशू थेनीगदेला डाच्छा रापूजी, ओच्छे “एनीगदेदा शान्ति तगै” भिसी सुडूजी।

37 तर येशूदा प्राडूसी, “चु म्हड कि तिग” भिसी थेनीगदे लोडूसी आत्यब तजी।

38 जमाहेन्से येशूसे थेनीगदेदा “एनीगदे तिग्दा सेमरी शङ्का लसी लोडूबा? 39 एनीगदेसे डाला यादेन काडरी थुर्सी च्यागो, डानोन हिन्ना। तिग्दा भिसम म्हडला स्यादेन नखु आत, तर डाला मी मुला” भिसी सुडूजी।

40 चुहड सुडूमाहेन्से येशूसे थेनीगदेदा हाडला छ्यादेन स्यहाप उनूजी। 41 जमाहेन्से थेनीगदे ताडूसी उदेक तसी अझ येशूला ताम विश्वास आलनी। जमाहेन्से येशूसे थेनीगदेदा “एनीगदेदेन छ्याम तिगै चबा सहे मुला?” भिसी ड्योडमा, 42 थेनीगदेसे दुम्बु गिक तार्डाला स्या येशूदा पिन्जी। 43 थे तार्डाला स्या तासी येशूसे थेनीगदेलान डाच्छापट्टि छ्योडजी।

44 जमाहेन्से येशूसे थेनीगदेदा “डाला बारेरी परमेश्वरसे मोशादा पिन्बा ठिमरी, अगमवक्तागदेसे भ्रिबा किताबगदेदेन व्हाइला किताबरी भ्रिबा जम्मान ताम पूरा तबा मुला। चु ताम एनीगदेदेन छ्याम मुबा धुइरीन डाइ एनीगदेदा पाडूबा मुबा” भिसी सुडूजी।

45 जमाहेन्से येशूसे थेनीगदेदा परमेश्वरला बचन घोखम्बा ज्ञान पिन्जी। 46 ओच्छे येशूसे थेनीगदेदा चुहड भिसी सुडूजी, “थार्बा

पिन्बा ख्रीष्टसे दुख नातोःला ओच्छे सोमरेमाकुनु थे सिबाग्याम सोला, ⁴⁷ थेला मिनरी ह्वाड ह्वाडला पाप ख्लासी परमेश्वरपट्टि दोःजी भिसम पापला दोष मेटब तला। चु ताम यरूशलेमहेन्से जम्मान यहूलला म्हिगदेदा थेःना लतोःला भिसी परमेश्वरला बचनरी भिबा मुला। ⁴⁸ तिग्दा भिसम चु जम्मान ताम म्नाड्बा एनीगदेन हिन्ना। ⁴⁹ च्यागो, डाला आबासे पिन्ना भिसी कबुल लबा शक्ति डाइ एनीगदे मुबा ग्लारी पुइखला। थेतबासेलमा तोरग्याम शक्ति आयाड्तेधोना एनीगदे चु शहररीन चिउ।”

येशू स्वर्गरी फेप्बा

मर्कूस १६:१९-२०; मुल चेला १:९-११

⁵⁰ जमाहेन्से येशूसे थेनीगदेदा बेथानियाधोना भोर्जी, ओच्छे ह्वाडला या थीसी थेनीगदेदा मोलम पिन्जी। ⁵¹ चुहड् लसी मोलम पिन्माहेन्से येशूदा थेनीगदेग्याम फेसी स्वर्गरी भोर्जी। ⁵² येशूदा फ्या लमाहेन्से थेनीगदे ताड्सी यरूशलेमरी दोःसी निजी। ⁵³ ओच्छे थेनीगदेसे परमेश्वरला जयजयकार लबान सदन परमेश्वरला मन्दिररी चिजी।

परमेश्वरला बचन छार कबुल
New Testament in Tamang, Eastern

Copyright © 2011 Eastern Tamang Language Team

Language: Eastern Tamang (Tamang, Eastern)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2011, Wycliffe Bible Translators, Inc. and Eastern Tamang Language Team.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937221221

The New Testament

in Tamang, Eastern

© 2011, Wycliffe Bible Translators, Inc. and Eastern Tamang Language Team.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

Updates

eBible.org

PDF generated using Haiola and XeLaTeX on 3 Jul 2018 from source files dated 14 Jun
2018

75fec6d5-7473-5018-a7c0-dd9740a83748